

15
IVSTI LIPSI
EPISTOLARVM
SELECTARVM
CENTVRIA
MISCELLANEA.



ANTVERPIÆ,
EX OFFICINA PLANTINIANA,
Apud Ioannem Moretum.
CLD. MDCII.

Cum Privilegijs Casareo & Regio.

AMPLISS^{mo} ET NOBISS^{mo} DOMINO,
D. I O A N N I
D R E N C K W A I R T O
EQVITI, TOPARCHÆ DORMALIÆ,
supremo Belgicæ Thesaurario.



ENTVRIAM hanc MISCEL-
LANEAM ad te mitto, non
munus, sed particulam luen-
diæris, quod varium & mul-
tiplex fatemur debere. De-
cem anni sunt, cùm me beneficiis aliis su-
peralia cumulas: vt non dicam relationem,
sed actionem gratiarum studio videaris præ-
uenire. Quid autem vel nunc refero?
EPISTOLAS, plerasque ipsas ad te mis-
sas: & vel eo nomine tibi inscribendas. Sed
EPISTOLAS cùm dico, quid nisi rem le-
uem & subitaneam, & intra verba consisten-
tem dico? Sanè argumenti aut grauioris ma-
teriæ hic parum est: etsi alibi aliquid inter-

currit : sed quaecumque, nec felicibus bonisque temporibus , cum flos & acumen ingeniorum fuit, repudiatum ab editione & à famâ hoc genus. Epistolas quidem scribere, commune & , ut sic dicam, passuum est : bene scribere , infrequens, etiam in communi & frequenti aliquâ linguâ . Eò magis iure laudem poscit , si quis in Romanâ præstat , iam olim desitâ : & quæ tamen diuinâ providentiâ vinculum gentium in Europâ hæsit , & thesaurus ac conditorium scientiarum . Quid ? inquires . tanti ergo Latinè scribere ? non : sed sic subito & in festinationis illo calore , & sine industriæ colore scribere, id fortasse pretium habet , apud peritos quidem arbitros rerum & ingeniorum . Nam si studium hîc & affectatio apparet, nihil est : simplex hoc genus est, sine fuce aut paraturâ , &

Qualis Apellais est color in tabulis.

Atque ego de clegantiâ nescio , sed de facilitate aut (ut liberè dicam) neglegentiâ scio : & quàm nobis hæc sub manu feri nascique soleant , celerius fortasse quàm scribam.

scribam. Itaque velut præcoces quidam
fructus sunt , iidemque fugaces : qui ta-
men & vestris magnatum mensis inferri
solent , & gratiam festinationis mereri.
Quæso apud te , Amplissime Domine , ita
sit : placeant quia inaffectata sunt , quia
candida & aperta sunt , simillima inge-
nio & moribus tuis . Scio equidem gra-
ues serialesque tuas curas , in officio labo-
rioso & addam inuidioso : & in quo non
dicam gratiam mereri , sed odium vitare
difficile est . Quod tu tamen multos an-
nos est , cum ita sustines , ut industriam fi-
demque tuam Regi antea , nunc Prin-
cipibus probaueris ; & communiter om-
nibus integritatem , & animum ab omni
labe aut corruptelâ immunem . Nam tu
rationes istas Belgicæ , publicâ famæ voce
administras , tam abstinenter quàm alie-
nas , tam diligenter quàm tuas , tam re-
ligiosè quàm publicas , & quæ sacrum il-
lud nomen Patriæ tangunt . Hæctualaus
est , & in sedato animo vigor maxima-
rum rerum capax : quem , ut cœpi , ite-

rùm rogo , ad hæc etiam minuta , sed for-
tassè oblectantia , demitti. Legistine A-
chillem inter media arma citharam & fi-
des interposuisse , & animum ægrum cu-
râ aut offensâ recreasse ? Idem facito, hæc
vt ludicra sumito : sed ab animo tamen
ferio & graui profecta , & in cultum tui
deuoto. Louanij, v. Kalendas Martias. ∞.
I 5 C II.



INDEX

EPISTOLARVM

CENTVRIÆ

MISCELLANÆ.

A BRAHAMO Ortelio	xj.	Francisco Schotto, Senatori	xxxj.
Ægidio Schonondoncho, Soc.		G.	
Jesu	lxxxj.	Gedeoni Tserhendrixio U. R.	
Antonio Richardoto suo	xcij.	& N.	lv.
B.		Gerardo Buyteyvechio	lxxxij.
Balduino Junio suo	xlix, lij.	Guilielmo Barclayo	xxxij.
Balthasari Moreto suo	lxxxix.	Guilielmo Beeckmanno J ^{to}	xxvj.
Balthasari Robiano, Senatori		Guilielmo Michielsio I ^{to}	xxvj.
lxxvij.		Guilielmo Scarbergero suo	L
C.		H.	
Carolo Clusio	xvj.	Hadriano Vander-burchio, patri	
Carolo Utenhouio	xxvij.	xl, lx.	
Claudio Frossardo à Broissia	vij.	Hadriano Vander-burchio, filio,	
ad Contubernales suos	lj.	Senatori	lvij, lxx.
Cornelio Anchemanto suo	lxxij.	Henrico Schultreto	xcix.
Cornelio Prunio U. C.	xiiij.	Henrico Vvueno I ^{to}	xlvi.
D.		Hermannno Malleano	xxv.
Danieli Susio V. N.	vj.	Huberto Audeiantio	xxxix.
Dionysio Villerio V. R. & C ^L		Huberto Giffanio J ^{to}	xv.
lxxx.		Hugoni Grotio	xcix.
E.		J.	
Erycio Puttano suo	lxvij, c.	Iacobo Angiano, Equiti, Toparchæ	
Euerardo Pollioni J ^{to}	xxxij.	Kestergatij	xc.
F.		Iacobo Campio, Archidiacono &	
Francisco Billiodo	lvij.	Canonico	ij.
Francisco Modio	xvij.	Iacobo Carondeleto, Cancellario &	
Francisco Montmorencio Berseij		Canonico	ij.
Toparchæ	lxxxvij.	Jacobo Marchantio	xxij.
Francisco Oratio suo	lxxxvj.	Iacobo Pontano, Soc. Jesu	xxxiv.
		Iano	

Jano Lernutio	lxxvj.	Leonardo Lessio, Theol. Soc. Iesu	lxxvj.
Ioanni Baptista Perezio Baronio	lxx, xciiij, xcviij.		xix.
Ioanni Bernartio I ^{to}	xxviij, liiij,	Luca Wyngardo U. N.	lxxix.
xcj.		M.	
Ioanni Bezancenotto	lxxj.	Matthaeo Radero, Soc. Iesu	xxx.
Ioanni Brantio, Graphiario	xx,	Matthaeo Vachero, Cancellario	ix.
xxxviij.		Silesia	
Ioanni Carolo Anobardo U. N.	xlj.	N.	
Joanni Drenckvairto, Thesaurario		Nicolao de Veerd, I ^{to} & Cog-	lxxij, lxxxviij.
Supremo Regio;	x, xiiij, xxij,	nato	lxj.
xxiiij, xxxviij, xliij, xlviij, liij,		Nicolao Oudarto V. R.	lvj.
lxij, lxviij, lxxviij, xc.		Nicolao Serario, Soc. Iesu	v.
Joanni Hemelario	lxxxiv.	O.	
Ioanni Hollandio	xciiij.	Othom Hartio I ^{to}	xij, xxix.
Ioanni Moreto, Typographo	j;	P.	
xxxviij.		Petro Lafaillio, Caroli F.	xbij.
Ioanni Orano, Presb. Soc. Iesu	xlj.	Petro Orano I ^{to}	iv, xxj, lxxxvj.
Ioanni Seurio, Legato Hispaniensis		Petro Pantino Decano	lxiv, lxvj.
à Secretis.	lxxiv.	R.	
Ioanni Vouerio suo	xliij, xlviij,	Remaclo Roberti	lxviij.
lxxxviij.		S.	
Isaaco Casaubono	lxix.	Stephano Turnebo, Senatori	xxxv.
Iulio Salmerio	xcviij.	T.	
L.		Theodoro Cantero	lxxv.
		U.	
Leuino Torrentio, Episcopo	vij.	Vibrando Anskema	lux.

IUSTI LIPSI
EPISTOLARVM
SELECTARVM
CENTVRIA MISCELLANEA.

EPISTOLA I.

L. LIPSIVS IOANNI MORETO, *Typographo* S. D.



ERIO & vno verbo, mi Morete, semel hoc crede. quidquid à vobis ad me venit, gratum est, iucundum est: & meritò istæ tuæ litteræ, sincerissimi affectus in me plenæ. Nolo cū testêris: scio. nec pariter vllus vnquam Plantinianus ramus erit, quem ego non amem, & cui non benefactum velim ex imo isto fonte. Ostendam hoc semper, quamdiu melior ille spiritus diriget hoc corpus. Sed hæc non necessaria. precibus tuis respondebo, quas velut publico nomine ad me defers. Thraseam tuam, inquis, flagitant omnes. De multis, mi Morete, credo: multos etiam aliter esse censeo, & quibus hæc nostra nec grata valdè nec magna. Quæ iudicia vt nec magni ipse facio, nec planè tamen sperno: ita hoc facilè apud me impetrant, vt differam opus, si non vt omittam. Philosophia ista non pro omnium gustu: & calumniam vitare fortasse melius, quam deprecari. Munus aumarij, in quo chartæ & epistolæ nostræ recondantur, an non gratum sit te mittente? gratissimum: sed & re atque vsu opportunum, & hæcenus desiderabam. In oculis aut manibus cottidie erit: & quod sequitur, eius auctor. Ergo gratia tibi esto & dicta, & reposita: tu aut tui apud me inuenite, & amandi semper amate. Lugd. Bat. v. Id. Decemb. ∞. IC. LXXXIIX.

EPISTOLA II.

Leodicum.

IACOBO CARONDELETO, *Cancellario & Canonico*, S. D.

HAUD iniuriâ mihi gratularis, de felici aduentu ad Spadanâs Aquas. Certè per multa discrimina, & molestias, huc venimus: è quibus illa Deus depulit, & has mitigauit. Sine illius præsentis numine & auxilio, per tot ambages viarum, in hac afflictâ valetudine, nunquam venissemus ad propositam metam. Sed illi gratia esto, iam hic sumus: atque eo animo sumus, ut non ultra reuisamus ambiguos, & bonis parùm gratos, locos. Quæ ipsa causâ deferendi. Statuimus in vicino tractu inenses aliquot (fortassè & ultra) agere, & in quiete ac solitudine abdere nos in vetera illa Musarum caltra. Rogo eundem illum Deum, ut cum publico bono. Quòd autem amorem tuum præfers, & testaris: ille verò mihi notus: occasio mihi sit, pariter testificandi & declarandi mei. Dionysium Villerium iampridem ego noui, & amo hominem verè elegantis ingenij, niuei pectoris, & prorsus de meliore luto. Imò hoc te magis amo, quòd tu illum. Mihi valdè in votis, eiusmodi viros amplecti, & alloqui; magis, quàm omnes Principes & Dynastas. De nummis priscis, coràm videbimus: capior, atque etiam aliquid capio. De fluctibus qui imminere nobis, ex præfagio illius Calchantis, videntur, nō abnuo:

* κατὰ
βίῳ magna
calamitas
venitur.
Pind.

— ἡμῖν γὰρ μέγα πῶσι καὶ κλῆσις:

sed tamen de exitu haud valdè angor. Quem Deus diligit, per æqua per iniqua, per fluxus & refluxus perueniet ad suum portum. Utinam ego ad illum salutis! salutis inquam duplicis: nam & hæc corporis, videtur per fontes vestros etiâ affulgere. Sed adhuc incertò: momentum tamen & ῥοπή ad meliora. Vale R. & Nobilissime Vir, & nos sub metam septimanæ proximæ expectata. Nam rumor hîc de Aulâ, ad quod nomen fugio. VII. Kal. Iulij, ∞. IO. XCI.

vincina-
tio.

EPISTOLA III.

Moguntiacum.

IACOBO CAMPIO, *Archidiacono & Canonico* S. D.

PRAESENTIS tui vultus, & in vultu ipso conspicua probitas, me delectarunt: nunc litteræ, hanc ipsam præferentes, & in me

in me amorem. Gaudeo, & redamo, atque vt litteraria hæc colloquia frequentemus, te rogo. Nummos accepi, atque aliquot Inscriptiones, suo nomine gratas, tum & illius, à quo profecta. Quis studium hoc elegantia in viro nobili, & Germano non amet? quæ gens, nescio quomodo, parùm adhuc eò inclinauit: sed cùm eiusmodi proceres viam facient & præbunt, facilè istas Lunas sequentur minora illa astra. Deus faxit, & vt huc potius se dent, quàm ad inutiles & noxias illas super Religione disputationes. Vno verbo. ego Cancellarium vestrum amo, & beniuolentiam pariter eius in me pro beneficio amplector. Cur non vidi eum, cùm essem in vestrà vrbe? Nam ad hoc quidem temporis largiter fuit: sed credo abfuisse; aut de tali viro, & virtute neminem indicium mihi fecisse. si adfuit, & siluisti, tu mi Campi peccasti. Ego salutem, & obsequiosum animum illi deferò; & tibi mi Campi significo, me in Eburonibus & nunc esse, & videri futurum hanc hiemem. Amici sunt, qui detinent, tum & locus & vrbs amœna, & caput, quòd res in patriâ nostrâ loco, vt nemo ad eam adspirare possit, cui grata & amica quies. Sed nec securitas in plerisque oppidis, Batauò inualecente, & nostris per secordiam, aut pessimam disciplinâ infirmis. Me otium capit, non illud solum, & languidum, sed quod libri, & lucubrationes alant, ac vegetent, & quod aliquid egisse nos, etiam cùm nihil egimus, apud posteros testetur. Paro igitur plura: promptius, si diploma nobis, & interdictum à Cæsare esset, ne quis nostra statim (vulgò iam fit) recuderet, & imitaretur. Fit cum Typographi damno, sit cum meâ fraude, cui via adimitur addendi, immutandi, castigandi. Spero me in ipsâ Imperatoris aulâ amicos reperturum, sed per quos id confici, aut impetrari maximè debeat, ignoro. Tu si scis, me quoque scitiorem facito, & magis magisque tibi deuinctum deuinci. In Eburonum dominâ vrbe. XI. Kal. Sextilis. ∞. IO. XCI.

EPISTOLA IIIL

*Leodicum.*PETRO ORANO *J^{no}*.

HEVs tu, suauiter herè vnâ fuimus: & quid dicam nisi me à consortio vestro mores ducere, & paullatim hilarescere?

Deus faxit, remittat ille ater humor, quid nisi pater curarum & atræ mortis? De floribus meis dicebam, & inuitabam, & nescio quid promittebam. Obenignitatem in inopiâ! Leidæ aliqua nobis copia,

Huc una è multis capsula me sequitur.

Tamen veni, vide, cape. Incito te? Carmine etiam facio: sed quod à prorsâ istâ vix abit, & quale sub manu solet nasci.

PETRE, iuris & elegantioris
Musæ candide cultor, & sacerdos;
Quem ni sic amo, ut hos meos ocellos,
Atque ut tu geminos tuos puellos,
Jupiter mihi perdat hos ocellos:
Quando ad me venies, meosque flores?
Namque & gestio ego ipse te videre,
Atque illi mage gestiunt videri.
En Sol purior hic, & aura Ueris,
Pinxit, ut Babylonicum tapete,
Nostros areolas. Veni, videbis,
Gaudebis quoque. namque pars eorum,
Herculi ut decima, tibi sacrata est.
Ecquid te traho? sed veni, peribunt
Illi, ni properas, tuumque donum.

EPISTOLA V.

Herbipolim.

NIC. SERARIO, Soc. Jesu S. D.

CVM vsurâ salutem tribui, quæ epistolam bonam & vberem ad me traxit. Ita liberalis es? tamen, non mentiar, illo præne fine misi. Quid dissimulem? amare te cœpi, cum ob tua bona quæ ille ab alto tribuit, tum quia audiebam quod me amares. Non debuit diutiùs quasi sub cineribus delitescere hic ignis: quin, quia honestus est, exferat se, & chartarum isto adminiculo det flammam. Ergo apertè iam mi Serari, amo te, & cupio à te amari. Spem facis, aut potius fidem, ita esse: atque ego non desistam, & donec oculi isti claudentur, non claudet hic affectus. Mittamus blanda. Lecmputium meum (ita appello. amo

amo virum, & longi molestiq. itineris mei comitem fidum) honore apud vos & titulo publicè auctum, gaudeo: & scio meruisse. In patriam iuit, utinam labascanti illi fulcrum! quod vix spero, ita omnia non ad inclinationem spectare videntur, sed ad ruinam. Pax quàm proteruiter reiecta nuper, & illa Pindari ^{nov-} *ἀντράν-
τισται βέ-
βαια, ἰνὸς
στειλῆς.* *χρὶ φιλόφρονος, δ' αὖτις θυγατρὸς?* O misera, exulat ab Europâ: quia nec diu sedem habitura videtur in Germaniâ vestrâ. Illi Martiales iterùm ad suum Matrem: vellem ob aliam causam, quàm istam. Sed hæc infelicitas nostri ævi est, innouare, turbare, pugnare: & id specie Pietatis. In caipsâ, hortaris ut in meis refingam ubi opus, aut certè illustrem. Iamdiu statui; impediunt aut tardant partim typographi, partim quòd circumagimur, nec fiximus adhuc stabilem sedem. Scis quietæ mentis, imò & temporis, esse tale aliquod opus. Atqui conabor. & si mors præuenit, testor me alienum ab omni nouitiâ opinione aut errore, firmum in veterum scitis. Vale. Leodici, xvi. Kal. Maijas. ∞. I. c. xcii.

EPISTOLA VI.

Leodicum..

DANIELI SVSIO IACOBI F. V. N. S. D.

VT audiui de morte optimi patris tui, etsi ipse doleam, tamen crexi me ad te solâdum. Scio quàm afflicteris; & inter alias virtutes, noui tuam pietatem. Sed mi Sufi, debuisse illum mori non ignoras: & si tempora, & ea quæ circumstant, aspicias: fateberis, non potuisse oportuniùs mori. Æuum pessimum, & vix in spe correctionis: ut felices meritò censeamus, & verè *καρπῶδες*, qui educti. Ipse in ætate quoque iam pessimâ, & non senex sed senior, cum illud Lucretij locum habere incipit:

Claudicat ingenium, delirat linguaque, mensque.

Itaque si vnquam etymon illud Græcorum habere fidem debet, in his talibus potest: *τὸ γῆρας, παρὰ τὸ γῆρας ἰπᾶν*, dictum esse. Ipsi, inquam, qui in cā ætate, abire desiderant, extra miseras suas, & ludibria aliena. Iam quicquid optandum homini, & quæ vitæ longioris causa esse & votum solet, ipse adeptus. optimam famam, liberos propaginem stirpis, atque eos in fortunatis coniugiis, iterùm ad propagandum. Alia quæ in te vidit, apud te non dicam. Optare debuit mori, in hoc sereno Fortunæ, & priusquam

nubes aliqua offuscaret. Addo, quod caput est, mortuum piè, & in sano de religione & Deo sensu. Itaq. ne mortuus quidē, sed terra hîc relicta & terræ reddita; ipse immortalis in cælū migravit, ad immortalem illum patrem. Hæc te solentur. nec absentiam eius cogita, quin vnâ vbi sit cogites: & si pius es, in ætæno eius gaudio gaude. Facturum te confido, & habes qui quod ego breuiter & aridè, copiosè & vbertim tibi instillent: inter eos, Delirium nostrum. Animum tamen meum vides, quem scito in amore tui esse & fore firmum. Louanij, VI. Idus Decemb. ∞. IO. XCII.

EPISTOLA VII. *Antuerpian.*

LAEVINO TORRENTIO *Episcopo.*

ADOLESCENTES eos vidi, quos per epistolam mihi commendas: nec frustra. Quid enim tu à me frustra? quin ita promptè volo, & debeo, quidquid voles, vt admoneri modò debeam, non rogari. Et sanè in istâ re litterariâ, libens etiam officium conféro; quia censeo in publicum me impendere, quicquid ad culturam facit nostratum ingeniorum. Paucos per hæc bella, omnino paucos, ad artes nostras adspirare non ignoras: & eò magis prouehendi sunt, si qui adspirant. Quæ enim resp. tandem futura, si veteres, vt sic dicam, arbores exciduntur aut concidunt, nouellæ stirpes non depangantur in earum locum? Vastitas profectò, & tenebræ, & boni honestiq. incitia, & quod sequitur, contemptus. O vir magne, si plerique, qui ad temp. sedent, hæc tecum iuxtâ intelligant! maior certè honos aut cura esset eorum, qui has artes profitentur aut ornant; nec sic iaceret hæc ipsa (Louanium dico) earum sedes. In quâ, præter veterem nominis dignitatem, quid patè reliquum? nec publicis opibus, sed famâ suâ dixeris eam stare. Et tamen stabit, nisi vniuersa ruina patriam hanc inuoluit: à quâ nonnullus mihi interdum metus est, euentus istos improspèros, & magis caussas eorum intuenti. Sed benignus ille Deus, semper nostri tutor, auxiliabitur: quic quoque Reu^m in C. P. seruabit Ecclesiæ suæ & Reipub. futurum. Louanij, III. Idus Sept. ∞. IO. XCIII.

EPI-

EPISTOLA VIII.

Dolam.

CLAVDIO FROSSARDO A BROISSIA S. D.

A MOREM ego, non audaciam interpretor, mi Claudī, quod ad me scribis. Etsi enim varij interpellant, & verè dicam, melior diei pars scriptiunculis perit: tamen nunquam mihi graue, capere aut reddere litteras iis, qui tui similes, in virtutis & doctrinæ viâ recto cursu pergunt. Est etiam naturâ insitum, vt amemus faueamusque iis, quos putamus operâ nostrâ meliores, aut instructiores. quo in numero censere te non desinam, qui aliquamdiu cum affectu & industriâ nos audisti. Et nunc patria tua te habet, magis loco alio quàm animo, vti confido; & pergis haud dubiè in iis, quæ benè cœpisti, & exstrues ædificium, cuius iacta iamdiu fundamenta. Deus faciat. & (ne aliò te mittam) pater tuus, vir magnus, tibi sit in oculis, quem ad culmen hoc honorum eaispa studia artesque duxerunt, ad quas te vocamus. Vixi ipse olim in eâ vrbe vestrâ, sed non longum: & specimen etiam tunc aliquod publicè dedimus ingenij, aut facundiæ, siquid in nobis erat. velim scire, ecquid schola nunc floreat? vereor vt minimè, cum motus, si non vestros, vicinos tamen video, & Marrem ac Bellonam vbique in pretio magis, quàm Phæbum aut Musas. Istæ vices rerum sunt, & magnus ille gubernator, modò temporum lenem aliquam mitemque ætatem inducit; modò asperam turbantemque hiemem. Ferenda omnia, & expectanda ac votis expectanda meliora. sed vita in primis: quæ si emendata, profectò hæc quoque breui emendentur. Vale mi Claudī, & Amplissimo parenti tuo officium & salutem meam defer. Louanij, VII. Kal. Febr. ∞. ID. XCIIII.

EPISTOLA IX.

*Uratislaniam.*MATHAEO WACHERO *Cancellario Silesie* S. D.

SI à frequentâ scribendi animum meum æstimas & amo-rem; malè audiam necesse est, & deseruisse videbor militiæ huius signa. Quod non ita est, spondeo: sed laxat me, & velut comineatum aliquem liberiores dat, valetudo. Pares non sumus, quod apud te profiteor, reponere tot epistolis, quas vndique &

que & assiduè missas lectitamus. Tamen vos mihi pauci illi ex-
imij ; & ipsa cessatio etiam habuit causam , vt in occasione te
affarer. Ecce data est, scribo, & vnà libellos de C R V C E mitto.
Titulus magnum aliquid spondet : tractatui autem stilus noster
fortassè non respondet. sed vos legite, & quod amicorum est, iu-
dicate, atque etiam indicate. Amo admoneri. De filio, quod po-
stremis litteris consilium meum quæsieras , nunc dabo : etsi ex
ipso silentio videre potuisti, quid sentiam. Nam si mittendum
huc iudicassera, certè respondissem & id scripsissem : non placuit,
ne nunc quidem. quid ita ? non quin iucundum esset, tuum ali-
quem, imò te ipsum quodammodò, hîc habere ; sed quia omnia
bello etiam iacent, nec est vetus illa schola quæ fuit . Exteri non
conueniunt, ob viarum discrimina, & quia in vicino hostis. Qui
Louanij iam agimus, nihil mentiemur , si in liberâ quâdam cu-
stodiâ nos agere dicimus. Vestigium extra urbem tutò non po-
nimus, & illa prata, campi, siluulæ, calcantur aut adeuntur raro
pede. Cur igitur nos ipsi hîc agimus ? quia alia nostra ratio à iu-
uentute. Quiescere nobis propositum ; illis discere, tutò agere &
iucundè. denique hæc patria mea est, & incommoda etiam eius
meritò fero. Vt parentis aspera aliqua verba , filius patienter au-
diat, extraneus aspemetur : simile hîc esse dicam. Mollit etiam,
quòd Rex & Ordines honestè me & benignè habent . Sic agi-
mus mi Wachere : vt apud te omnia benè & votiuè, idque in
longum, Deum equidem rogo. Louanij, Nonis Feb. ∞. Io.
XCIII.

EPISTOLA X.

*Bruxellam.*IOANNI DRENCKWAIRTO, *Thesaurario Supremo Regio.*

HARTIVM dimittere sine litteris nolui, illum Hartium in a-
more vtriusque nostrum. Et quòd me in tuo esse voluisti,
gratias habeo, & in animo agnosco. Non fallunt me aut verba
tam benigna, aut ipse vultus, affectus tui index. Habeo, inquam,
gratiam, & debeo : atque vtinam in me sit, quo foueam hone-
stum istum ignem ! Quod quidem petebas à me nuper, de ado-
lescente aliquo , quem ad manum & honestiora munera habe-
res, qui esset ex meâ institutione : hoc ipso quid de me sentias vi-
deo, & statim dedi operam, vt effectum darem. Scripsi ad quem-
dam,

dam, qui nunc Mechliniæ; sed frustra, quia fides eius alteri iam obligata. Putabam tamen illum aptum futurum, ingenio, doctrinâ, moribus. Sed de alio cogitabo & dispiciam, si eruere aliquid possim. Nam bonâ fide, eiusmodi adolescentum copia rara est, qui cum litteris modestiam sociant & Virtutem. Sunt qui in illis aliquid possunt; sed ferè iidem vani, elati, & mores mutant. Scio te vtrumque velle, & à litteraturâ modicè instructum, & à moribus vel maximè ornatum. Sicut arborum illæ optimæ, quæ non florem solùm, sed fructum ferunt: sic hominum, quibus præter ornamenta doctrinæ, vita etiam est ad frugem. Sed cum de fructibus, tibi quoque agendæ gratiæ, qui altissimos carduos ex horto tuo submisisti. Quid remitto? animum seriò semper tuum. Louanij, xvii. Kal. Sextil. ∞. Io. xciiii.

EPISTOLA XL

Antuerpiam.

ABRAHAMO ORTELIO S. D.

DISSEREBAMVS nuper, vt scis, in mensâ apud Antistitem nostrum de Gestatione: & erat qui fortiter negaret in esse eam fuisse. Contrâ tendebam, & sciebam: sed non pertendebam, vt meus mos est, & vincam in talibus citius quàm pugnem. Itaque altercationem desij; abeunti tibi & requirenti obtuli, scripto me consignaturum, quod eius rei esset. Feci largiter, & totum hunc ritum explicatum, & in oculis ecce habes. Videbis, iudicabis, me amabis. GESTATIO veteribus Romanis crebro, vel assiduo potius in vsu, exercitij & valetudinis gratiâ: id quæ ferè sub balnei aut cænæ tempus. Quia, inquam, exercitij: idè Glossæ veteres explicant *Gestationem*, *ὑμνωσίαν*: item quæ, *Gestatorem*, *ὑμνωστὴν*. Sed laxum est, & finem rei, non rem dicunt. Pressius melius quæ eadem alibi: *Ἀνῶπα*, *Gestatio*. &, *Ἀνῶπιζεναι*, *Gestatur*. Id verum est. & latius omnis aut vectatio in naui, lecticâ, curru, venit in hoc nomen. Celsus per partes explicat libro II. in Capite proprio, *De Gestatione*. *Genera*, inquit, *gestationum* plura. sed tamen leuissima est naui, vel in portu vel in flumine: vehementior in alto mari, vel lecticâ aut scamno: acrior vehiculo. Omitto illas in aquis, in terrâ igitur triplex est: Lecticâ, Scamno, Vehiculo.

¶ In x. Elc-
dor.

culo. De Lecticâ, notum est, & alibi explicauit: Scamnum quid est? dico idem esse, quod Sellam. Nam in Lecticâ iacentes ferè vehebantur, in Sellâ sedentes, ideoque & Scamnum dixêre. Haud sæpe legas. sed in Iuuenalis Scholiâste veteri, huic sententiæ firmamentum tepperi. qui vbi Iuuenalis dixerat,

— *stratâ positus longaque cathedrâ:*

interpretatus est, *Cervicalibus stratis, Scamnum dicit.* Ergo eo auctore, idem Scamnum quod Cathedra siue Sella. Hæc est quæ Sella gestatoria Suetonio dicitur Neronis cap. x. Vitellij xv. De duplici isto genere, iunctim ita Seneca De breuitate vitæ: *Ne illos quidem inter otiosos numeraueris, qui Sellâ se & Lecticâ huc illuc ferunt, & ad Gestationum suarum, quasi deferere eas non liceat, horas occurrunt.* De scamno idem, epistolâ lv. *A Gestatione cum maximè venio, non minùs fatigatus, quàm si tantum ambulassem, quantum sedi. labor est enim diu ferri.* Posset quidem hoc & ad Vehiculum aptari, sed de Scamno vetitis, quia dixit, *Ferri.* At tertia est in Vehiculo siue Effedo. & communiter valdè sic utebantur, & hanc maximè intellegebât. Suetonius Vespasiano: *Post decisa, quæcumque obueniebant, negotia Gestationi, & inde Quieti vacabat.* Eadem enim illa quasi interpretans Aurelius Victor: *Post autem negotiis, quæcumque obuenissent, auditis, exerceri Vestatione, deinde requiescere.* Idem Suetonius Galbâ: *Ne ad gestandum quidem unquam aliter egressus (ita hæc legerim) quàm ut proximo vehiculo secum decies HS. in auro efferret.* Significat, licet timidum an cautum fuisse Galbam, ut numquam vel leuiter domo egrederetur, etiam ad Gestandum; quin secum altero & sequente vehiculo, decies illud HS. quasi subsidium fugæ (si interuenisset) efferret. Nec sanè quidquam in eâ lectione mutandum est. Seneca de peruerso illo Spanio, epist. cxxii. *Quæro circa horam noctis octauam, quis sit ille rotarum sonus? dicitur velle Gestari.* Manifestè dat rotas: ergo effedum fuit. Sic Martialis:

Illic Flaminia Salariaque

Gestator patet effedo tacente,

Nec blando rota sit molesta somno.

Suetonius de Claudio: *Solitus etiam in Gestatione ludere, ita effedo alueoque adaptatis, ne confunderetur ludus.* In effedo igitur, subiunctis equis, aut mulis: & quis vltra neget? Sanè mulos Iuuenalis adfi-

adsignat, versibus mox dandis; equos Martialis, in istis:

Gestatus biungis Regulus esset equis.

Quia autem crebra, inò assidua hæc Gestatio; curæ fuit, ut locus esset in vrbe aut villis duplex, Apertus & Tectus. Ille in æstate vsui; hic hieme. Et apertæ quidem Gestationes non nisi arboribus clauderentur ad latera, plerumque infructuosas, & quæ speciem modò haberent. Vlpianus de Vsufructu: *Et si fortè voluptate fuit pradium, Viridaria vel Gestationes, vel deambulationes, arboribus infructuosas opacas atque amœnas, non debet deijcere.* Plinius lib. II. Epistolar. *Gestatio buxo aut rore marino ambitur.* At Tectæ, porticibus clauderentur, opere & manu factis. Vtrumque genus Iuuenalis tetigit, Sat. IIII.

Quid refert igitur quantis iumenta fatiget

Porticibus? quantâ nemorum vestetur in umbrâ?

Nam priora palam ad porticum Gestatoriam, in quâ effedo cursus. Et posteriora explicat Scholiastes, *Viridaria, ubi solent Gestari.* Iterum de Tectis, idem Sat. VII.

Balnea sexcentis, & pluris Porticus, in quâ

Gestetur dominus, quoties pluit. anne serenum

Exspectet, spargatque luto iumenta recenti?

Atque ex Porticis, fortassè & Viridaria, plerumque rotundæ, & in orbem ibant. Quare? quia in exiguo spatio scilicet, amplior ita vestatio, continens & recurrens. Plinius indicauit, cum dixit: *Rore marino ambitur.* Ergo Ambitus fuit: & clariùs inscriptio hæc marmoris, ubi & magnitudo Porticus expressa:

GESTATIO

CIRCINI. EXTERIOR

A DIAETA. APOLLINIS

AD. DIAETA. EANDEM

IN. CIRCVITV. P. ∞. CC.

LXXVII.

Has tales, ditiores etiam in ipsâ vrbe habebant, suisque domibus. nec Martialè aliter exaudio, lib. XII. ad Sparsum quèdam:

Et rus in vrbe est, vinitorquæ Romanus,

Intraque limen clausus effedo cursus.

Non aliud quam Gestatio clausa tectaq. est: coque non placeat rescribi, *latus effedo cursus.* Noto denique, solum ipsum in his arte

factum & duratum fuisse leuiter: vt & concussio leuior esset, nec rotæ inæqualiter imprimerentur. Plinius in laudibus Suburbani Comensis, lib. I. Epist. *Quid Euripus viridis & gemmeus: quid illa mollis, & tamen solida Gestatio?* Nam pro ipso loco accipit, vt superiora aliquot exempla item euincunt. Hæc veteres, & pro bono valetudinis, quod res ipsa dicit. Plinius item, lib. XXVIII. *Inprimis verò prodest (valetudini) Ambulatio, Gestatio, & ea pluribus modis.* Seneca commendat, epist. xv. *Gestatio & corpus concutit, & studio non officit. possis legere, possis dictare, possis loqui, possis audire.* Et de concussione illâ distinctius, epist. LVI. *Mihi tamen opus erat concutere corpus, vt siue bilis infederat faucibus, discuteretur; siue ipse ex aliquâ causâ spiritus densior erat, extenuaret illum iactatio.* Sanè litteratorum, & qui menti operantur, exercitium illud sit: doleo periisse, aut certè per mores siue opes à nobis non vsurpari. Tu vale mi Orteli. In Musæo nostro, prid. Kal. Iul. æ. 10. XCIV.

EPISTOLA XII

Bruxellam.

OTHONI HARTIO I^{no} S. D.

EN mi Otho, ad nostrum Thesaurarium, (quidni nostrum? ego hercules corde veneror & amo) en inquam, de re quam commisit. Iuuenis de quo dixeram, & qui initio excusauerat, nunc paratus videtur, & rumpet vinculum quod ligabat. Scripsi igitur, & exspecto quid videatur. Si arcessi cum placeat, & coram conspici atque audiri; hoc approbem, ne vnus mei suffragio admittatur. Confido equidem fore, qualem volumus, & esse in eo quæ volumus; sed vos quoque diiudicare, quid nocet? imò id opus est, & decet. Rescribe verbo, non longos logos, auocor, & fabri mei strepunt. Adfirmo tibi, per læuam hanc occupatiunculam iacere studia, & interiores litterulas nostras. Sed non diu me tenebit, abi ædificatio, meam inminuis, restuas tibi habe. Vale. Louanij, VII. Kalend. Sept. æ. 10. XCIH.

EPI-

EPISTOLA XIII. *Bruxellam.*IOHANNI DRENCKWAIRTO, *supremo Regio Thesaurario.*

QUOD agere cœperam cum adolescente illo Batau, vt operam daret tibi in scriptione, & alio ministerio honesto, et si initio remora aut impedimentum fuit, tamen videor peregisse. Peregisse inquam, quod ad ipsum attinet: qui iam inclinatus, & exspecto voluntatis tuæ nutum. Si ita sedet, mittam ipsum ad te vt videas, explores; & transigas etiam, si approbabis. Equidem falli possum, sed moribus, industriâ, & mediocri doctrinâ, spero sustinere meam & tuam expectationem posse. Honestus inter suos est, & natus è Persinis: sed pietas & religionis studium (ama causam) amouit eum è patriâ, vbi parentes quoque sunt inter planè probos. Cetera, Vir Ampl^m tuo iudicio relinquo, quod certum mihi est acce esse & rectum. Verbo si rescribis, mittam eum ad te, & Mechliniâ euocabo, vbi nunc agit. Ampliss^{im}e & Nobil^{it}e Domine, diu reip. regi, & nobis, saluc. Louanij, VII. Kal. Sextil. ∞. IO. XCIIII.

EPISTOLA XIII. *Antuerpian.*

CORNELIO PRVNIO V. C. S. D.

EVGE, euge benignitatem tuam? qui munera ad me mittis, non plenâ manu aut sinu, quod dicitur, sed toto curru. Fatebor tibi, velut ictu lætitiæ percussus sum, cum vidi: & horto perpetuum emblema & ornamentum inscuiisti, quo maximè egebat. Nam florum aliquid, fruticum istorum nihil habebam: vt munus tuum non magnitudine solùm (verè tale est) sed opportunitate mihi sit gratum. Fecisti quod scripseras, & Ditem patrem ab inferis excitasti, qui non florilegam Proserpinam, sed Floram ipsam raperet & Pomonam. Amo amo te; etiam cognatum tuum *Dilfitrium*, qui tam promptè, tam benignè, hoc curauit. Quid autem ultra dicam? etiam illud, pœnitentiam iam agere impudentiæ meæ incipiebam, qui sic confidenter postulassem, quod ipse non haberes. Sed næ ego pœnitentiæ illius magnam nunc pœnitentiam ago, cum successum video, & ius mihi hoc fuisse in candidissimo tuo amore. Enimuerò, mi Pruni,

ferrea hæc sunt tempora, liceat etiam uti interdum ferreâ fronte. Et si mollis ea mihi per naturam est, sed sic desiderium & cupiditas indurat: qui auidè ista hortensia appeto, auocamenta non à studiis solum, sed à curis. quas tempora hæc assidue & vbertim gignunt. Quibus etsi non tollitur lumen illud, ut sic dicam, mentis: tamen interdum offuscatur, & velut nubeculâ serenitatem eius subducunt. Tu verò accumulas etiam beneficium, & de fenestris in nouâ domo iterum offers. Accepi & accipio, fenestras inquam: & duas nomini tuo inscribam. Te autem ipsum V. C. in hoc pectore, è quo nulla dies euellat. Louanij, III. Kal. Oct. ∞. IO. XCIIII.

EPISTOLA XV.

*Ingolstadtum.*HVBERTO GIFFANIO I^{to} S. D.

CVM Francofurti te vidi, & magis cum audiui, decretum mihi certò amicitiam tecum colere, quam etiam colo. Nihil in animo remisi, etsi in scriptione fortassè aliquid fuit, variâ vel culpâ vel causâ. Culpa quidem in iis, si qui meas (bis enim scripsi) aut non reddiderunt per negligentiam, aut per malitiam suppresserunt: causâ etiam in me, quem occupatiunculæ, & valetudinis infirmitas recidere cogunt & imminuere totum hoc genus scriptionis. Sumus Louanij, docemus, ædificamus etiam: an non bono magnoque animo, inter medias res aduersas? Litteris quidem quid hæc fiat, per te intellegis, nec pueros Musarum nunc in pretio, sed Martis. Apud vos aliter, & video Germaniam totam excoli, & fugitiuas è Galliâ artes sedem figere illic. Longum ita sit, nec magnus ille hostis quietem istam turbet, qui in limite, ut audimus, assultat. Ego ab Italis variè vocor, Pisas, Patavium, Mediolanum: tenet patria, à quâ tamen vel inuitus auellar, si possidet & mancipio habet eam Mauors. De Ic^{to} quod requiris, nihil mihi nunc in promptu: sed nec otium nostra dispiciendi. Militia me exercet, sed vetus illa Romana: & creptiam est cudi. Tu quid agas, quâ agas, & satini ex voto tuo illic & merito, velim scire: & te ætatem valere. Vale V. Cl. Louanij, Idibus Nouemb. ∞. IO. XCIIII.

EPI-

EPISTOLA XVI.

CAROLO CLVSIO S. D.

ARGVMENTVM te scribendi non habere, & tamen scribere, certè amoris est argumentum mi Clusi. De quo inter nos ambigere quì possumus? inueterauit iamdiu, & vt annosa arbor,

— quantum vertice ad auras

Æthereas, tantum radice ad tartara tendit.

Sed mitto blandiri. Germanum nobilem, te myſtagogo, in amicitia noſtræ ædem recepi: & vt tua elogia ſunt, non eam maculabit. Valetudinem tibi in hac ætate ſatis validam eſſe, gaudeo, & diu talem precor: de meâ quod quæris, ambigua eſt, & vt cum noſtro Comico, magis varia quàm panthera. Totâ quidem hac æſtate aduerſa fuit: ſperafſem meliorem, ſi Aquis Spadanis vti mihi per terrores veſtros licuiſſet: Videbo quid in proximâ erit, ſi tamen Deus & hanc dabit. Tu mi Cluſi ſalue, & hunc ineuntem annum atque alios felix vide. Louanij, III. Kal. Ianuar. ∞. 15. XCV..

EPISTOLA XVII.

Leodicum.

GVILIELMO BEECKMANNO I^{to} S. D.

NVPER admodum litteras tuas accepi, & hauebam iam nunc respondere, ſed muliercula elapſa mihi celerius opinionone fuit. In morâ nihil intertrimenti: animus in te eſt qui fuit, imò addo qui erit: id eſt, iudicio & affectu tui amans. Iudicium meum meruerunt cùm alia in te, tum modestia: quæ nunquam me feſellit radix eſſe & altrix virtutis & veræ famæ. Oculi & animus mihi ſæpè dolent. cùm aliam iuuentutem iſtam video, proteruam, lubricam, vanam; & id in laudabiliũ omnium rerum inopiâ, aut raritate. At firma & bona mens, vt ager poſt quietem, fructus promittit vberes, & non fallaces. In câ re vtinam contulerit, aut conferat aliquid, conſuetudo vel auditio mea! Scio optare, & non minùs tibi fauentem, quàm tuos eſſe. Tu autem non ſperas tantũ, ſed iactas, & inuidioſum exemplum adfers Alexandri & Ariſtotelis: quod non agnoſco, & ſcio eſſe ſuper
fortem

fortem nostram. Affectum tamen tuum agnosco & amplector, nec nolo sic errare leuiter, qui doctorem me habuerunt, aut habent: hoc fine, ut ardentius amplectantur aut perseuerent, quæ præscripsi. Duxisse enim & præiuisse ad bona me spero, & porro volo mi Bæckmanne, ubi occasio aut facultas erit. De Orano iam olim meo, spondere ausim, quod te amabit, iuuabit, pro copiâ suâ & Genio temporum: nec ultra te scio velle. Ego hoc vnum à te, uti me ames, & fratri tuo Canonico affectum hunc à me nuncios cum salute. Louanij, post. Non. anni noui ∞. 10. xcv.

EPISTOLA XVIII.

Ariam.

FRANCISCO MODIO S. D.

GRATULOR rediisse mi Modi, gratulor, & animi mei voto tibi adsum. Quando ad nos? inuise veteres tuas sedes, veteres etiam amicos: reperies & affectus veteres, nec temporum aut locorum intervallo mutasse. Ille quem amare me inuito solebas (liberè dicam) abiit

Illic, unde negant redire quemquam.

Sed abiit & noster ille Victor, ingenio dissimilis, & totus puritas, candor, fides. Rogas de meis studiis. quid si iacere ea dicam, per tempora parùm iis amica? nec mirum, nec iniquum dicam: tamen, ut possum, erigo, & pars altera Militiæ me habebat. Machinas & instrumenta eius tractabam. O me vel in turbis beaurum, quod animum abduco, & his oblectatiunculis pascor!

— *nihil amplius oro*

Maiâ nate, nisi ut propria hæc mihi munera faxis.

Eodem te, mi Modi, voco. nec ad elegantiam illa solum, sed sapientiam studia: quæ & auctori huic, & ætati tuæ maturiori, sunt apta. *Satis multum temporis sparsimus*, ait ille, *incipiamus in senectute vasa colligere.* In freto viximus, moriamur in portu. Fac, fac o ad alta natum ingenium! & semper sic sensi de te, & magnum spondi. Quod autem in extremo me rogas, siquid in Cæsareos scriptores habeam, communicem: parare te eorum editionem: ecce subiunxi. & amplius dico, siquid in aliâ te iuuare te, etiam remeâ possim, pete, & puta factum. Louanij, VIII. Kal. Febr. ∞. 10. xcv.

In Vul-

In Vulcatij Cassio scribitur:

Enumeravit deinde omnes Principes, qui essent occisi. dicens meruisse Neronem, debuisse Caligulam, Othonem & Vitellium nec imperare voluisse. Nam de Pertinace & Galbaparia sentiebat, cum diceret, In imperatore auaritiâ esse acerbissimum malum.

Mirum de Pertinace hîc dici, & illum Galbæ etiam (quanto post Galbam?) præponi. Sed magis mirum, hæc ab Antonino Imp. dici, qui Pertinacem antecessit. An ille de morte eiûs si fortè diuinavit? Putarem, de pertinaciâ Galbæ. & propriè significat vel tenacem nimis fuisse; vel & peruiacem in proposito non largiendi. Spartianus videatur eâ voce sic vsus in Seuero: *Cognomen Pertinacis, non tam ex sua voluntate, quàm ex morum parcimoniâ videtur habuisse.* Nam Pertinacem & Parcum æquiparat. Sed videndum ne ibi veriùs (ex sententiâ) morum acrimoniâ. Sic Capitolinus, in Albino: *Cum suis nunquam cenauit, vel propter vinolentiam, vel propter morum acrimoniam.* Lampridius in Alexandro:

Aulicum ministerium contraxit. ita vt annonas non dignitatem acciperent, fullones, vestitores, pictores, & pincerna, omnes castrenses ministri.

Itane Castrenses ministri cum Aulicis hîc miscentur? atque adeò pincernis & id genus iunguntur. Vide num, *gastrenses*: *μαγειρὶ καὶ τῷ γαστρί.* qui, inquam, ventris ministri sunt. Ita Ammianus libro xxv. *Hyperochum antehac rectè gastrensis ministrum, id est ventris & gutturis.* An placet *sectæ gastrensis*? sed vox compâret. In Festo est: *Mugger* dicitur à castrensiûm hominibus, quasi mucosus, qui talis malè ludit. Suspicabar & hîc, *gastrensiûm*. quid enim talis, cum castris? qui illinc, vulgò certè, exsulabant. Atqui vulgi hoc verbum. Si tamen retines; tum placeat *telis* legi: & sic dictum ioco militari, qui in cotidianis proludiis siue exercitiis tela ignauè & languidè mitteret. In Lampridij Heligabalo:

Vt ex totâ penitus vrbe atque ex nauticis monobelos quærerent. sic eos appellabant, qui viriliores videbantur.

Causam eius nominis haud assequor satis, nec nimis scrutor: sed mihi clarius esset, *onobelos*: quasi asinino telo insignes. Ita Commodus hominem habuit magnâ prominentiâ, quem *Onon* appellabat. In Capitolini M. Antonino:

Cum egrotare cœpisset, filium aduocauit, atque ab eo primùm petijt,

ut belli reliquias non contemneret, ne videretur Remp. prodere. & cum filius ei respondisset, cupere se primum sanitatem, ut vellet, permisit; petens tamen ut exspectaret paucos dies, aut simul proficisceretur.

A sententiâ corrigere admoncor, cupere se primum civitatem. Pater quidem filium Commodum hortabatur belli reliqua conficere; sed ille ad urbem adspirabat, quasi illic imperium firmandum, & sedes eius occupanda. Sed reuerà delicia & luxus eum trahebant: quod ex Hesodiano discas, quem hîc vide. Insequentibus etiam lego: *ut vnâ proficiscerentur.* Cùm vidit pater dectum ei ire; permisit, inquit, rogans tamen moram aliquam post suam mortem, ut nempe funere factò, vnam paternam & reliquias secum ferret: atque ita *vnâ proficiscerentur.* In Vulcatij Cassio:

Scis enim ipse, quòd Maiestatis hæc natura est, ut videantur vim pati, etiam quibus probatur.

Sunt verba ex ipsâ epistolâ Marci ad Verum, sed emendanda, etiam quibus parabatur: vel, *ex à quibus.* Dissuadet Marcus puniri Cassium, etsi affectati regni & (ut loquebantur) Maiestatis suspectum. Causam dat, quia ægrè persuaderetur aliis, quemquam hoc tentasse: & vim, inquit, atque iniuriam passi videntur, qui ipsi eam parabant. Hoc est, quod subiicit: *Non credi Principibus de affectatâ tyrannide, nisi interfectis.* In Capitolini Maximo & Balbino:

Maximum igitur atque Balbinum, quorum vnus in re militari tantus est, uti nobilitatem generis splendore virtutis allegerit; alter ita clarus nobilitate est, ut & morum lenitate reip. sit necessarius.

Constat Maximum istum è nobilitate non fuisse: atque ipse Capitolinus innox addidit: *Maximo pater fuit è plebe.* Itaque legendum: *ut ignobilitatem generis splendore virtutis texerit:* aut si quis mauult, *alluxerit.* In Spartiani Hadriano:

Omnibus Hispanis Tarraconem vocatis, dilectumque ioculariter (ut verba ipsa ponit Marius Maximus) detrectantibus.

Inò tota hæc res iocularis non fuit: seriò actum, & puniti mox detractantes. Scribam ego: *populariter detractantibus.* In Lampridij Alexandro:

Historicos eius temporis legant, & maximè Acholium, qui & itinera

itineræ huius Principis scripsit.

Conuenire magis censebam, *qui & intima*. Iterum in Lam-
pridij Alexandro:

Antonini nomen suscipi mereatur, Senatus Antonini mereatur.

Verius: *suscipe. Mereatur Senatus, Antonini mereantur.* Ohe, satis
hæc sunt. *μή κέποι ἐλθὲν κλονῇ*, ait Pindarus. Vale.

EPISTOLA XIX. *Leodicum.*

P. LEONARDO LESSIO, *Theol. Soc. Iesu S. D.*

FONTES & ego te expectamus. Quid venisti ut sic abires,
confortis discriminis tantum, & vix fructus? Redi cum bono
Deo, ille aderit & securitatem dabit, fortasse & sanitatem. Tur-
ba quidem hæc nunc exigua, sed crescet: & illi ipsi qui Limburgi
sunt, & vibices vinculorum adhuc gestant, illi, inquam, redeunt,
& sperant meliora. Post latrocinium recens, viæ tutiores sunt,
post tempestatem ferè serenitas: nobis, post periculum & fu-
gam, quies & securitas adsint. Principi Electori qui à consiliis
sunt, polliciti mihi tutelam, & nostri curam: nihil tamen adhuc
factum cuius fructus appareat, & in oculos incurrat. Salue mi
Pater, & tecum Smithus. Quodocunque venietis, ænulam vo-
bis paratam apud me scitote, ex legibus Spadanis, tenuem, fru-
galem, cum fame dimissuram. Spada, iv. Idus Iulij, ∞. IO. xcv.

EPISTOLA XX. *Antuerpian.*

IOH. BRANTIO, *Graphiario S. D.*

IN ipsâ tristitiâ tuâ & luctu super paternâ morte, gaudium ali-
quod mihi fuisse, non possum mi Branti negare. Non quin
dolori mihi dolor tuus fuerit, & seriò fuerit: sed quòd me-
moriam meam in illi ipso adhuc acta apud te fuerit, & binis tuis
litteris me compellaris. Benè factum, in tali sorte exprimit se a-
nimus & clarè ostendit quos habeat inclusos. Itaque hoc ipso vi-
deo valde me à te amari, quòd cogitationem & scripta etiam ad
me mittas, & tacitè solatium aliquod petas. Utinam dare pos-
sim, ut volo, mi Branti! si non pulsus dolor tuus, certè fractus
esset, & talis à quo periculum non esset viro forti. Etsi cur ego

dem? te ita cùm video, nihil opus: qui & legisti hæc omnia, quæ dici possunt & solent, & excerpta eorum quædam in epistolâ tuâ vtiliter sparsa cerno. Duo quidem sunt, quæ solari te maximè debent. & communis illa lex, quam fatuus est qui non cogitat, *DEBVISSE MORI*: & quòd indulgentiâ quâdam & benignitate diuinâ diutissimè eo fruitus es, & præter communem morem. Ad extremam ætatem parens ille tuus venerar, vidit in plerisque liberorum, quæ voluit: re coniugio, prole, officio florentem: quid ultra ei gaudij accedere potuit, imò quid non doloris? Ætas illa pessima subiecta tot incommodis, ætas hæc publica tot vitiis aut cladibus: ut nihil nisi misérias propagari illi voluerit, qui vitam. Votis, votis prosequendus est cùm abiit mi Branti, ut feliciter & ad supera illa ierit; non querelæ interponendæ, nec reuocandus ad humum & misérias humanas. Quas qui recto oculo intuetur & diiudicat, proh Deus quid in vitâ eum teneat aut iuuet? Sed fatui ita plerique & terreni sensus sumus, ut viuere tantum ut viuamus iuuet, & quia innatus aliquis metus est à solutione & morte. Tolle hunc, vitæ suauitatem sustuleris, & vereor ut plerique faciant, quod ille qui Platonis Phædone lecto properauit ad spontaneam mortem. Hæc & talia meditanda mi Branti: non dilato, quia & scire te scio, & spero usurpare. Nos Louanij iterum sumus Spadâ reduces, & parè in Barauiam reduces, ut vis fuit & insidiæ hostiles. At Deus turatus est, & velut nube me velatum ab iis texit. Vbi dixi, v. Idus Sextil. ∞. IO. xcv.

EPISTOLA XXI.

*Leodicum.*PETRO ORANO I^{ta}.

BEKEMANNVS ad vos venit, quem litteræ meæ non tam conciliant, quàm ostendunt. Vidiſſe cum & nouiſſe, amare est: ita sunt mores & ingenium adolescentis, addo & doctrinam super hanc ætatem. Doctrina autem ipsa melior politiorque est: in Iure vestro sine sordibus aut scabritie, denique & à Græcis fontibus hausta. Siue erit apud te in contubernio, siue crebro veniet, benignus ei meâ causâ esto; & tua audacter aperi, non priuati consilij solum, sed & publici. De fide, & arcani patientiâ, sponforem me cape. Filium tuum hîc erudiuit in Iuris rudimentis diligenter

diligenter & libenter : qui filius adhuc benè valet, & se gerit, spero & semper. Vale mi Orane. Louanij, prid. Kal. xbres, ∞. IO. XCV.

EPISTOLA XXII.

IOHANNI DRENCKWAIRTO, *Thesaurario supremo Regio.*

CVM ipsa liberalitas Fontani Comititis mihi grata est, tum gratior te nunciante. Quid potest benignius, à tali viro? & affectu profectò in me ostendis, quem animo aestimare magis & pendere possum, quàm sermone promere aut linguâ. Quid autè gratias tibi agam? nec veteres quidem exsolui, & iam nunc tacitus mihi morsus est, quòd pro nupero beneficio pecuniæ annumeratæ, nihil feci aut dixi, quo internam hanc gratitudinem testarer. Certè enim ea in animo est, crede Vir Amplissime; & inter omnes Belgarum proceres, tibi fateamur nos obstrictos. Age, quæ benignitas tua est, amare inò & curare (ita enim facis) me perge: non quò magis tuus fiam, quod vix potest, sed quia generosis animis ita insitum est, beneficia sua amare. Amp. & N.D. Regi & Reip. vale. Louanij, prid. Kal. Decemb. ∞. IO. XCV.

EPISTOLA XXIII.

IOHANNI DRENCKWAIRTO, *Thesaurario supremo Regio.*

QUOD iamdiu insueui, id facio; & cum auxiliij aut opis egeo, ad te recurro. Fiducia benignitatis tuæ, in me toties declarata, impellit; tum etiam, quia ista res est, quæ propriè te & tribunal tuum spectat. Nam cum *Ærario regio* mihi res est: quæ? vt id exhauriam (iocanti dabis veniam) & ego quoque inter publicas necessitates, vnà cum multis, veniam petitor. Cum multis, sed in causâ remotâ & propriâ, & vt stipendij semestris solutionem impetrem, quod Rex titulo Historiographi sui voluit me ferre acceptum. Libellum communiter ad Senatum vestrum (ita moris esse audio) concepi: sed tuâ auctoritate & gratiâ imprimis niti me fateor: ac rogo, vt pro affectu tuo veteri, Amp. & N.D. mihi consulas, & rem hanc ex tardâ aut turbidâ expeditam reddas & tranquillam. Louanij, XII. Kalend. Sept. ∞. IO. XCVI.

EPISTOLA XXIIII.

IACOBO MARCHANTIO S. D.

LIBRUM tuum & litteras vnâ accepi, etsi eundem librum aliquot iam septimanis antè à Moreto, sed ita vt ipse poposcerim: nam tenebat me (vt verum dicam) auiditas videndi. Vidi, legi, & vel publicè tibi velim dare testimonium, industriæ, prudentiæ, sed & eloquentiæ, pro historico quidem modo. Illud vellem (vt omnia dicam) diffusiores te alibi fuisse; non mihi, cui abundè hæc satis sunt, & neruosa placere solent, sed aliis, qui aut non capiunt hæc breuia, aut ad ea non excitantur. Cetera, in
 * *Censures.* re accurata & inquisita sunt; nec moueat te, siquid * *Ex Cassa* mutarunt, aut detraxerunt. Solet olim & nunc fieri, & sapientis est publicis his iudiciis suum dare. Illud doleo, nihil benignè adhuc in te factum ab iis, qui possunt & deberent, si mens & indoles illa vetus esset. Heu sæculum, non pro nostris artibus! & ego, quem tu in copiâ amicorum, circumfluere aliâ copiâ censes, in me sentio: qui nihil magnoperè è studiis meis rettuli, præter nomen & famam, & ea quoque à multis calcata. Quid faciamus quod fecimus. si rectum honestumque est ista colere, perseueremus: & præmium in illisipsis, ac fructu nostro interno, ponamus. Mihi crede, aurifer ille Tagus non nobis fluit: quidquid conetur, & spem faciat amica ibi tua proles. Quam animo complector & saluto, factu & meis verbis, cum scribes. Vale Vir Cl^{me}. Louanij, post Idus Ian. ∞. Id. xcvii.

EPISTOLA XXV.

Leodicum.

HERMANNO MALLEANO S. D.

BINAS à te accepi, fateor, sed vnis tantum postremisque respondere mihi fas sit: tum quia occupatiuncula ita suadet, tum quia in prioribus tuis nihil præter affectum in me erat, quem notum habeo, & item carum. Reponi cum pro meâ parte, semel scito. Rogas & angi te significas de valetudine meâ, præsertim in hac aëris intèperie, quæ multos in valetudinarium, multos in Charonium, apud nos quoque misit. Audi quod gaudeas,

gaudeas, satis valco, meliusculè etiam quàm solco : adeò in hac quoque re morbus meus singularis est, & extra leges communes abit. At horri quoque nostri rident & florent, sed subdolum, ut vereor : & proxima æstas funera nobis aut dabit, aut ostendet. Nam iam nunc esse arbitror, sed terra tegit & occultat. De otio tuo sic honesto & industrioso, gaudeo & gratulor. Perge in istis, nec Electa illa (sic appellare solco) omitte, segetem veram doctrinæ. Qui è variâ illâ lectione nihil colligit, seponit, disponit: nugas agit, & in acceptum pauca refert. Ordo cuique suus solet esse, nec in eâ re temerè præscribam: tuum illum serua, & minora quæ occurrent, in Alphabeti seriem distingue. Sed heus, te dubitare etiam de fato Bogardi, olim hospitis tui! ille verò vixit, & dum Bruxellæ essem, ante quatuor circiter septimanas, subito morbo extinctus est. Quid nouum? homo erat, & omnia in vna voce dicta. Te valere & viuere opto, mi Malleane. Louanii, XIII. Kal. Febr. ∞. ID. XCVII.

EPISTOLA XXVI.

Brugæ.

GVILIELMO MICHIELSIO I^{to} S. D.

SCRIPTIO tua, quâ beniuolentiam in me abundè testaris, spergrata sanè fuit: neque tarda, ut dicis. Nam scio multa interuenire in peregrinatione & itinere, ac priusquam stabilis aliqua sedes sit, quæ mentem à tali cogitatione auocent: tam mihi excusanda, quàm illud dolendum, morbum etiam inter causas fuisse. Sed benè, quòd fuisse: & meliorem firmioremque te nunc esse, eadem litteræ nunciabant. Utinam de matre tuâ eadem spes sit! quam ego vereor, uti hoc genus morbi est, ad lentam & certam mortem ire. Sed præcipe tale iam nunc animo, & illum firma atque erige in omnem euentum. Vitæ hoc salum, ut sic dicam, iam ingredi seriò incipis: pueritia & adolescentia tua lusit adhuc circa litus. Propone tibi & scito, multa falsa & amara euenturâ; sed quæ tamen voluptate aut amœnitate aliquâ summus ille Deus solet temperare. Vtraque modicè habenda sunt sapienti: hæc cum metu aliquo, illa cum spe, quia vtraque incerta, & vicibus suis mutantur. Idem in Republicâ tibi eueniet, cuius partem (& gratulor) nunc attigisti. Habeas, quæso, illam ut publicam,

publicam, & valdè nunc afflictam pro viribus erige aut solare. In cā quoque vices videbis, & Deum nunc vindicem, nunc fauorem : vt vel merita nostra sunt, aut consilia eius occulta. Itaque nec in propinquo quidem naufragio eius despera. ita homini videbitur, sed ille vno nutu attollet, qui omnia nutu suo regit. De Lernutio meo, grata quæ nuncias. amo veteri & fido affectu illum virum : & tempora si alia sint (spero, breui) ita viuam, vt ipse me, aut ego illum videbo. Vale mi Michielfi. Louanij, post. Kal. Febr. ∞. IO. XCVII.

EPISTOLA XXVII.

Coloman.

CAROLO VTENHOVIO.

EPISTOLAS crebras ad me mittis, & nouo planè genere scriptas. Nam solutis verbis cū legere me cenſeo, & ſcriptura præferat, mox verſum & vincula agnoſco : nec tamen vel primâ ſcriptione me ſefelliſti. Ita me Muſæ, Muſicum & lepidum hoc genus eſt, & quod pauci imitentur, nec niſi quibus pectus imbutum poëticâ cā copiâ, & ſtilus factus ad promendum. Mittere, mitte ſapiùs, & nos oblecta. Scribis de Pannonico bello, quod feruct, & quid mihi videatur. Mihi? quod Principes faciunt, benè factum, nec in conſilia illa inquirō. Videtur & neceſſitas fuiſſe bellandi, cū gens illa efferā ſic inſtaret, & identidem inducias ac pacta violaret. Sempërne contemni & calcari? Et tamen bellum magnum, anceps præuideo, & cum poëtâ,

Eheu quantus equis, quantus adest viris

Sudor?

imò & ſanguis : nec vno alteroq̃ue prælio res ibi decernenda. De exitu tamen benè ſperem, quia cauſſa bona eſt : & conſidam etiam, ſi Germani, qui fuerunt, ſient. Cum bonâ veniâ gentis dixerim, ab annis centum quæ mutatio, id eſt inclinatio facta? in robore, in opibus, in animis : nec dixeris eſſe vltrâ Martis illos pullos, & Homeri verbo, *θυμολίοντες*. Proſectò fuerunt. nec olim & Romano ſolū æuo ; ſed Caroli magni, atque inſrâ, perſenſerunt. Ecce, in Fridericorum, Othonum, Henricorum rebus, quàm multa egregie fortitudinis opera? Vnum in Friderici primi occurrit mirabile. Obſidebatur Tuſculi Antiſtes Coſo-

** animo
louanij.*

n: cuiſ

nienſis à triginta millibus Romanorum, qui tunc Imperatori hoſtes. Ad opem ferendam, ceteris cunctantibus, Moguntinus progreditur, & quingentos ſuos milites, cum Caſarienis oſtingentis educit. Inſtruuntur acies, ſine aſtu aut fraude palàm certatur: fuſi fugatiq̃ue Itali, & ad quindecim millia ex iis caſa. Res fide pænè maior: ſed eius æui ſcriptoribus adfirmata. Neque alibi ſimilia, ſi non paria, exempla deſunt. vt iure iactare & dicere Rudolſus Auſtriacus primus potuerit: *Se in qualibet mundi parte, cum electis quattuor paleatorum, & quadraginta peditum armatorum de Alemanniâ millibus, ſtare inuictum: aſtimans hos omnem multitudinem aggreſſuros.* En roborâ illius gentis: quid potentia & opes? paucis indiis colligendæ. Rudolſus Auſtriacus electus Imperator, cùm Aquasgrani venit, coronæ cauſſâ: occurrerunt ei Dux Bauaria, Saxonia, & alij cum viginti millibus equitum. Multitudinem aliam hominum ſtrata publica, uſque ad tria milliaria, vix commodè recipiebat. Poſteâ deinde, in Adolphi electione: equos phaleratos habuerunt Moguntinus mille quingentos, Treurenſis mille trecentos, Alberto dux mille quingentos: & vbi reliqua omnis Nobilitas vtriuſque clâſſis? Vnus Fuldenſis Abbas ſexaginta millia bellatorum Imperatori præbebat in hoſtem. Nec in hominibus tantùm, ſed in auro & argento exuberabant. Ciues Friburgenſes comiti (Rudolſo) domino ſuo, pro modicâ emendâ, viginti millia marcarum tradiderunt. Item: Ciues Columbarienſes regi Rudolſo, vno anno, librarum triginta millia tranſmiſerunt. Paullò poſt: Thuricenſes mille quingentas, Conſtantiënſes mille ducentas, Columbarienſes quingentas marcas regi Rudolſo dederunt. Columbarienſes, præter hæc, mille oſtingentas libras expenderant pro cibariis & ſeruitiis dominorum. Sed & quidam Imperatorum in pompâ & inſtrumento inſignes. De Carolo Boëmo Imperatore, Annales: *Erant omnia paramēta menſæ ſue ad comedendum & bibendum, & nauicula continens eleemoſynam illius menſæ, omnia de auro puro, nec quidquam inibi apparebat argenti: omnia autem inferiorum menſarum paramēta, etiam pro garcionibus, & currus ducens nauem continentem eleemoſynam, de argento fuerunt.* Ecce, in illius æui ſimplicitate, etiam ſplendorem, imò luxum. Omnia tamen ſuperabant Eccleſiarum opes, quæ pænè inmodicæ tunc fuerunt. Vno exemplo oſtendam. Exſtat pars Chronici veteris rerum Maguntiacarum, per Conradum Episcopum: in quo recēſentur

* Verba ipſa in M. Alberto, c. ius xxi.

* Amendâ, ſive mulctâ.

* Arca magna & receptaculū vaſorum.

templi eius vasa, vestes, ornamenta, Deus bone, cui sine stupore legenda? *Purpura, tapetia, dorsalia, palla, casula, tunica, insula, tiara, anuli, thuribula, græves, pelues, vrcei, calices, gemmae*: tantâ copiâ, pondere, pretio, varietate, vt recensere deterrear: duo tantum ex omni cumulo excerpam. *Erant calices tres aurei* (auratos omitto): qui omnes habebant suas ampullas: & pyxidem ad hostias ex auro purissimo, & margaritis. Vno calice aureo solus Pontifex, vel praelatus Ecclesie in summis festiuitatibus utebatur. Alij duo, tanta erant quantitatis, quod cum ipsis diuina mysteria nequaquam poterat celebrari. Erat enim vnus maior altero. minor habebat cum patenâ marcas auri electissimi octodecim: in cuius pede per circuitum erant pretiosi lapides valde, & in patena circuitu limbus, qui & ipse gemmis non carebat. Calix maior quot marcas auri habuerit, nescio: certum autem est, quod spissitudo eius erat digiti, & per totum, tam in pedo quàm suprà gemmis erat pretiosissimis adornatus. Habebat etiam idem calix duas ansas, quæ manus poterant implere leuantis. Huius patena talis erat latitudinis & spissitudinis, quod ipsi congruebat, & ipsa gemmis per circuitum decorata. Hic calix habebat altitudinem vnius vlnæ, & capere poterat dimidium sextarium vini: nec ab omni homine poterat leuari à terrâ. Alterum, quod eligo. inter varias Cruces, vna fuit lignea, auro optimo vestita. in quâ imago erat aurea Domini crucifixi, quæ imago cuiuslibet hominis communis magnitudinem excedebat: concava, sed multum spissa: cuius venter plenus erat reliquiis, & gemmis pretiosissimis. Dicebatur autem nec Romanum Imperium meliores habere. In huius imaginis capite, loco oculorum, erant duæ gemmae quas carbunculos vocant, tanta magnitudinis, vt duo vitelli ouorum, qui in tenebris coruscabant. Huic cruci inscriptus erat versus iste:

Auri sexcentas habet hæc crux aurea libras.

Et nota, quod vna libra habet duas marcas. Sic ergo erant mille & ducenta marca auri probatissimi. Pro speciali huius auri examinationis valore, crux ipsa proprio nomine censebatur, vocabatur autem BENNA. Ex his mi Vtenhoui, robur, potentiam, opes, velut per transennam vides: & quàm ab iis ætas hæc defecerit, quæ non nisi in vitia & luxum surgit. Quæ causâ mutationis? plures, nec lubet dicere. vnâ præcipuam à factionibus scio, quæ diuellunt iunctas olim vires: & Imperatori quid nisi precariû pænè ius & imperium manet? Sed produco, scriptionem, voto non querelâ clauden-

claudendam. — *stet Capitolium*

Fulgens, triumphalisque possit

Roma ferox dare iura Medis.

Vale. Louanij, Kal. Iuniis. ∞. Id. xcvii.

EPISTOLA XXVIII. *Mechliniam.*

IANO BERNARTIO I^{ro} S. D.

MELIVSCVLE mihi esse, aut potius minùs malè quàm fuit, hoc tibi nuncio: etsi vites aut alacritatem, quæ in ipso isto perpeti languore aliqua fuit, nondum recepi. Cùm Deo videbitur, fiet; aut eò me recipiã, quò noster Berchemius. quem virum vnicè probum & litteratum nos amisisse, fidei testimonio meo scito. Heu, quid istud est, virtutem & prudentiam omnem à nobis sic abire: vitia, arina, barbariam manere, vel augeri? Iampridem vidimus, quidquid illud est, mutationem in Europã & nobis Deum parare, & velut refingere velle hunc orbem. Sed hæc expectanda nobis scilicet, & ferenda mente, quæ fortes & peritos cælestium decet. Queri, mollitia est; reluctari, insania. Sed ad te, laudo quòd pedem figas in genere vitæ, quod Deum & fata quoque scire debes tibi imposuisse. Aliud aliquod animo magis allubescit fortasse: sed quod tibi, hoc illis quoque euenire scito, qui compotes sunt eius, quod tu petis. Ij sibi displicent, tædia & molestias suas habent, & fortassè ad tuum illud acriter anhelant. Misericordia aut insipientia nostra! nunquam desiderijs aut iudicijs quiescere, absentia petere, præsentia contemnere; & vitam semper inter vota suspensam habere. Interea illa venit, quæ ad Berchemium vênit, & bonâ fide quietos semel silentisque reddit. At tu, mi Bernarti, viue & valetuis. nam & augendum te breui aliâ prole ex famâ, an ex tuis litteris accepi? Louanij, IIII. Idus Iun. ∞. Id. xcvii.

EPISTOLA XXIX. *Bruxellam.*

OTHONI HARTIO I^{ro}.

INTELLEXI iam nunc ex litteris Marchantij de obitu Caroli filioli tui, neque nescio, ex communi parentum sensu, & tacitâ

quâdam naturæ lege, te & matrem dolere. coque manum stilo
 adinoui, vt breuiter, sed fortiter te solarer. Quem? virum vsu &
 doctrinâ, rerum humanarum peritum & gnarum. Quid igitur
 tam obuium, tam assiduum in iis, quàm iste casus? Perambula
 cogitatione vrbs tuæ domos: rara est excepta, quæ familiam
 quidein & proles habet. Comparatione illâ inuenies, benignè
 etiam tecum agi, qui non plures amiseris: & plures sanè habes,
 atque vt diu in solatium & fulcrum instantis senij habeas, Deum
 rogo. Sed enim iste cminere genio & ingenio videbatur. Credo
 equidem, & hoc ipsum est cur hîc non perennârit: quia Deus il-
 le optimus, optima ferè ad se trahit. Ad se, inquam mi Harti: &
 hoc caput alloqui, in superts beatisque locis filius tuus agit. Du-
 bitare non potes: dolere igitur non debes, gaudere potius, si ip-
 sum & bona eius amas. Atqui citò perit. Quid hoc est? aut
 quantulum istud ipsum, quod longum nobis videtur? Triginâ,
 sexaginta, centum anni, si cum volumine illo xui & cæli compa-
 rentur, quid sunt? punctistitium, & vix mereantur hoc nomen.
 Nihil hîc diuturnum: & verâ imagine tibi exprimam nostram
 vitam? Vidisti fabulas haud dubiè actitari sæpè, atque etiam à
 iuuentute in scholis. Prodeunt reges, satrapæ, alia officia, & qui-
 dam satellites, ac personæ in speciem, & mutæ. Ecce alij diutius ex
 iis hærent in scænâ, & loquuntur; alij ostendunt se tantum, &
 nec vocem edunt: simile nobis est, vario munere aut dignitate
 in theatrum hoc Vniuersi mittimur; alij silentio transimus, aut
 ostendimur tantum. Nihilotamen deterior ille, qui in vili veste,
 qui non diu hæsit, quàm ille qui regem aut longum carmen egit.
 Apud Deum vita longa non optima, sed innocentissima: & eam
 filius tuus in purâ illâ ætate habuit, & nunc gaudium & trium-
 phum. Adspicit te, & tuos, proque iis orat & vota concipit: tu
 pone luctum, & patrem exue, indue Christianum, & virum. Cui
 rei quoniam & consuetudo & alloquia amicorum aliquid fa-
 ciunt, ego & vxor vocamus amanter te & tuam ad nostros istos
 festiuos dies, & rogamus vt non negetis. Domus vobis mea pa-
 tet, & totus hic animus: venite, possidete, valete. Louanij, IIII.
 Nonas Sept. 60. IO. XCVII.

EPISTOLA XXX.

*Augustam.*MATTHAEO RADERO, *Soc. Iesu*, S. D.

ET amicitiam libens tecum iungo mi RADERE; & illi firmandæ, quod petis de Martiale, in parte effeci. Amicum me totæ Societati vestræ esse, quidni profitear? quæ prima litteris his aliusque me imbuunt, quæ salutaria in omnem vitam præcepta dedit & præiuit. Atmo hoc corpus, amo & membra: te inter isthæc, qui vel affectu tuo, vel iudicio de me, hunc affectum merebare. Etsi de iudicio, noli attollere nimis mi RADERE. ego me non vetari inter summos scio, sed inter medios incedere, paullo altior rem fortasse iis qui serpunt. Sed de Martiale quod tetigi, rem ecce habes. quid rem? pauca verba & notulas, atque eas alibi fortasse notandas. Tu facito, & Censor esto: tum etiam siquid ultra scire me putas, pete, non grauabor respondere, & certè te amare. unà etiam Pontanum, eruditum & disertum virum, collegam tuum, quem saluto. Louanij, III. Kal. x. bres. ∞. IO. XCVII.

EPISTOLA XXXI.

*Antuerpiam.*FRANCISCO SCHOTTO, *Senatori* S. D.

BONAE fidei creditum est negotium, ut video, quod tam sedulo & mature redditum est effectum. Tibi, & fratri tuo; hoc nomine debeo: & magis etiam pro affectu, quem in me ostendistis. Antuerpiam non temerè semper amaui, in quâ tam multi qui me amant. Coram hoc nupèr didici, atque abundè & largiter me vobis dedi. At tu & alij, inquis, queruntur de celeri discessu. Itane? amicè magis, quàm iuste profectò: & quæ vrbs me tamdiu tenuisset? non ipsa Bruxella, quæ patria mea esse vult, nec est tamen, nisi incolatu. Alibi natus, ibi educatus sum. Sed confidite. si proxima æstas viuum & valentem me habet, mensum totum etiam vobis dabo, & conuiuiam: sed eâ lege, ut semel in die epulemur, reliquum fabulis & sermunculis, aut etiam occupatiunculis, detur. Utinam frater tuus inter eâ ex Hispaniis adfit! quem vitum iam olim noui, & quia noui, amo. Est inter eos, qui rem non speciem in doctrinâ habent. Vale. Louanij, Non. Nouemb. ∞. IO. XCVII.

EPISTOLA XXXII.

EVERARDO POLLIONI, *J^{no}*.

LAETVM me epistola tua reddiderat mi Pollio: ecce alteram ab amico aperio & lego, atque ibi triste illud de obitu parentis tui fulmen. Scio, & in animo isto sentio, ac quasi video dolorem tuum & complorationem: eò scilicet maiorem, quo melior ille tibi parens, & tu filius ei fuisti. Non sensibus solum & animis, sed domo & contubernio hærebatis: ut si amorem natura & sanguis non inderet, posset dedisse consuetudo. O triste discidium! sed soletur te mi Pollio, breue discidium: & quamdiu scilicet hæc terra & alienum domicilium nos habebit? Viue diu, & ita voueo: sed ut viuas diutissimè, quid nisi septuaginta, aut ut improbè, centum annos? Leue & breue est, si Æuum respicis, quod fluxit ab æterno & fluet. O miseris, ô vanas cogitationes nostras & curas! congerimus, ædificamus, libros scribimus, & eternitatem nobis quacumque viâ spondemus aut optamus. Quid tamen aut quantula ista sunt? quamdiu etiam sunt? non loquar de opibus aut ædificiis, quæ statim æuo aut casu pereunt: ipsa illa Fama, bonorum ingeniorum morbus, quousque se producit? Aliquid de Cicerone hodie aut Senecâ: id ipsum variè, inter culpas & laudes: sed quot anni sunt? vix mille quingenti, aut paullo ultra. Caput ipsum ingeniorum Homerus, nomen vindicat & possidet, à bis mille quingentis & paullo amplius annis. Enimverò quid hoc est? trigesimâ aut quadragessimâ stirpe potui cum attingere, & vide quid longum aut diuturnum vocemus. Cogitatio ista sæpè me & solata est, & crexit ad contemptum aut calcationem potius rerum fugacium, id est humanarum. Consolatio altera, à communi omnibus lege. Rideamus, Tiquis cum tributa populariter danda sunt, lamentetur, & sortem suam accuset. quid ita? quia omnes cum dant, non superbè solum sed stultè facit, qui se vult eximium aut exsortem. In hoc humani generis tributo cur non sic affecti sumus? cur fatuâ mollitie querelam & planctum miscemus? Hoc ipso quod homo natus es, mori natus es: & siquid ultra punctum, horam, diem, annum viuis, donum est non debitum, & in gratiâ ac lucro ponas.

ponas. At nos obliuiscimur, aut non attendimus, & in tot mor-
tibus quæ cottidie occurrunt aut ingeruntur, vna aut altera nos
mouet & deiicit, quæ nos tangit. Alij si percant, nihil noui aut
mali est: si nostri, ô nos miseros, ô infelices! Verba aut inuen-
tiunculæ non desunt, cur iniuria sit facta, cur Parca maligna
fuerit: & vides sæpè ac rides, credo, in hac re scenam vulgi. Stul-
ti, bis stulti, quod sumus cogitemus, & non magis miremur ho-
minem subitò, quàm florem mori. At tertio, diuina cogitemus.
Ad meliora eundem est, ad puriora, lætiora, prauis, turbidis, tri-
stibus his relictis. Si ad ea te aptasti, & viaticum (vt sic dicam.)
corrogasti virtutum & pietatis, quid malè te habet abire, aut a-
lium abiisse? Gratare, si sapis ô homo, plausu & cantu prosequere,
qui non diu in salo iactatus peruénit ad beatum portum. Plu-
ra sunt, quæ tu tibi mi Pollio dices. Ego ex animo in dolore tuo
doleo, quem aliquem esse & cupio, & par est (neque enim homi-
nem exuimus) sed temperatum nec longum esse, hoc suadeo &
opto. Tu inquam tibi dices. quidni hoc sperem, qui mihi sic
lubenti prædicas studium tuum sapientiæ & quietis? Exoscula-
tus sum eam vocem. tu re effice, & nostri miserere qui volentes
& adspirantes ægrè huc venimus. Scripta nostra vides multum
(ingenuè fateor) à vano trahentia: ô si meo iudicio & voto illa
sint, quàm alia & diuersa sint? Verbum aut calami ductum non
perdam in illis, quæ ad solam fortassè scientiam faciunt: occupet
in istis, quæ ducunt ad duo dicta. Sapientia, inquam, me sibi
mancipet, Quies interna & externa (si possit) habeat: sibi alij
famam, honores, opes, cetera humana. Vt claudam, amo te mi
Pollio in intimo isto pectore, & opus te meum esse (ita profiteris)
non admitto solùm, sed gaudens sub signo. Perge, perge in viâ
quam pauci calcant, sed Deo & pietate ducibus, & per inteme-
rata vestigia maiorum. Louanij, Nonis xbris. ∞. 15. XCVII.
Nam tuas litteras satis serò accepi, & heri demum.

EPISTOLA XXXIII.

Lutetiam.

GVILIELMO BARCLAYO S. D.

AT tu files. vbi promissa de Iliade aut Chiliade ad vnâ
lineam nostram? Expostulo. eò magis, quia materies illæ
scribendi,

scribendi & seges, quam defectam referas in horrea nostra. Ab aliis de te cur audio, quæ non à te audio? Morfus & versiculos in doctores aduenas vidi, nec sine stricturâ nominis mei. Parum est. tu modò rectus perge, nec deiicere, sed nec deflecte aut siste ad repugnandum. Monui antea, & iterò: modestia est, quæ te gratiosum exteris, quæ magnum etiam faciat & seruet. Ad contentiones si venit, clades erunt, & Thebana aliqua pugna, in quâ victi victoresque plorent. Miseri homines, cur eò inclinamus? malitia est: vince, & quam dixi modestiam & frigus, ac me, ama. Louanij, ∞. IO. XCVIII.

EPISTOLA XXXIIII. *Augustam.*IACOBO PONTANO, *Soc. Jesu.*

IN summo hoc frigore, cuius ego quidem impatientissimus sum, calfecit me tamen amica tua scriptio mi Pontane: & excitauit non ad scribendum solùm, sed ad redamandum. An non talem virum? inclino iam diu, & ipse quod tu voluisti volui, ex quo scripta tua prima vidi: quod fuit Augustæ Treuitorum, ex dono & beneficio Principum Bauariæ, quos transiens ante septennium illîc salutauî. Ab eo tempore, credes mihi hoc Pontane, & memoria tui inhæsit & probatio: atque ideò facile accendere hanc materiam, igni sic paratam. Quæ tu porrò in me nimis benigno corde & ore laudas, scito pauciora omnia esse: dare tamen operam vt sint, imprimis Modestia & Probitas, quas ego æsumo & tollo super nomen omne litterarum. O institutionem vestram olim mihi vtilem! inhæret ea & inhæsit, atque illa Pallas fuit, quæ inter tempestates, imò naufragia, seruauit hunc Vlyssæm. Eadem iudicium & sensum istum ad virtutes formauit: quas vtinam sic indipisci, vt sequi, detur! sed conandum est, & Deus manum dabit. Is te mi Pontane seruet, & inter nos mutuum hunc amorem. Louanij, x. Kal. Feb. ∞. IO. XCVIII.

EPISTOLA XXXV. *Luætiæ.*STEPHANO TVRNEBO *Senatori S. D.*

TRISTE mihi auditu fuit, de Hadriani fratris tui morte, triste: & pænè sic, quasi alterum illum, tuum & Musarum parentem, iterum amisissimus. Nam & amicitia iam inter nos vetus satis, & certè fida, coaluerat: & raritas ibi nunc talium, à clade istà funesti belli. Solatur tamen, quòd & malis temporibus optimus ille subductus sit, & ne in virtutum & artium bonarum isto naufragio diutius iactaretur: solatur, quòd & tu in locum & vicem eius sic ultro venis, germanus Turnebi sanguis. Veni, parent animi huius fores, & affectui tuo velut brachia pando & occurro. Sicut agricola in locum amissæ arboris aliam subserit: sic nos in amicis oportet. Equidem & corporis huius oculis usurpare te, atque alios insignes ibi viros, aueam: & spesne est, ut vel obiter fiat? Aliqua, cum pacem hanc video: maior, si valetudinem non videam, inclinantem & de ruinâ (cur dissimulem?) minantem. Sed siue viuo aut morior, vestri amans viuum moriarque: ut tu mei, per parentis, & nunc fratris, magnos inanes precor. Louanij, postrid. Kal. Sextil. ∞. Id. xcviii.

EPISTOLA XXXVI. *Antuerpiam.*IOANNI MORETO, *Typographo celeberrimo.*

BRUXELLÆ fuimus, ADMIRANDA obtulimus, grati fuimus: quid ultra? inquires. Hoc satis: & cultum hunc atque alium Principibus debemus; & iamdiu imbibi bonum, quia bonum, amare. Externa ab his internis expetere aut expectare, inscitia sit: & cum alio æuo hæc fuerunt. Qui nunc, inquam, hæc quærit; audacter ei edico abiicere

Hæc studia, atque omnes delicias animi.

Recudere te autem ADMIRANDA nostra, mihi gratum sit, priusquam alibi alij. Factum in quibusdam meis in Italiâ aut Galliâ: & indignor, aut si non licet, doleo. quia & perperam multa; & mihi ipsi præripiunt castigare quædam, aut recedere. Quid? polita omnia, & sub ascia, ut sic dicam, à nobis dedicata? Non

E E c hercules.

hercules. neque ita me *ludit amabilis insania*: neq; sum ille vbique

Candidus, & talos à vertice pulcher ad imos.

Natui alibi, nodi, laxa quædam aut manca: & præoptem eluere, dissoluere, adstringere, adimplere. Nescio enim quomodo facilius hæc diiudico & arbitror, nitidè excusa à vobis, quàm confusè à me scripta. non enim exscripta: & primam ferè manum nostram semper habes. At isti properi impediunt: calumniæ aut petitioni me exponunt. Nosti hodiernum ^{τὸ φιλανθρωπικόν} & quàm multi, qui legunt hoc tantum, vt carpant? scire abnuunt, & sumunt iudicare.

cupidum
reprehendit.

— *hic nigra succus lolliginis, hæc est*

Ærugo mera.

Iam nunc expertus in quodam altioris ordinis, qui luminibus meis ædificio suo sublimi obstruxit scilicet, & titulum mihi ereptum inscripsit. Faciat ipse, aut alij: quid lædunt? non me quidem. sed vt Sarpedon ille apud Homerum, hastâ petens Patroclum, equum eius iugalem interfecit: sic isti non me tangunt, fortasse impetum & velut ardorem illum animi prosternunt, quo ad honesta vehebamur. Etsi nec istum, & melior mentis ignis suscitatur, siquid soporis infuderunt. Sed abeant hæc, & valeant: ego vt istud, ad vos adspiro. Quando? quàm maturimè potero. nam etsi domi etiam nunc vincula, nec aperti carceres;

— *tamen istuc mens animusque*

Fert, & amat spatiis obstantia rumpere claustra.

Semper ego non apud vos solum hilarior, sed à vobis melior redeo: gratia amicis & tibi, qui sic comiter habetis. Tibi, cuius domo, cuius mensâ vtor, pascor: an non hereditarium tibi onus? Nam cum Plantino, heu illo nostro, tessera hæc mihi sancti hospitij: cum vxore post illum: & te liberem, vtriusque heredem? Amice, ego tanquam polypus hæreo: per antiquum emitte, per posticum insinuabo. Rides. & veni securus ab hoc metu, inquires. Scio, veniam: & fors sit scriptorum aliquid mecum. Vale, cum tuâ carâ & caris, quos saluto. Louanij, VIII. Kal. Octob.

10. IO. XCVIII.

EPISTOLA XXXVII.

IOANNI BRANTIO, *Graphiario S. D. Antuerpian.*

SOCERVM tuum libens vidi, mi Branti, virum prudentem, probum, patriæ amantem. Cuiusmodi paucos hodie habemus: & multi res suas agunt & augent, communium prætextu. Enimverò, spes sub nouo hoc Principe & statu noua ac melior nos respicit: si tamen & pax ab Angliâ affulget. Si non illa, & Bataui item pertendunt: quam Salutis arcem vides? At sunt qui etiam de Regis nostri fato, sanè importuno (si ita est) narrant. Id verò fuerit omnibus consiliis nostris, si non turbandis, certè tardandis. Deus adiuua, & miseros Belgas tandem solatij aliquâ aurâ adspira. De Orteliano Epitaphio, tecum volo: sed languor meus mentem aut stilum vix erigit: & occupor, si vnquam. omninò tempore mihi opus, vt semel & opportunè fiat. Vale mi Branti. Louanij, VII. Idus Septembr. ∞. IO. XCVIII.

EPISTOLA XXXVIII.

IOANNI DRENCKWAIRTO, *Theſaurario.*

VENIT ad me Balduinus tuus, planè meus futurus, quia tuus. Nec aliâ commendatione est opus. In studiis eius dirigendis prima nunc cura erit: & placuit valdè iudicium tuum de Græcis. Profectò, vt hodie iudicia sunt & exacta eruditio, nemo in aliquâ classe, qui linguâ eâ non sit saltem tinctus. Et vsum etiam suum, immò dixerim necessitatem, in omni ferè scientiarum genere habet. Itaque discet: sed non apud alium, quàm me præceptorem. nam domi exercitia, & quasi gymnasium eius linguæ habemus. De Philosophicis, mihi satis videbatur eum ad disputationes sæpè ire, quæ publicè in Collegiis habentur: atque ea optima ratio est & repetendi, & examinandi. Superest Iuris studium, quò credo eum destinari. & putem satis esse primo hoc anno, si Institutiones audiat, nec longiùs in illud pelagus se mittat. Nam stilus, & eloquentia etiam aliqua assumenda sunt, atque vtilissimæ huic in omnem vitam parti dandæ sũt partes. Hæc ita faciemus, nisi ipse aliquid mutas: & paullatim ac per gradus optimam indolem (ita mihi videtur) ducemus ad opti-

tima, & scientiarum laudatum illud culmen. Deum precor, ut
adspiret: eundem ut te, Ampliss^{me} & Nob^{me} Domine, Princi-
pibus, & rebus nostris diutissimè incolumem seruet. Louanij,
VIII. Kal. Feb. ∞. IO. XCIX.

EPISTOLA XXXIX.

HVBERTO AVDEIANTIO.

IN domum meam cùm venturus sis (ita vterque volumus:)
quid præcipui muneris tui futurum, non ignoras. Prædixi. à
manu, lectione, & studiis mihi eris: alius functionis, quæ ab in-
genio aut instituto tuo discordet, immunis. In excipiendo autem
aut describendo, dixi Orthographiam aliquam nostram sequi &
scire te debere: sed & vsum Distinctionum, qui nobis frequen-
tatur. De istis hauebas discere: & quanquam ad quædam in
publico Dictata te remitterem, tamen ecce ipse operam hanc tibi
iterùm subiij, & scripto complexus sum quidquid huius rei, pro
meo sensu, esset. Lege, sequere & vsurpa. *Distinctio duplex, Ser-
monis & Scripti. Illa, quam in pronunciando adhibemus, & per inter-
ualla sustinemus, suspendimus, aut deponimus sermonem.* Comina sus-
tinet, Colon suspendit, Periodus deponit. *Hæc virtus Distinguen-
di* (ait Fabius) *fortassè sit parua, sine quâ tamen esse alia nulla in-
agendo potest.* En momentum, quod in Sermone habet: quid si
maius etiam in Scripto dicam? Nam hercules confusa tota le-
ctio & intellectio, nisi notæ suæ diuidant & quasi inanuducant.
Quid igitur ea est? *Notandi certa ratio, quâ secamus & partimur
scriptionem.* Ea quæ veteribus fuerit, quærunt: ego amplius, an
fuerit, quæro. Nam prisca omnia monumenta, lapides, tabulæ,
æra legum aut orationum: in quibus omnimoda adhiberi ea
potuit: nullam præferunt aut habent. Nisi hanc tamen, quâ sin-
gula verba punctis suis disparant & secernunt: sed punctis vniuf-
modi semper & pari formâ. Quæ res, ut verum fatear, turbet
magis & sistat lectorem, quàm transferat & adiutet. Quod de
lapidibus dico, ad libros etiam priscos traho: nec in iis Distin-
ctionum illæ variantes notæ. Ut alios omittam, exstant nobiles
illæ Pandectæ Etruscæ, à Iustiniani æuo: quære, non dabunt.
Quid ergo? ante Iustiniani æuum non fuerunt? mox videbo:
sed

sed tamen antiquitus omnino, haud puto. Atqui Cicero & alij videntur agnouisse. vt Crassus apud eum loquens inducitur: *Non librariorum notis, sed verborum & sententiarum modo, interpunctas clausulas in orationibus veteres esse voluerunt.* En notas à libraris, & quidem in clausulis, & gratiâ interpungendi. Idem pro Murænâ, in Iuriconsultos illudens: *eos in singulis litteris, & interpunctionibus verborum occupari.* Significat sensum mutari, & cautionem vel cauillum esse, ex interpunctis. Quid Seneca, nonne clarè? Nos, inquit, etiam cum scribimus, interpungere solemus. Ecce interpuncta, & quidem sollemnia in scribendo. Hæc sistant, aut viâ illâ sententiæ eiciant: sed nescio an prouidum & sagacem. Nam prior Tullij locus possit planissimè altrouorsû duci, quasi dicat Veteres ideò non usurpasse in clausulis interpuncta, ne ea potius, quàm modum & modulum, in verbis, considerarent. Locus alter, dicat Iuris interpretes in minutis occupari, scrutari in contractibus apices litterarum, & puncta verborum: quia nempe ambigua sæpe hæc ista, & ad anteriora aut sequentia ducenda. Id enim eueniebat in illis solitariis punctis, quæ verba, vt dixi, singula, non membra aut sensus secernebant. In Senecâ hæreo. & an dicit, spiritum stilumque hominis naturaliter etiam pausare in scribendo, & interquiescere cum sententiâ: non rapidè semper, & torrentis vicem, ferri? Profectò dicit: vide. Nam tota eius dissertatio est, contra præcipites illos & effusos in loquendo, & cursu verba conuoluentes. Quando igitur origo? nam res tam utilis, & quod caput, tam obuia, ad quam Natura ipsa ducit, non debuit, non potuit diu quæri. Dicat aliquis sub Hadriano cœpisse. quia in Suidâ lego de Nicanore quodam Grammatico eius æui, scripsisse *περὶ σημείων τῶ καὶ πόλιν βιβλίων ἕξ*: De Interpunctione in genere libros sex: itemque partitè, *περὶ σημείων τῶ παρ' ὁμήρου, καὶ τῶ ὁμήρου καλλιμάχου*: De interpunctione apud Homerum, & apud Callimachum: neq. aliud egit aut scripsit, ita vt per iocū *σημεῖα*, Interpunctus aut Compunctus (seruile conuiciū est) vocaretur. Potuit igitur tunc agitari de inducendâ, etsi nondum vulgò inductâ. Certissima, quam reperio, mentio est in Diomede Grammatico: qui *appositionem puncti* (ita loquitur) in triplici differentiâ agnoscit. Differentia est, quæ clariùs apud Cassiodorum sic expressa: *Sed vt his omnibus addere videaris ornatū, Posituras quas Graci θροῖς νο-*

111. De Otal.

In Nica-
112.Lib. 13. cap.
De Proui-
cia.Lib. 1. ser-
sit, Dini-
nar. Lecl:

cant, id est puncta brevissima pariter & rotunda, & planissima, singulis quibusque pone Capitibus, præter translationem sancti Hieronymi, quæ colis & commatibus ornata consistit. quoniam illustrem faciunt orationem, quando suis locis aptata resplendent. Nam si corpus nostrum indiget per membra cognosci, cur lectio, cum suis partibus videatur esse distincta, confusa relinquitur? Iste quidem Positura seu Puncta, quasi quedam via sunt sensuum, & lumina dictionum, quæ sic lectores dociles faciunt, tanquam si clarissimis expositoribus imbuantur. Prima est, Media, secunda, Subdistinctio, tertia, Plena. Quas à maioribus nostris idè constat inuentas, ut spiritus longâ dictione fatigatus, vires suas, per spatia decreta (siue discreta) resumeret. Quas si maioris cupidus lector agnoscere, Donatum lege, qui te possit de hac re, brevi compendio instruere. Pleraque omnia hîc habes: Nomen, Vsum, Discrimen.

I. lib. I. cap.
XIX.

Nam veteres Posituras vocarunt: atque ita Isidorus. Positura, inquit, est figura ad distinguendos sensus per Cola, & Commata, & Periodos. dicta, vel quia punctis positis annotantur, vel quia ibi vox, pro intervallo distinctionis, deponitur. Ex nomine novitio (hoc quidem sensu) vides rem non esse perantiquam. Addit Vsum, qui liquet. Discrimen deinde, triplicem eam esse, Mediam, Subdistinctionem, Plenam. Isidorus autem ita: Sunt tres Positurae. Prima Subdistinctio dicitur: eadem & Comma: Media distinctio sequens est: ipsa & Colon. Ultima distinctio, quæ totam sententiam claudit: ipsa est Periodus. Talia Diomedes: & consentiunt etiam in Notis, quæ, Isidori verbis, sunt istæ. Vbi in initio pronuntiationis necdum plena pars sensus est, fit Comma: Punctusque ad imam litteram ponitur. & vocatur Subdistinctio, ab eo quod Punctum subtus, id est ad imam litteram accipit. Vbi autem in sequentibus iam sententia sensum præstat, sed adhuc aliquid superest, fit Colon, mediamque litteram puncto notamus: & Mediam distinctionem vocamus, quia Punctum ad mediam litteram ponimus. Vbi verò iam per gradus plenam sententiæ clausulam facimus, fit Periodus: Punctumque ad caput litteræ ponimus, & vocatur Distinctio. Vbi vides aliam à nostrâ Distinctionem fuisse, quod ad notandi posituram aut signum. Nam idem Punctum manebat, sed locis variabat. In fine Cassiodorus remittit ad Donatû: & sunt eadem ista etiam hodie in illo mutilo & fracto. quid opus verba reddere? Nos variasse isto ævo, nō ignoras. & viros doctos plenius paulo distinxisse, in Comma, Semicolon, Colon, Periodum. Comma, vbi minima

minima respiratio est, & semicirculo notamus, . Semicolon, vbi paullo maior, nec ad Colon tamen accedit, notamusque; . quod locum sæpè habet in *Contrariis*, aut *Disiunctis*, aut variâ *Partitione*. Colon autem, sententiâ in parte perfectâ, sed etiam crescente, & signamus duo puncta: At *Periodi* nota est punctum, longæ siue breuis. Nam & breues *Periodi* sunt (in epistolis creberrimè) quasi membra: & hæc ipsa Punctus signet: sed cum discrimine, vt grandiore capitali litterâ non excipiatur. Ista de Distinctione veteri, & nostrâ, sed in vnâ *Periodo* aut sensu. Est alia, quæ veterum fuit, nunc desuit, meo voto reuocanda. Per versus libros diuidebant, & curiosè librarij subnotabant: quod vetus esse, & ab Asconij, id est Claudij æuo, apparet. Nam is in *Commentariis*, verba Ciceronis cum citat & aduocat: *Versu*, inquit, à primo DCCCL. Item: *Versu circiter* ∞. XI. iterumque: *Circa versus* à primo LXXX. Versus appellat. vt & Græci *εἰς* *χρον*. Nam ita Diogenes de Aristotele: *Libros eius omnes* continete *μυριαδας εἰς* *χρον* *τίτταες* *ἢ* *τετραράκοντα*, *πρὸς τοῖς πεντακισχίλοις* *ἢ* *δρακοσίοις* *ἑξομήκοντα*: *quadringenta quadragintaquinque millia versusum, itemq. ducentos septuaginta*. Item de Chrysippo, qui *πολυγραφώτατος* fuit, *in diem scripsisse versus quingentos*. Plinius de Zoïōastre: *vicies centū ab eo millia versusum condita*. Galenus, *Lyci cuiusdam commentarium se legisse, aded prolixum, vt quinque millia versusum contineret*. In Diuo Hieronymo, epistola ad Magnum, oratorem Rom. *Scripserunt contra nos Celsus atque Porphyrius: priori Origenes, alteri Methodius responderunt. Quorum Origenes octo scripsit libros, Methodius vsque ad decem millia procedit versusum*. Iterum ad Damasum, Episcopum Rom. *Quos mihi iam pridem dederas Lactantiū libros, ideo non libenter lego, quia & plurimæ epistolæ in eis vsque ad mille spatia versusum tenduntur*. Denique Iustinianus in *Pandectis* suis *quindecim myriades versusum esse*. Ex quibus omnibus liqueat, certâ & perpetuam distinctionem in Versus fuisse, in omni volumine & descriptione reperiendam. Sed fueruntne igitur veri Versus, siue linear? Hæremus. si fuissent; quomodo in membranâ aliâ atque aliâ sic caderent? quomodo in litterâ maiore aut minore, vt solet? Nisi quis putat aut variasse per libros: aut certos modulos cuique volumini tributos, quos velut lege seruarent. Tale aliquid Isidorus: *Quedam nomina librorum apud antiquos certis modulis conficie-*

bantur. breuiore formâ Carmina atque Epistole, at verò Historia maiore modulo scribebantur. An satis huc faciat aut firmet, nescio: pos-
 sit tamen aliquis & Versus explicare membra minuta, & sectio-
 nes sic institutas. Hieronymum auctorem habeat, qui alibi Pro-
 phetas versibus descriptos à se fatetur: & communiter de libris Sa-
 cris, *Silvan nominum, sensuumque barbariem per cola versuum digessisse*. Neque aliud sanè vult, quàm quod Cassiodorus: *Primum D. Hieronymum, propter simplicitatem fratrum, colis & commatibus ordinasse translationem suam*. Et idem alibi: *Translatio sancti Hieronymi colis & commatibus ornata consistit*. Ergo idem isti Versus (Hieronymo quidem) quod Cola & Commata: & quid autem ista? nil nisi Membra, & Sectiones. Nam sic hodieque Biblia illa Sacra vtiliter legimus distincta, & ipsi Versus appellamus. Notat autem idem sanctus scriptor, exemplo prisco se hoc fecisse: *quia idem*, inquit, *in Demosthene & Tullio fieri solet, ut per cola scribantur & commata*. Caue acceperis de Interpunctis, eo nomine: fallèris. quod dixi intellegunt: & ita Demetrius definit, *Colon, aut simplicem periodum, aut còpositæ periodî partem*. Ita Cicero Commata sententias accisas & breuiiores, sed plenas: ita & Hermogenes genus tale sermonis, κομματα καὶ διστακτικὰ appellat. Hæc igitur fuisse videntur. si non; vt nunc sint, & exemplum illud Hieronymianum vsurpetur, consilium meum sit & votum. Valdè ex vsu lectorum, & eorum qui excerptum aut subnotatum aliquid volunt, hoc esset. cùm ecce Liuium, Ciceronem, tales, non nisi per libros aut orationes diuisos habemus: & longum nec promptum in totis iis aliquid quærere; facile & obuium, si Versus designarent. Industrius aliquis vir facere debeat, & Typographi imitari. Vale, & ad nos quàm maturrimè veni.

EPISTOLA XL

Vltraiectum.

HADRIANO VANDER-BURCHIO S. D.

OSCVLA tua & OCULOS accepi, & FVNERA mox & TRISTIA, quæ decorè subiunxisti. Æterna ita lex est, vt hæc in vitâ & vsu temperentur: benè ergo & in Carmine, quod imaginem illius habet. Grata fuerunt, vitâ re minùs, quòd missionem eam excusandam putasti. Apud mène? qui semper talibus de-
 lector,

lector, vel pascor veriùs : & certè non sèpè nunc, vt æuum est, ingeruntur hæc mella. Ferox ille Mars, qui regnum possidet, animis ferociam & duritiam inserit, & abducit ab omni cùm humanitate, tum humaniorum artium cultu. Patiàmur, quæ non mutamus. At de EPISTOLIS incis, etiàmne illic vobis visæ? & tibi placuisse significas : non aliis fortasse, si qui alieni sunt à nobis. Vtinam religionis illa caussa, id est res capitalis, vos nō diuidat! cetera dissimulari possint, etsi non probari. Quando autè emendari? leuis & frigida spes, si homines video; si Deum, magna. Vtinam nos modò emendemur, &

Per nostrum liceat scelus

Iracunda Iouem ponere fulmina!

Sed de EPISTOLIS, alias paramus : neque temerè tamen vos amicos immiscemus, ne beniuolentiæ specie noceamus. Vale V. Cl. & fratrem tuum V. R. Decanum saluta. Louanij, VIII. Kal. Maijas, statim vt tuas accepi.

EPISTOLA XLI.

Bruxellam.

IO. CAROLO ÆNOBARBO, V. N. S. D.

SERIVS omninò epistolam tuam accepi, non amoris solùm, sed curæ de me plenam. Cùm enim Antuerpiæ fuissèm, itemque dies aliquot Bruxellæ vestræ; ecce reuerso demùm epistola ea mihi reddita, cui alioquin animus & ratio erat vel statim respondere. Hoc igitur excuso, & ad rem nunc ipsam pergo. Ais te audisse de itinere meo in Italiam, & parùm probare significas, imò libero & aperto ore (hoc quoque amici) dissuades. Vt tibi totum sensum meum aperiam, diffundam me paullùm, & in hoc chartaceo æquore exspatiabor, te, vt spero, fauente aut certè non sistente. Igitur de migratione aut mutatione aliquâ consilij aut status, hoc in primis cogitare te deprecor : neque est tale aut fuit, & in istâ præsentimèa cōditione & patriâ acquiesco. Quid enim alibi quæram aut spectem? Opes? modicæ obuenerunt, sed quas animus iste (audacter dicam) magnas facit, in minoribus etiam magnus. Fines mihi habendi iamdiu posui, & quod naturæ satis est, etiam cupiditati. Sed mihi vltà obuēnit, & ad morem etiam vivere possum, non solùm ad naturam. Ergo ab eâ parte

FFf

nulla

nulla causa migrandi aut innouandi. An ambitio fortasse impellit? & famam nouam apud nouas gentes querimus? Liberè dixerim; adesse eam super vota, non solum super merita: & vnum illud mihi curæ esse, non vt augeam, sed vt coërceam, ne in vana aut ventosa effundar. Itaque ab vtrouis isto telo an stimulo non impellor: quæ autem vera causa consilij mei, candidè & simpliciter audi. Annus Sæcularis ille facer instat, qui ex omni terrarum orbe Christo sacratos homines ad se euocat: ecce inter illos ego sum: cur non fas obire & frui hunc Pietatis fructum? Ego verò fecero, cò iustius promptiusque, quòd onera domi non sint, quæ remorentur aut sistant. Nulla iuencula vxor, quæ humentibus oculis abeuntem detineat; nulli parui liberi, qui collo se innectant & ingeminent parentem. Pietatis hoc studium liberum est: & propior aut iustior nulla ratio, quæ sistat. At causa etiam altera, Valetudo. Tredecim amplius annos in tristi eâ sum & aduersâ; vitam nec vitalem, vt sic dicam, viuo; & traho magis spiritum, quàm duco. Quis ille baro mihi inuideat aut obiiciat, si refouere eam vel instaurare peregrinatiunculâ tentem? At enim tenue aut infirmum mihi corpus, nec par molestiis. Agnosco, sed hoc quoque vsu didici, illud ipsum assurgere & excitari per viâ & motum. Meliùs notabiliter habere solco, cùm ambulo: & ideo iure hanc veniam peto, vt ij qui viuere me volunt, patiâtur transferri & moueri. Denique causa tertia, viri Principes qui inuiant. Humanitatis est iis se dare, & animum flectere ad desideria aut impèria illorum. At, inquires, illi ipsi te illigabunt & sistent, & hoc amicos tuos angit. Audio, fateor, ab alijs metus similis: & timere me aliquid inducat communis hic timor. Cum tamen oculos ad me & hoc animi decretum reflexi, ridere magis subit, quàm vereri. Egone vt in hac ætate, & quod caput est in hoc languore, ad sedes me dem & spes nouas? Iamdiu in ipsâ patriâ meâ rudem exsisto, & mereri me autumo: transibo, & includi me patiar. In nouum ludum? Non faciam mi Ænobarbe: apud me, apud meos maneo: & nisi Fatum aut Vis interceptiunt, intra paucos menses Belgis me reponam. Deum rogo, vt ita sit: te autem, vt hanc esse mentem meam credas, quam ipsam tibi aperui, remoto omni simulationum velo. Vale Vir Nobilis & Cl^{me}. Louanij, viii. Kal. Iul. ∞. Id. xcix.

EPISTOLA XLII.

IOANNI DRENCWAIRTO, *Theſaurario.*

SICVT inter primos conſilij mei de peregrinatione Italicâ certioreſſimè te feci : ita nunc debeo de impedimentâ, aut ſuſpenſâ. Litteras ex Italiâ nudiuſtertiſſimè accepi, quibus ſignificant & peſtem in aditu atque ore Italiæ ſæuire incipere, & metum eſſe ne in reliquum corpus petuadat. Imò iam in Ferrarienſi tractu initia etiam eſſe. Itaque addunt deliberari Romæ, an ſacer annus in alterum ſequentemque non ſit prorogandus. Hæc cauſſa iuſtiſſimè facit, vt tardem in hoc itinere, & in Veris ſaltem tempus protollam, aut & totum omittam. Nam cur apud te diſſimulem? Animus auct & impellit peregrinari, ſed corpus ſeuſui huius imbecillitas & pertinax inualetudo, cum ad iudicium redij, diſſuadent. Ergo de cognato tuo nihil vltrâ, nunc quidem, cogitandum. maneat, ſtudeat, ad metam ſuam eat. Quod cum bono Deo facturum eum ſpero: vtinam hos publicè ad optatam illam metam Pacis ! nec deſpero in Principum aduentu. Ampl. & Nob^{re} Domine, Deus te Reip. & Principibus, ſed & nobis, ætatem ſeruet. Louanij, VIII. Kal. Sextil. ∞. 15. XCIX.

EPISTOLA XLIII.

Antuerpian.

PETRO LAFAILLIO, CAROLI F.

EPISTOLAM perbenignam à te accepi, inopinatam, & ideo magis gratam, quia iuuat tales habere qui ament, cupiant, iuuent. Nam nec hoc poſtremum abnuerim, vbi opus ſit aut opportunitas : ac fuiſſet ſanè in Italico noſtro itinere, ſi id pertendiſſemus. Sed quæ interuenerint, audiſti. Omitto meam inualetudinem ſic affectam, vt medici pro ſano me non facturum putent, ſi ſuſcepiſſem : omitto inquam, & animus potuiſſet corpori imperare & vincere: ſed publicæ illi cauſſæ ſunt, quæ me quidem iuſtè videntur vel tardare vel arcere. Quidni, cum illi ipſi deliberent & cunctentur, qui me vocant? In hæc ætate aliquid calidè aut temerè à me fieri indecorum ſit, nec veniam habeat quam in iuuentute. Itaque differo aut ſuperſedeo; haud li-

bens, sed fatis, id est, Deo didici parère. Tibi autem gratias debeo, & semper in animo habebō, pro hac beniuolâ oblatione hospitij in domo tuâ Veronæ: quam urbem certum mihi erat videre, & suâ elegantia celebrem, & memoriâ antiquâ. Quod reponam, nunc non habeo, præter animum: quem scito & tibi addictum proutinquit esse, atque etiam tuis. Inter eos Petro Scholerio, cognato tuo: cui factum volo, & faciam ubi occasio erit. Re hoc malo ostensum, quàm verbis dictum. Vale Vir ornatissime, & cum tuâ tuisque salue. Louanij, ix. Kal. Sextil. ∞. Id. xcix.

EPISTOLA XLIIII. *Antuerpiam.*

IO. WOUERIO suo S. D.

HABES hesternas meas, quid istis opus erat? in unâ modore, quam memoria tunc mihi subduxit. Buytevechianæ epistolæ exemplar Micaultianæ iniiciendum erat: quia scis quàm res eum tangat. Itaque neglectum à me, fieri per te rogo. Amplius, ferre te hanc mutationem consilij, & in eâ philosophari circa spes aut cupidines coercendas. Numquam indulgendum nimis esse. sed ut ij qui in procliui sunt, sese & equos sistunt: sic in optabilibus & lætis faciendum, ad quæ animus sponte fertur. Vis cogitare Deum aliquem moderatorem vitæ & actionum esse? illum amantem & curantem nostri? Impediuit, disturbauit: ergo noluit: ergo neque ex usu fuit, etsi animus aliter vellet. Illum igitur ad diuinum apto, & non reuerti passu fati cursum sequor. Fac mi Woueri, & simul quid parenti & tibi visum (in tuis rebus dico) fac sciam. Vale. Louanij, vii. Kal. Sext. ∞. Id. xcix.

EPISTOLA XLV. *Leodicen.*

P. IOANNI ORANO, *Sacerd. Soc. Iesu.*

IAM denique sedet tuum & amicorum consilium (nam omnes amici in eâ parte:) manemus, nec Italiam hoc tempore adimus. Præter valetudinem meam nimis tenuem & infirmam, mouet & publica in Italiâ lues, quæ ipsa limina iam infedit. Ab Urbe litteras habeo, & monor ab iis qui calidissimè inuitarunt, ut deliberem & cuncter, quò lues se ista dabit. Imò seriò agitari de An-

de Anno sacro prorogando, si paullum se diffundit. Scis autem quas molestias Italia peregrinantibus dare soleat, vbi vel suspicio eius morbi est; nedum vbi ipse. Itaque iam scripsi dilaturum meiter in Ver proximum, & tunc fortasse omnia serena magis, & certa quidem fore. Quid ipsos aut me iuuet, periculis & molestiis frustra exponi? Ea dilatio consilium etiam magis dabit, etsi propendeo in patriâ & meâ istâ Spartâ manere. Apud te hoc prom. & quid me inuitet? pietatem tamen sepono: an pecunia? nec exspecto, nec peto: an ambitio? fortasse minuam aliquid de famâ aspectus, nihil ad eam addam. Quicquid sit, ætas mea & iudicium iam maturiora, à vanitate abhorrent: & fortasse in pompam ac speciem multa illuc dicenda, aut gerenda. Præcogitasses hoc, inquires, nec addixisses. Melius erat. sed tamen vel sic præstat ante viam sistere, & temerè aut calidè aliquid dixisse, quàm fecisse. Calorem tamen meum religio & pietas excusabit, quam Deo teste affirmo in oculis præcipuè mihi fuisse. Vale Reu^{te} Domine, & hæc cum fratre tuo V.C. Petro Orano, id est, cum me altero participato. Lampsonium communem viam in- iisse audimus: Deus manibus eius propitius esto. Louanij, vi. Kal. Sextil. ∞. ID. XCIX.

EPISTOLA XLVI. *Antuerpiam.*HENRICO VVENO I^{te}.

BENE est mi VVene, benè est (nam familiariter & abruptè apud te ordiar) quòd in eandem sententiæ partem mecum venis. Improbare tibi significas iter Italicum, idque magis quàm magis cogitas: tibi autem? immò addo verè & seriò, amicis plerisque meis omnibus, cum quibus scripto vel sermone de co egi. Quid autem alios nominem? ego ille paullò antè calidus valdè & destinatus, cum iustâ iudicij lance rem pondero, remitto affectum, & in rationis partem incipio propendere. Duo me maximè mouent. prius, quod & tu tangis, metum subesse ne veniam facilius, quàm me recipiam: & ne remora mihi illuc, aut & manus iniectio, per beniuolentiam fiat. Quòd si flectet; iuro tibi sanctè, vitalis non sum, & nullo modo mores, ingenium, vitam ad illud cælum & homines nunc aptem. En senesco, & cani spargunt

meas genas : mutabo familiarem aërem , locum , victum , amicos ? omnia noua sensibus oculisque istis obiciam , & in metâ panè vitæ , noua vitæ spatia ingrediar & decurram ? Mihi crede , hæream aut deficiam iuxta ipsos carceres : neque nunc ad senile & compositum ingenium faciant , quæ voluptati erant olim . Pompam dico , & splendorem , & speciosa omnia : præ quibus maturus & iam frigans hic animus otium , secessum , tranquillitatem amat . Duæ pestes humani generis Ambitio & Auaritia , altera nec olim me cepit , altera iam à plusculis annis dimisit , & nec laciniâ me tenet . Quid cogitem , aut cupiam ? nisi paucos hos & extremos annos , id est , pauxillum vini mei reliquum , Deo libare & melioribus vtilibusq̃ . Musis , quatenus eidem Deo visum ? Huic fini quies mihi conuenit , nec concutere corpusculum hæc caducum , fragile , & velut putre ædificium , ruinæ iam propinquum . Enimuerò cogitavi & antea , fateor , sed Spes illa blanda & insidiosa mortalibus diua , suggerebat ipso motu & mutatione valetudinem posse corrigi , fortassè & erigi in rectum & veterem suum statum . Suggerebat : sed cùm rei vicinus & viæ , me examino (secundum hoc quod me mouet , esto :) Deû testor , tam imparem me longo huic itineri , quàm nauigationi ad extremos Indos esse . Suscipere possum , patrare non possum , & in viæ quadrante deficiam aut subsistam . Hæc ita sunt : sed quare addixisti ? inquires . Nollem factum , vt liberè dicam : sed me & illorum , qui vocabant , benignitas induxit , & mea item cupiditas (cui pietas mixta) prouexit . Suaue erat in cogitatione & animo , reuiscere visa olim loca , tot vrbes , tot homines nobiles , & multos ex iis nobis amicos . Sit venia honesto desiderio : sit venia etiam impotentia , quæ exsortem me effectus facit . Quid autem quòd ab ipsis mihi suggesta excusatio ? imò disertè iam bis scriptum , nequid adproperem ; & metum ibi huius esse , ac iam fines & limina Italiæ insediisse . Vt nihil aliud sit , honestiùs aut certè prouidentiùs maneo , & iter totum si non tollo , iustè protollo . Quod autem tu mantellum etiam & velum aliquod ab Aulâ quæris , nihil est , nec cò iuerim : & transluceat hæc purgatio , & callidi illi demant à verâ facie hanc personam . Itaq̃ . in re maneamus , securi iudiciorû , si qua præter rem dabuntur . Extremum quod vel inimici dixerint , sit leuitas & temeritas : esto : malum dixisse aliquid temerè

aut

aut scripſiſſe, quàm feciſſe. Ibi pudor dumtaxat, hîc pœnitentia ſit adiuncta. Vale mi amice, & ſeriò te ſcio mihi, & me tibi eſſe. Louanij, Kalendis ipſis Sextilibus. ∞. IO. XCIX.

EPISTOLA XLVII.

Eodem.

IO. WOVERIO ſuo S. D.

E GONE vt de Galliâ tibi diſſuadeam? tum planè à me abeam, inò mentis meæ exſors ſum, & cum Homero, ^{ταὶς φρεσίν} <sup>ἀμεντε κα-
πνέει.</sup> ^{ταὶς ἐκπνεύσας, μένος.} Galliam, Galliâ in pectore amo, in ore circumfero: & quidni? bonarum artium amantem, & idè mei quoque (utinam inuenerim!) diligentem. Illa verò tellus ingenia ſemper habet, plurimùm format: & ſiquid nunc incultum aut ferox, à trifti & ^{πυλῶν} iſto Marte eſt, qui nimis diu eos preſſit. Ipſa gens ^{ἰμμανί.} facta ad virtutem, alacritatem, humanitatem: quâ poſtremâ ceteras orbis terræ gentes vincunt, certè vicerunt. Sed fuerint hæc ^{σπουδῆς ποτὶ καὶ ἀλκιμίας:} beata Pax tranquilla omnia referat, & veterem ^{ἀσπερα & περὶ κούφα.} iis indolem ac mores reddat. Eſt, aut erit: tu intercà me auctore viſe, oblectare, diſce. hoc poſtremum ſeriò, nec ludus aut aberratio tibi ſit, peregrinari. Plato iuuenes in ſuâ Rep. ab eò arcebat, quia vix apti eligere, & nouiſſe quæ proſint: at ſenes non ire ſolùm, ſed mitti volebat, relaturòs ſiquid boni moris aut exempli vſquam eſſet. Hunc finem, hunc animum, etſi non annos, habe: & velut ſpeculatorem miſſum te cenſe, cum Diogene aliquo, ad res humanas explorandas. Splendet aliquid aut placet? accede, tenta, an verâ luce: & ſi illâ, imitare, aut adſume. Sordet aut iacet? calca, non ſolùm tranſi, & animosâ fiduciâ ad meliora abi. Vt rem tibi dicam, vbique vtrumque reperies: alibi crebriùs, rariùs, bona, mala, mixta. Iuuet te, quòd iudicium iam (aut fallor) in bonam partem formaueris, & firmus ſtare poſſis contra vanitatem, non ſolùm prauitatem. O fac, & contubernio meo honorem hunc concilia, prudentiæ aliquid ab eo, non ſolùm ſcientiæ hauſiſſe. Si hanc ſolam, abdicò, vt olim ſeueri illi parentes. Ceterùm de Italiâ, noli vltra te aut me titillet. mihi exſtinctus ille ardor (ita enim fuit) à ſedatæ rationis quodam imbre: velim & te reſidere, nec meditari fortasſe vana rerum. Res ipſas quæramus: umbras, pompas, breues ſtructuræ, recto oculo videamus,

* Ibi im-
misit mor-
bum tri-
stem.

deamus, noscamus, spernamus. Testimonium, quale volebas, hîc habebis: de litteris fac nunc gratiam; occupor, quâ in re? extremâ (ne percellere) & testamentum cum vxore meâ iunctim con- do. Hoc vera sapientia iam olim fieri suasisit; nunc etiam plebeia, postquam superus ille Apollo * Νῦν δὲ αἰὰ πόλιν ὄρον καλῶ. Itaque funera in oculis habemus, etsi per hos dies rariora, & inolescere malum videatur. Deus donet, & te quò tendis sanum ire, redire, & manere meum semper. Louanij, IV. Idus Sextil. ∞. IO. IC.

T E S T I M O N I U M.

EGO, si quidquam bonâ fide, iam nunc testificor, hunc IO. WOVE- RIVM è contubernio & domo meâ adolescentem, mihi earum, Modestia, & Musis fuisse: quas semper coluit, & vitam ad optima præcepta, ingenium ad artes conformauit. Commendo serîo, bis serîo, quicumque illa amant: addam & verecundè, si quis me amat, vt sâ- ctum huic velit. Fuco verborum nemini imponam, nec ipse morum: can- didus est, bonis benè natus est, & siquid ad rem, in re bonâ. Fauete, qui hæc legitis, & breue sed fidum elogium censete: quod à vobis am- plius auferet, si noscetis. Louanij, IV. Idus Sextil. ∞. IO. XCIX.

IUSTVS LIPSIUS.

EPISTOLA XLVIII. *Bruxellam.*IOANNI DRENCKVAIRTO, *Thesaurario Belgij.*

VALETUDO mea adegit, vt domum properarem: id quæ bre- uiore viâ illâ Mechliniensî. Ita vos non vidi, nisi affectu & animo: quem quomodò non sæpè istuc mittam, magis magisq. beneficiis vestris deuinctus? Ingratissimus hominum sim, & di- gnus cui vel frons, exemplo Macedonici illius militis, inuratur. Balduinus tuus ad nos sanus saluusque rediit: hoc mox inordit, quòd non te talem reliquisset. Si vota nostra locum habeant, non illud modò sis, sed panè dicam immortalis. Balduinum tuum scandere ad tituli illius apicem curabimus: atque vtinam breui ad ipsum illud culmen, quò adspirat! Ipse adnititur, nos alleuabimus: sed nihil properè, ne non ascensum sed ruinam sibi struat. Sicut aues matres non patiuntur pullos suos longiùs auo- lare,

lare, sed comitantur & sistunt, & docent : nos item hæc talia in nostrâ iuuentute. At te, Ampl^{me} & Nobil^{me} Domine, sanum & firmum seriò vouemus, publicâ & nostrâ causâ. Louanij, III. Idus Sextil. ∞. IOC.

EPISTOLA XLIX. *Bruxellam.*BALDVINO IVNIO *suo* S. D.

NIHIL timidè ad me aut cunctanter scriptione debes accedere. cur facias? amo affectum, qui impellit: sed & ipsum illud scribere amo, quod te exerceat, me delectet. In alto otio es, etsi in negotiosâ & turbidâ vrbe: sed in quâ vana & ambitiosa multa rerum videas, nec pro mente studiis melioribus operatâ. Sicut terrâ interiectâ, Luna lumen à sole amittit: sic animus obnubilatur, interuentu isto viliorum rerum. Itaque meritò eas fugis, & ad nos adspiras. etsi es tamen in contubernio Amplissimi viri, tuja uunculi: à quo haurias præcepta, & exempla item videas, ad Virtutem. Sed ut nunc tua ætas, Louanium & hæc Mineruæ dicata loca, magis tibi faciunt: redibis igitur, cùm illi visum, quia lues fit rarior & mitior, inò pennas quaterere videtur, & à nobis abire (fiat, fiat) mala illa Diua. Censeo tamen Principum aduentum expectes, qui appropinquare dicuntur, ut solennia illa videas, nec visa tibi nec fortean videnda. Hoc suadeo. etiam illud, ut mentem & oculos ad libellos flectas, manum subinde ad stilum, ne otiosum tuum illud otium sit: id est, ut noster Seneca appellat, *hominis viui sepultura*. Vale. Louanij, XVII. Kal. Sept. ∞. IO. XCIX.

EPISTOLA L.

*Eodem.*GVIL. SCARBERGERO *suo* S. D.

BRUXELLA te etiam habet haud dubiè, & dies fortassè aliquot habebit, in hâc publicâ latitiâ & pompâ, quâ vestra ætas, quid vestra? serior etiam aliqua meritò delectetur. Sed ut te deinde Louanium nostrum, & domus etiam mea, habeat, id cupio: & hæc causâ scribendi. Reuise nos, non quia diu absueris, sed quia fortassè absuturus: & in antecessum, ut aiunt, con-

suetudinis hunc fructum capiamus. Coram de itinere tuo, & meo consilio. De Italico quidem ne ultra cogita, tam perit quam extrema faba, ut Comicus ille iocatur. Causæ nimis iustæ sunt. & vel sola tenuitas mea, & hic homo, ut sic dicam, monogrammus, pro mille. Par non sum, quicquid coner, quicquid cupiam: & non Italia, sed via mihi sit sepulchrum. Vale, mi Scarbergere, & quod dixi, & (si voles etiam) iussi, veni. Louanij, III. Non. Sept. ∞. IO. XCIX.

EPISTOLA LI.

AD CONTVERNALES SVOS,

Franciscum Oranum.

Cornelium Anchemanium.

Io. Baptistam Peresum Baronium.

Joannem VVoucrium.

Guilielmum Richardotum.

Balduinum Junium.

Antonium Richardotum.

Philippum Rubenium.

Guilielmum Scarbergerum.

Hubertum Audeiantium.

ITANE de Potoribus & Edonibus scire auctis? & decorè hoc poscitis? Ita. quia in Scholâ etiam disserui in occasione, ut dicitis: & velletis rariora ista exempla in promptu habere, non ad imitandum, sed narrandum. Addam ego, & detestandum. nam sic oportet. monstra hominum fuere, qui huc se dedere; etsi in theatris & regis etiam spectati, cum favore suo & plausu. Sed videamus igitur primò *Potiores*, & istos, cum poetâ prisco,

* *Conuivij
panctas. &
colicium re-
miges siue
trab. mes.*

* *Συμπόσις πάντας, ἢ κυλικὸν ἔσται.*

Proludo autem leuiter & vniuersè de toto genere: quos ubi & quando non est inuenire? In veteri & nostro æuo, in noto & nouo orbe videas: & Plinij dicto, *nullâ in parte mundi cessare ebrietatem*. Nec vina solum huic rei expeti, sed aquam adsumi: ô sagacitatem ingenij! quâ repertum, ut hæc quoque inebriaret. Frugibus corrumpi variè eam scis, & herbis, & inelle: quid quod & fumis atque odoribus alibi (de Peruanâ Indiâ scribunt) inducitur alienatio hæc mentis? Quacumque viâ, madescere tamen volunt & desipere: ac pro plurium mente ille apud Comicum sentit:

— τὸ δ' ἔγωγε

Εἰπέ μοι τίδ' ἔστι; τὸ πίνειν γὰρ, φέμε' ἔγωγε.

Anipha-
nes apud
Athen. lib.
ho. 1.

Οὐκ ἔστιν ἔτι θεοῖσι χαίμαρροι, ὅσα
 Διόσφορον αἰεὶ τλύνοντα καὶ τὴν ἡμέραν
 Βρέχεται, μέγας ὃ καὶ ἀλλ' οἷα γίγνεται.
 Τα δ' ἀντιτείνουσ', οἷοι δ' ἴσμεν ἅπαντες
 Ἡ ξηρασίαν ἔχουσ', αὐτὸ πρὸς μὴν ὑπολλύται:

— sed vivere

Quid tibi videtur? mihi ne? bibere, ego inquit.

*Videsne ut, ad fluentia consita arbores,
 Et quæ diebus perpetim atque noctibus
 Rigantur, alto stipite & lætâ comâ
 Calo minentur? contrâ, quæ velut sitim
 Patiuntur, has perire cernas stirpitus.*

Plures, inquam, consentiunt: imò velut ad palmam currunt in Dionysiacò hoc agone. Qui olim tam populariter tulerunt, Platonis iudicio sunt *Scythæ, Thracæ, Celtae, Iberi*: nec vel hodie id culpes, nisi forè in Iberis, qui demutarunt. Sed bellum, quod de iis etiam addit: *Σκύθαι καὶ Θράκες ἀκράτως παντ' ἀποσι χροῖοι, γυναικας τε & αὐτοὺς, & χεῖρ' ἱματίων καταχρόιοι, καλὸν καὶ ἔνδοιμοι ὀπτιήδονα ὀπτιήδονα νεορόοιαι*: *Scythæ & Thracæ meraco vino passim vtentes, viri atque etiam samina, & in vestes sibi desundentes, bellam & beatam vitam vivere se censent.* Quid ais? agnoscisne hæc & in nostris moribus? non etiam illud de effusione? quâ bibuli isti vtuntur, siue cùm recusanti alteri poculum in sinum vestis proiiciunt; siue cùm ipsi auidè bibentes, suum stillatim perfundunt. Sed Græcos tuos Plato quid ita omittis? scimus & eos in hac classe, & prouerbio innotuisse. Etiam Diui Basilij reprehensione acri, quâ mores sui æui ita corrigit, vt tamen reuelet. *Bibunt, inquit, auidè & comeffantur, & propinant*: sed bellum acroama, *πορεύονται ἡδὴ τὴν πόσιν, ἐπετρέχεται τις αὐτῶν καίας, ῥιναῖ τὴν αἷμα, ὑπὸ μεθύσει, φιάλλω φέρον διμεγέθησιν κατεμυμένῃ, ὅς τὸν ὀποχρόν αὐτῶν παρῶσάμεν*, *κατὰς αἰεὶς τὸ μέσον, δὲ πολλῶν πολλῶν ἴστω τοῖς συμπτώταις δροῖται τὴν μέδω. δίδόμενοι δὲ τὰς ὑδροφόρας, καὶ τὴν πρὸς αὐτὸν ἱκας* *παραμάλω ὑποδράμεν*, *ὡς περὶ δὲ τὴν δέξασκεν ἀπὸ τῆς πύσης, οἷς οἱ βόες, ποῦτοι ὑφίκασι ἐπιγήμεροι τοῖς λαμοῖς, ὅσον αὐτοῖς αἰωθεὶ ὀφυκτὴρ δὲ τῶν ἀργυρέων ὀχετῶν ἵστασθαι*: *potione iam longius progressâ, intrat adolescens aliquis, validis humeris, & nondum ebruius, vas magnum ferens & sustinens vini refrigerati. Atque is propulso ordinario pinxernâ,*

in medio adstans, per obliquos canales quosdam, equalem omnibus distribuit ebrietatem. Partiti enim tubos illos, & ad se versus quisque accipiens & excipiens, tanquam è cisternâ vno spiritubibunt, prorsus ut boues: additi tantum in guttur adtrahere & demittere, quantum supernè vas illud per argenteos stilanos siue canales infundit. Obellum morem! ô Græcis illis elegantibus dignum! tam herculè quàm alter iste (iuuat commemorare, vterque nouitius nobis est:) alter inquam Philoni expressus, & apud stirpem illam Græcorum Alexandrinos vsurpatus. Certant vino, inquit, bibunt confertim & vix spiritum recipientes, cùm identidem pueros à poculis iubent infundere. & si vel leuiter tardent, acriter increpant, quòd calidum ijs (sic loquuntur) frigesfaciant. Denique in pulchro hoc certamine *μεγάλα καὶ καλά ἀνδράσις ἀντιδρῶσιν, ὡς τὰ ρίνας, καὶ χειρῶν ἀκροὺς δακτύλους, καὶ ὁποῖα δ' αὖ τῇ μέρει τῇ σώματι ἀπαιδίοις*: magna & pulchra inuicem patiuntur & faciunt, aures, nares, manuum extremos digitos, & siquam aliam corporis partem fors tulit, sibi mutuò prærodentes. O non amentiam, sed infaniam! & fidem mihi aliquis habeat, nisi ipsa verba fidi auctoris adnumerem? Vide autem blanditias. nam sic ego interpreter: & suaues isti compotoruli, vino madidi, sensuum inopes, ita se comprimunt, disfluuiantur, allambunt. Dij deæque, quid irati aut hostes aliud faciant? Sed populos omitto, ne meos fortasse opus habeam tangere: viros videamus (is enim præcipuus noster tunc sermo) & qui singuli fortiter certarunt hoc certamen. Ecce Alexander Macedo olim, ipse quoque vini audus & capiens, & addam, suo & alieno malo captus quoque, is dico præmium aliquândo publicè proposuit *ἀποροποσίαις*, siue meri potio-
nis. Ludos rege illo dignos, qui per Liberi vestigia ibat scilicet, & hunc quoque honorem ei habebat. Ipse igitur editor & arbiter: certant plures. sed qui plurimum hausit (ait Plutarchus) *Promachus* quidam fuit, qui ad *congiōs* quattuor peruenit. Congius cepit olim *libras* decem circiter, siue *sextarios* sex: essent nobis *tria* vini *pocula*, largè. quod autem præmium? talentum. quod etiam mors, quæ homini post triduum aduēnit: itemque aliis quadraginta & vni, qui miselli super vires certarant. Felicior alter apud eundem regem, in eodem isto vini modo, *Proteus* Macedo. qui, ut *Ephippus* scribit apud Athenæum, *valido & sano semper corpore egit, et si vino adsidue immersus. Fuit aliquando, inquit, ut Alexander in con-*

De Plan-
ta. Noë.

• Duodecim
pocula.

Lib. x.

uino

uiuio grande poculum posceret duorum congiarum, atque id Proteo offerret. Ille gratanter accipiens, & regem comitatus laudans, cum plausu omnium ebibit. Ac subinde idem poculum repetens, iterum eduxit, & obtulit impletum Alexandro. Quod hic quoque suscipiens ebibit, sed impar viribus non sustinuit, & in pulvinar reclinato poculum è manibus est elapsum. Vides & hunc *Quadicogium* potorem: & vix est vt supra donem. Nam *Plinianus* ille *Novellius Torquatus Mediolanensis* (Gallus fuit, vindicemus hominem cum hac gloriâ) tres dumtaxat congios bibit: sed quod miremur, vno impetu, (Plinij verba) spectante miraculi gratiâ *Tiberio Principe*. Hem, vno impetu, id est *audaci*? Et quod amplius miremur, in eo (iterum Plinij verba) rara hæc gloria, non labasse sermone, nec leuatum vomitione, non alterâ corporis parte, dum biberet: matutinas obisse vigilias: plurimum hausisse vno potu, plurimum præterea aliis minoribus addidisse: optimâ fide non respirasse in hauriendo, neque expuisse, neque ad elidendum in pavimento sonum ex vino reliquisse. O potorem omnibus numeris perfectum! quis contendet? non tu *Cicero* fili, qui duos congios simul haurire solitus: sed quid ad hunc aut priores? Abi proles à patre degener, & nec in vitio satis fortis. *Firmus* nominetur potius, qui *Aureliani* temporibus in *Ægypto* imperium vsurpauit. Is *vi-* Lib. xiv.
Nat. Hist.
ni non multum bibit, aquæ plurimum, mente firmissimus, nervis robustissimus. & tamen cum ad bibendum à notissimo quodam potatore, *Barburo*, prouocatus esset, situlas duas plenas mero duxit: & toto postea conuiuio sobrius fuit. Cui non dissimilis *Bonosus*, item inter minutos tyrannos. qui, vt *Spartiani* verba sunt, bibit quantum hominum nemo. De quo *Aurelianus* sæpe dicebat, Non vt uiuat natus est, sed vt bibat. Quem tamen diu in honore habuit, causâ militiæ. Nam si quando legati barbarorum, vndeunque gentium, venissent, ipsis propinabat vt eos inebriaret, atque ab his per vinum cuncta cognosceret. Ipse quantumlibet bibisset, semper securus & sobrius, & vt *Onesimus* dicit scriptor vite *Probi*, adhuc in vino prudenter. Habuit præterea rem mirabilem, vt quantum bibisset, tantum mingeret, neque vnquam aut eius pectus, aut venter, aut vesica grauaretur. Is ipse cum, victus à *Probo*, laqueo vitam finisset, ioco locum dedit, Amphoram pendere, non hominem. Infelix quidem in *Mattis* militiâ, fateor; sed hac *Bacchi* mirificus, & iuxta vel supra *Torquatum Tricongium* illum ponendus. Quid autem de *Camatero Logothetâ*

Lib. III.

thetá pronunciabo, qui Manuelis Byzantini Imp. xuo & rebus interfuit? nam & is palmam sibi poscit. Nicetas Choniates de eo: Ingenio præstanti fuisse, eloquentiæ extemporalis studiosum & felicem: sed eundem omnium mortalium edonem & bibonem maximum. Et quamvis vinum avidissimè & largissimè sumeret, & spongiarum instar maderet, tamen mentem non mergebat ea copia; sed pedibus, capite, linguâ constabat, ut sobrii, imò crescebat in eo ratio & oratio velut igne illo humoris accensa simul & irrigata. Hoc genere vita non solum Imperatori acceptus erat, sed & gentium dynastis. ad quos Legatus missus, alios in soporem collocabat, alios aquabat potionum veteres, quique amphoras, ut calices, digitis versare soliti essent. Sponsionem verò aliquando cum ipso Imperatore inijt, exhausturum se vas Porphyreticum aquâ repletum: quod olim in aula subdiali Nicephori Phocæ fuit, nunc visitur in huius Michaëlis conclavi aurato, quod struxit. Demetrus Imperator, Euge, inquit, ô Logotheta. vestes floridas, & minas aliquot auri accipies, si faxis; sin autem, ipse dabis. Ille nihil moratus, vas illud, quod ad duas chîas siue congios capiebat, corpore & capite inclinato, instar bonis, totum simul exhausit: & accepit. statim ex pacto promissâ. Quid dicitis? non hic palmam, ut aiebam, iure suo poscit, & quidem duplicem: non vini solum, sed aquæ singularis potor? Et ecce iam huic aut prioribus dabam: sed è Germaniâ superuenit qui reuocet, & quidem nouus nouitius athleta. Nuptias ante pauculos annos in Norico fuisse audio viri nobilis. ibi ad conuiuias hilarandos, certamen potionis propositum editumque, inter eorum ministros. Magno numero conuenerant: sed vnas forticulus paulo minus sex congiis, haud longâ morâ, fertur ebibisse, & simul præmium inersisse. A me quoque, ô homo an orca, accipe: & fateor nihil simile vidisse, audisse, legisse. In vno quidem isto potionis genere. nam Edones magnos, & simul potores, repperi fortasse, & super istum. Videamus. Mulier Alexandriæ olim fuit, quam Athenæus prodit, Libras carnis duodecim edisse, panis quattuor chœnicas, id est totidem & amplius librarum, vini autem congium adbibisse. O mea Venus, ô delictum, bella es & digna marito, sed Vulcano. Super hanc longè (quid in viro mirum?) Imperator Maximinus. quem Capitolinus auctor, bibisse sæpè in die vini Capitolinam amphoram: comedisse & quadraginta libras carnis; ut autem Cordus dicit, etiam sexaginta. Scitis, quid illa amphora?

• O. duodecim
pocula.

amphora ? *quadragesimo sexto* sextarios capit : id est, ipsos *Congios octo*. Trepidarem hæc dicere : sed bonus & priscæ fidei auctor adserit, quam ego non fugillem. Sed audi & crede etiam maiora. Vopiscus in Aureliano Principe: *Vehementissimè*, inquit, *delectatus est Phagone. qui usque ad multum comedit, ut vno die, ante mensam eius, Aprum integrum, centum Panes, Veruicem & Porcellum comederet.* Clamas, & resilis? sustine etiam: *biberet autem, in fundibulo appposito, plus Orcæ.* Cetera liquent : de *Orcæ*, scio vas vinarium fuisse, & amphorâ sanè maius, sed quantum, mihi latet. Quid Clodius Albinus Imperator? is, Capitolino scribente, tantum pomorum hausit, quantum RATIO HUMANA non patitur. Nam & quingentas ficus passarias, quas Græci Callistruthias vocant, IENIVM comedisse, Cordus dicit: & centum Persica Campana, & Melones Ostienses decem, & vuarum Lanicanarum pondo viginti, & Ficedulas centum, & Ostrea quadringenta. Hein, Hein!

—— *dij talem terris auertite pestem:*

cettè à nostris hortis, quos ille cum toto foro olitorio depascatur & vastet. Scio vos etiam nunc vacillaturos, & *ἰσχυρὰ* quâdam v-
 furos in assentiendo: & dedit tamen testes, dignos credi. Vul-
 tis & exemplum à superiore paullùm ævo? nam vetera nunc
 ferè hoc tatum habent, ut etsi vera, vix videantur: an sui mag-
 nitudine, an nostrâ declinatione. Sed addamus non tale aut tan-
 tum; quod tamen venire in numerum possit. *Vguccio Fagiolanus*
 inter Italiæ tyranniones fuit, & sedes ei plerumque Lucæ, donec
 pelleretur. Exsul igitur & iam senex, apud Canem Scaligerum,
 Veronæ gloriabatur in mensâ: *se iuuenem quaternos capos atiles,*
& totidem perdices, item hedi clunes asos, & vituli insartum pectus,
præter salsamenta, vnâ in cenâ esitasse. Atque hic homo non in præ-
 mium, sed in usum & pellendæ fami faciebat: quid si exercuif-
 set se, & neruos intendisset? Satis talium. ite prodigia, & istos
 gurgites, pænè dicam, maris aliquis gurges mergat. Louanij, in
 nostrâ domo: quam quo fine incolitis, ut hunc tangatis, Deum
 precor.

EPISTOLA LII.

Bruxellam.

BALDVINO IVNIO *suo* S. D.

ECCE ad ipsum auunculum scripsi, & metum ademi, qui te à nobis amouit. Quid superest, nisi ut iterum te admo-ueas, & Deas reuifas, quarum amore cales? O gratus ille mihi, ô tibi utilis affectus! & quid in hac ætate melius potes, aptius potes? Cole, cole nunc istum adolescentiæ agrum, bonâ fruge scientiarum confere: & maturior, accipies suaues illos Prudentiæ, imò & Sapientiæ, fructus. Miseros, qui aut nolunt, aut negligunt! miserandos, qui cum velint, non possunt! At tibi facultas inprimis adest, & alter ille tuus parens (scis me Thesaurarium dicere:) vbertim suppeditat, quicquid studiis, & eorum instrumentis, est opus. Voluntas à te est, atque etiam in te est, quod gaudeo: ut serues, vel ut augeas potius, horror. Mihi hoc crede. perueniet ad optatam calcem, quisquis seriò volet & nitetur: & talibus utroque oculo Iuppiter annuit, Mercurius dirigit, ipsa Minerua manum & mentem iis, & cum iis, mouet. Abripior, & Scarbergerus abit. Louanij, pridie Idus Septembr. 700. 15. XCIX.

EPISTOLA LIII.

IOANNI DRENCVAIRTO *Thesaurario.*

SCRPTIONI huic nullum argumentum est, nisi affectus sineus & mos maiorum. Vterque suadet, ut vota, quæ pro salute tuâ corde facimus, stilo consignem & ad te perferam: sed prius ad illum calidè missa, qui compotes (ita spero) faciet votorum. Deum igitur rogo, quantum animo possum, ut hunc Sæcularem nouum annum felicem tibi tuisque decurrere, te valere per eum & vigere, Principibus & Reip. sine offensâ vacare, me amare donet, qui sum perpetuus & deuotus tuus cultor ac cliens, Louanij, postridie Kal. anni 1500. supra 700. Balduinus tuus apud me valet, quod facere eum vis facit.

EPISTOLA LIIII. *Mechliniam.*IOANNI BERNARTIO *suo* S. D.

ECQUID agis, mi Bernarti? Rarò, inquires, interrogas. Fateor, & ignauum me cum annis fieri, hoc quoque fateor: sed non in amore & interiore affectu remissum. *Omnia fert ætas*, ait ille, *animus quoque*. Sentire incipio, & ingenio tam diu, tam assidue exercito, torpor aliquis adgnascitur, & quod libenter facit, impromptè facit, aut nec facit. Ignosce. ita tu & tui ad æui hanc lineam veniatis, aut potius superetis, beati & felices. Quod precor tibi religioso & prisco voto, in auspiciis huius anni: quo me Italia sibi spondebat, & ego me illi: sed, ô numen quod nos temperat, quàm irritâ destinatione! In patriâ hæreo, neque res tantum abiit, sed desiderium, vt verum apud te liberè loquar. Et si assidue litteras etiam nunc recipio inuitantes, & nimiâ benignitate prouocantes. Sed quid verbis opus? Fatalem vim magis & magis indies agnosco, in publicis, in priuatis, in meipso. Ratio omnis vellet fortassè non peregrinari me, sed abire: tamen maneo & video diuinitus decretum, *LIPSIVM IN BELGIS MORI*. Fiat. apud multos incuriosos mei, paucos contemptores, fortasse & nonnullos æmulos: sed & amicos volentesque alios, inter quos *te* Mechlinia & *Oudartum* meum cum *Hartio*, facta mihi nomina, habet. Eandem urbem vestram & iste insidere parat *Vibrandus Anskema*, Iurisconsulti nunc titulo donatus, iam olim inter Musarum cultores, imò etiam mystas. Vtrâque oratione valet solutâ & vinctâ: quod magis ex illo noto, noscets, atque vt velis te rogo. Louanij, postridie Idus anni Sæcularis ∞. IDC. Vxori tuæ suauissimæ salutem per te nuncio, & liberis tuis.

EPISTOLA LV. *Gandauum.*

GEDEONI TÛSERHENDRIXIO, V. R. & N.

FVNGOR muncere salutationis per litteras, quoniam coràm id non datur, vt solet, & quod mihi dolet. Suavis sæpè consabulatio nostra, & præsertim in re hortensi: quâ vterque delectabamur. Tu magis, quia solutior eras, & penè sine aliis curis vacabas

bas huic curæ. At mihi temporis iniuria omnem pænè hanc voluptatem deterfit. dico temporis, non ad spectu ad ista publica & tristia (quæ mirigo potius hac occupatiunculâ:) sed hiemis iniuriam & acrimoniam intellego, quæ mihi hoc biennio funera continuata dedit, & florem omnem, vt sic dicam, florum meorum interfecit. Quicquid singulare erat, præsertim in Tulipis, habuisse me recordor, cum desiderio tristi & pungente. Miserris me? nolim, adiua potius, & quoniam diuitem atque vberem te audio, instar vel Phæacum regis, participa veteri amico, & qui in beneficij magni loco hæc, etsi fugacia, munuscula ponet. Confido te facturum. Certè si in causâ simili tu à me, utrâque manu largiter ego donem. Nunc salutem, & hunc animum semper deuinctum. Louanij, postrid. Kal. Mart. ∞. IOCI.

EPISTOLA LVI. *Mechliniam.*

NICOLAO OVDARTO V. R. S. D.

SOLEO volente animo, labente manu & pennâ ad te scribere, nunc ille contrahitur, & hæc resistunt. De republicâ me consulis: & quid scribam aut effabor? Istud mallet, & in tuum sinum interiores omnes cogitationes effunderem: à scribendo absterreo, & nimis iustas habeo causas. At Princeps vult, inquit amicus ille noster. Credo equidem, & eius certè interest fida & recta consilia dari: sed ego me in eâ classe non censeo, qui hoc statu rerum debeant aut possint. Adde quòd à republicâ remotus sum, auditione aliquid accipio, interiora rerum non noui: & quid ergo firmiter aut ex vsu suadeam? haud magis quàm medicus, qui ægri sui temperiem & constitutionem ignoret. Vota tantum possum addere, quid si & querelas? Hic quidem cottidiana materies, cum miseri rustici præter ora nostra victi abducuntur, haud aliâ specie quàm si hostes irruissent. O patria, ô ipsi Principes! nam vt illius salus agitur, sic dignitas istorum. At enim mox remedia à publico Ordinum conuentu.

..... Ecce quæ possum aut volo hoc tempore. interea Deus illi Episcopo benè faciat, & nostro N. quorum vterque candidè & libere, quæ ex vsu sunt, aut certè vi-

tè videntur. Nam quid asseram? omnia ista mihi tenebrę sunt, nec finem aut fructum video eiusmodi actionum: nisi si qua consilia specie tristia, exitu læta, ut sæpè in humanis solet. *Occultat enim, ut Plinius ait, utrorumque semina Deus, & plerumque bonorum malorumque causę sub diversâ specie latent.* Plinij illius Panegyricum librum breui à me videbis: & vetera illa monita ac consilia potius, quàm mea noua. At quis vsus? inquires. alibi fortasse, & ubi nolim. Quid faciam? nos, ut in theatris olim, spargimus: ille aut alius sinum aut manum implet. Vale mi optime Oudarte, & vide an malè illi (si sic pergitur) qui me nuper. sed tu iterùm vale. Louanij, Idibus April. ∞. 100.

EPISTOLA LVII. *Bruxellam.*

FRANCISCO BILLIODO S. D.

NIHIL minus quàm à te beneficium, aut potius beneficia, exspectabam: quæ largiter, vtrò, & aperto animi sinu, mihi defers aut offers. Nam & nummos ad me mittis, ad textum aut supplementum Rokoxianis: & florum etiam lectissimos ex paterno tuo horto polliceris. què ille instructum, ut audio, & supra omnes Alcinoos pænè habet. Negeni vtrumque mihi gratum esse? mentiar. gratissimum est, & pro veteri atque insito animi mei desiderio & sensu. Veteres omnes elegantias, & has Antiquitatum reliquias à me amari, notum est omnibus, qui leuiter me norunt: sed & flores & horti ornamenta in deliciis haberi, non puduit scriptis etiam publicè profiteri. Itaque vide libertatem & candorem, quo iam nunc apud te vtor in ipso hoc aditu amicitie. grata, quæ misisti; grata, quæ mittes: atque ut mittas in Vere proximo (vix enim antè euellendi copia) non rogo te sed appello. Quid enim rogem, iam debitorem? Sed extra iocum. scriptio tua mihi in animo placuit, qui eam amicitie conciliandæ esse voluisti: quam purè & sine fraude equidem offero, amans honesti animi tui, & ad honesta sic propensi. Eum ut in illa & in me talem serues, Deum & te rogo. Vale. Louanij, post. Idus Nouemb. ∞. 100.

EPISTOLA LVIII. *Mechliniam.*HADRIANO VANDER-BURCHIO, *Filio, Senatori.*

BENIVOLE à te factum & pro amico, quòd me & dignitatis tuæ & discessionis gnarum fecisti. Ego enim seriò tibi recipio, & fauctorem me esse incrementis tuis, quæ virtus & ingenium conciliarunt: & vota interpono, ut plura adstruantur, quod in Principum gloriam & publicum bonum cedit. Illis & huic convenit, tales euehi & educi. Hortor autem te vel ex superuacuo (nam sponte facturum confido) ut in isto munere dignum te & parentibus, & ipso te præbeas; denique iustitiâ illâ, cuius sacerdotium nunc profiteris. Ecce in istis meis, quæ in simili occasione & argumêto iam scripsi, si quid erit huic rei aut sensui, videbis, eliges: & hoc sine misî. Vale Vir Cl^{me}, & animo à nobis non abi. Louanij, xi. Kal. Nouemb. ∞. 16c.

EPISTOLA LIX.

VIBRANDO ANSKEMA S. D.

Tv verò iacere mihi videris, aliter à studiis tuis expectatum. Tædet status huius præsentis, & auidè mutes. quid? itane pessimus ille & abiiciendus est? mihi non videtur: nisi ei qui lucem, honorem, alta, id est mala quærit. At ego te in nostrâ hac quietorum classe censebam, ut

——— *fecunda placerent*

Otia, nascentesque irent in sæcula libri.

Transfuga es, & ad splendidas illas partes abis? Splendidas, sed miseras, & in experimento demum scias. Non volo, inquires: sed à tricis imò forensibus istis liberari, & bonâ fide Musis operari. Velim mi Vibrande: & si tu sic seriò, etiam illis potes. Pater quod ad vsum, & tolerandæ honestæ vitæ sit, affatim suppeditat. Si te excutias (liberè loquar) alium in hoc vlcere vnguem reperiens, & mixtum aliquid à cupidine fortasse non bonâ. At tempora etiam accusas. Facile est, & quis non tecum? pretium non est artibus bonis, non ipsis bonis, & hæc omnia præferendis & ambiciosi calcantur aut iacent. Vera sunt. sed in terrâ tu purum illum ætherem, & serenos semper animos, expectas? non inue-

inuenies. nimbos magis, procellas, calumnias: & mihi crede, nos quoque (quibus aliquis inuideat) largiter & crebrò sumus his iactati. Iactati, sed non afflicti: steterimus, & illud Pindaricum obmurmurauimus:

— ὁ μέγας δὲ κέρδιαι ὁ ἀγαλλυρῶτα ἢ λαμβάνει.

* magnus
periculum
virtutis ig-
nunt non
tenet.

Ignauī & viles magis tuti ferè & sancti sunt: alij prouocantur. sed nimirum vt araneorum casses animalia fortiora petrumpunt, sic istos à Fortunâ laqueos mens robusta. Aliqua tristia, & quæ nolis, incidunt:

— τίς δὲ πλεονεκτήων,

Ἄπειτα ἀπώμειν τὸν δὲ αἰῶνα ἄχρον;

* quis,
præter Deū,
Experi ma-
larum cla-
udum et a-
tem exigit?

Sicut stellæ in tenebris etiam fulgent; sic liquidus & libens viri sapientis animus etiam in istâ temporum caligine aut nube. Hęc solatia: nec auxilia tamen abnuo, quæ in meâ quidem sint manu. Quæ tu quòd tam prompta censes, nimis falleris: nec for- res vbique, non dicam commendationi nostræ, sed mihi ipsi ap- pertæ. Occasio expectanda est: & prauertere aut facere eam, veseor vt succedat. Obsecro te, nobis hoc crede,

Qui periti sumus in vitâ, atque vsu callemus magis.

Vale autem, & animo ne sic fluctuare: certus, quòd millicies mil- leni in hac ipsâ Belgicâ sint, qui optent & reges sibi videantur in tuâ sorte. Louanij, v. Idus Ianuar. ∞. LCCI.
Vxorem saluto..

EPISTOLA LX. *Vltraiectum.*

HADRIANO VANDER-BVRCHIO, patri.

GRATVM accidit mihi & munus tuum, & scriptio, vtum- que veteris in me animi testis. Est sanè hoc in fido amore, & qui in virtutis, vt sic dicam, solo radices egit, vt nō magis quàm illa desinat, & auo ipso crescat & viresumat. In tuo experior: sed & fratris Decani, quem viuere & vigere, etiam in silentio ali- quo, mihi liquet. At munus tuum parte aliâ etiam gratum, quòd ostendit te nec in occupationibus, quas adsiduas habes, nec temporū hoc tædio aut caligine, deserere nostras illas Deas: quas pauci hodie æstimant aut amant. Gaudeo: & scio, præter honestam voluptatem, etiam lucem, & robur aliquod animo

ab iis inferi aut præferri, ô quàm necessàrium in hoc æuo! Frue-
re, vt fecisti, & facis; sed & nos earum atq. honesti omnis aman-
tes ama priscâ fide. Louanij, vi. Kal. Decemb. ∞. 1506.
R. V. fratrem tuum saluto, & Canterum veterem nostrum.

EPISTOLA LXI.

NICOLAO HACQVEVILLIO S. D.

AD Historiam cum dare te cepisti, fatetis hæere in primâ
viâ, & confusione rerum aut temporum, ignorantia eo-
rum quæ & quando legenda aut eligenda sint, pedem figere, imò
tædio aut desperatione pænè referre. Non fiat mi Hacqueuilli.
opem imploras, pro copiâ meâ dabo: & si non plenè ductor (oc-
cupatio & valetudo nunc abnuunt:) tamen director ero, & di-
gitum intendam, quò & quâ contendas. Historia nobis propo-
sita: quæ, & cuiusmodi? nam variat: & summa eius diuisio est,
Mythistoria & *Historia*: Illa, quæ fabulas vero mixtas; ista quæ
purum & merum verum habet. In illâ poëtæ sunt, & id genus:
qui oblectamenta auribus animisque quarunt, & floridâ istâ ve-
ste ornant & augent corpus hoc veritatis. Veteres poëtæ, & rex
eorum Homerus, pulchrè & sæpè vtiliter fecerunt: cum arcanos
sensus aut altiora dogmata hoc quasi velo obnubunt & tegunt.
Sed hanc partem mittamus, non nunc adeundam: altera est ve-
ra *Historia*: quam licet bifariam partiare. Est *Naturalis*, est *Nar-
rativa*: sit venia sic loquenti, planè, si non purè. Illa est, quæ na-
turæ faciem & facta reuelat, id est, rerum, stirpium, animalium
ingenia, proprietates, vires tradit. Aristoteles, Theophrastus, Æ-
lianus, Plinius fecêre: & plures, quos æuui nobis subduxit.
Narratiuam dico, quæ res gestas actionesque prodit, sacras siue
profanas. Ideoque à duplici hac materie iterum duplex, *Diuina*
& *Humana*. Illa, quæ religionem, aut quod adhæret, tangit: hæc,
quæ res plurimum actionesque humanas. Iterumque ea duplex,
Præuata & *Publica*. Nam aut singulorum res, vitam, virtutes, vi-
tia recenset: & Præuata est. aut quæ publicè, plurimum vsui aut
noxæ, sunt gesta: & Publicam appello. Omnes viles. propriè
tamen & distinctè, Naturalis scientiam, Diuinam religionem, Hu-
manam prudentiam, omnes delectationem habent. Ad quas au-
tem

tem te voco? velim ad omnes ire, sed in tempore. *Naturalem* nunc seponamus: *Narratiuam* ingero, quam vulgò & peculiariter Historiam etiam appellamus. Ad hanc priusquam venias, duo præmittenda sunt, *Geographia* & *Chronologia*. Illa, vt locorum, regionum, vrbium notitiâ aliquam concilies; hæc, vt temporum, quibus quæque res gestæ. Sed communem dumtaxat, & non illam exactam notitiâ exigo: satis sit mundi partes situsque distinguere; prouincias, & in iis flumina, montes, opida clariora nouisse. In temporibus etiam, seriem eorum & ordinem tenere, & velut terminis quibusdam finire imperia, bella, euentus. Velim equidem, & tacitus sæpè opto, imò ipse meditor, esse qui breuiter & compendio, & quod caput est, iudicio, ab orbe condito velut Fastos concinnet: nec aliud quam annos, & præcipua rerum, notet ac libet. Qui hæcenus fecere, aut confundunt nimis, aut diffundunt: & nec notabilia aut laudabilia tamen maximè excerpunt. Sed hoc dum fiat, potes Eusebio vti, & nouellis quibusdam, qui herè & nuper prodierunt. Atque ista cum parauimus, age ad ipsam iam Historiam: & quam præmittimus? pietas vult *Diuinam*. Facilis ea est, nec diu tenebit. *Judaica* vetus est, è libris sacris, Iosepho, & eius interprete Hegesippo petenda: nostra hæc noua, id est *Christiana*, olim ex Eusebio, Sozomeno, pluribus, nunc ex vno Cæsare Baronio adfatim haurietur: & quid in diligentia viri tantâ deest? Imò vt supersit, vereor: iis vtique, qui ex professo Theologos non agunt, & sufficit vniuersè initia, progressum, dissidia, capita & antistites religionis nostræ scire. Non abnuo. compendium bonum exactissimi illius laboris sit, non sit fortassè bono auctoris. Est & *Miscella* religionis historia. vt Mahumetanæ, quæ magnam orbis partem, à multis iam sæculis, obtinet; vt Sinensium, Indorum, & qui alij vanam & simulacris seruam eam habent. Hæc quoque carptim quis neget viro Politico & experienti libanda esse? sed vt dixi, carptim. *Humana* superest: illa præcipua quò te voco. Præter prudentiam & rerum peritiâ,

Hæc tibi virtutum stimulos, hæc semina laudum,

Hæc exempla dabit:

alibi vberius laudata & laudanda, nunc præeunda. Duplicem eam feci, *Priuatam* & *Publicam*. Ab utrâ ordiemur? A *Publica*

ego.

ego cenſeo : & hæc, ordinis doctrinæque cauſſâ, quadruplex iterum eſto. Valdè, inquires, diuidis. Fateor. nec animi vel argutiarum cauſſâ : ſed quia uſu didici, nihil ad methodum, id eſt viam rationemque docendi vel diſcendi, aptius & efficacius eſſe. Itaque Socratem ſequor, Diuiſioni amicum : & cum illo, *diuinum virum habeo, qui commodè & opportunè vtetur*. Sed ad rem, quadruplex hæc Hiſtoria: *Orientalis, Græca, Romana, Barbarâ*. Prima, quæ primi aut priſci orbis res habet : cum noſtra hæc omnia inculta, aut infrequentia, & certè obſcura & ignota. Itaque in Iudæis, Ægyptiis, Æthiopibus, Syris, Perſis, reliquâ Aſiâ, res ferè & nobiliores euentus tunc ſiſtunt : aut ſiquid admixtum, leue eſt, nec ſcriptione aut lectione diuellendum. Hanc primò noſci ſuaſeam : & peti à *Juſtino* breuiter: vberiùs deinde ab *Herodoto, Diodoro Siculo*, & ſiqui Græcorum eam ſuis miſcent. Quædam enim *Polybius, Plutarchus, Zonaras*, alij ſuggerent, huc apponenda. Sed Diodorum ego laudo & approbo: vtinam plenum &, vt ſcripſit, abſolutum. Altera eſt, *Græca*. in quâ Spartanorum, Athenienſium, Thebanorum, & præcipuè Macedonum res ſunt : quos huc traho, & includo. Præter iam dictos, dabunt *Thucydides, Plutarchus, Arrianus*, & *Q. Curtius* è Latinis. Per partes colligenda eſt. nam qui totam & ordine ſcripſerit, totus ad nos non venit. Tertia *Romana* eſt : in quâ vbertim rerum & euentuum, eorumque inſignium: & quæ plures ſcriptores illuſtrant. O magnum, ô pulchrum imperium ! & addo, diuturnum. ideoq. non mirum ſi viris factis que breuia illa & fugacia Græcorum ſuperauit. *Græci præceptis valent* (ait quiſpiam) *Romani exemplis*. Et hercules ita eſt. non fuit gens, puto non erit, quæ plura vel in militiâ vel in pace, laudis & virtutis ſuppeditabit. Itaque ad hanc, mi adoleſcens, ad hanc ſegetem veni, manipulos frugum collige, & in uſum tuum reconde. Sed vt ordine fiat, caipſa diuidatur triſariam : in *Veterem, Mediam, Nouam*. Prima mihi eſt, à Regibus & vrbe conditâ, ad Auguſtum: *Media*, cum immutato ſtatu ad Principes ventum: *Noua*, cum iterum immutato, ſedes ipſa Principatus Byzantium eſt translata. In *Veteri* ſcriptores Græci Latini que ſunt, ſed præcipui iſti: *Dionyſius Halicarnaſſæus, T. Livius, Polybius, Plutarchus, Appianus*: quibus compendia adiungere liceat, *Velleij, Flori, Eutropij, Oroſij*. Velleianum laudabile fuit; ſed
potior

potior pars periit. iudicio & ordine tamen scriptum, & quod exemplat pleniori Chronologiæ sit ad imitandum. Faciant huic parti *Fasti Romani* à *Carolo Sigonio* editi, & producti ad Augustum. At in *Mediâ*, noliter *Tacitus*, *Suetonius*, *Ammianus*, *Spartianus*, & adiuncti Cæsarei Scriptores: è Græcis autem, *Dio Cassius*, *Jo. Zonaras*, *Herodianus*, legendi tum & Compendium *P. Victoris*, itemque *Eutropij*. Adde ad seriem temporum, imò & rerum lucem, *Onufrij Panuinij Fastos*, ab Augusto ad Iustinianum diligenter & industriè consignatos. *Nona* superest. & in eâ ferè Græci isti, *Zonaras*, *Zosimus*, *Procopius*, *Agathias*, *Nicetas Choniates*, *Nicephorus Gregoras*, *Michaël Glycas*, *Georgius Cedrenus*: etsi hîc ultimus quidem, aniliū sapè fabellarum scriptor, & veri incuriosus vel ignarus. Iudicio legatur tamen, dabit quod iuuet. De *Romanâ* habes: quarta erat *Barbarica*: quid nisi lacinia & spoliū ab illâ veste? Nam hanc appello & intellego, cū scisso fractoque imperio, maior pars ad Gallos, Germanos, Turcas iuit, & alternatim hucusque manſit. Nec enim Gothos, Hunnos, Vandalos, Scythas aut illam faciem huc includo: quæ maneat in *Mediâ* aut *Novâ Romanâ*, & ii. inserta nempe legetur. Faciunt huc propriè tamen *Jornandes*, *Procopius*, *Agathias*, & siqui tales. Sed meam hanc Barbaricam varij scripsere, atque ipsi ferè barbari, & addam barbarè. exstantque *Germanici*, *Gallici*, *Britannici* scriptores, in vnum corpus nuper decore & utiliter conducti ac vulgati. Sunt & *Annales* à *P. Pythæo* editi: & cottidie huiusce argumenti prodeunt; iudicio eligendi. Scripsit & *Carolus Sigonius* de Regno Italiæ, quod huc facit: & *Io. Leunclavius* Turcica, vterque mihi bonus & laudatus. Quid omitto? *Lænicus Chalcondylas* se suggerit, in Turcicis Græcisque legendus, item *Guilielmus Tyrinus*, & alij in transmarinis sacrisque bellis. Hem, inquires, quanta materia, & quæ silua? quis ingreditur sine errore, & egreditur? qui Ordine insistet, qui industriam & Curam adferet, iam dicenda. Ordine, inquam, inprimis opus. & ne confusa & vaga lectio sit, aut defultoria & interrupta. Hoc plerisque evenit. & velut ex equo in equum se traiciunt, ab hoc scriptore in alium, ab isto argumento in illud: quo fructus momentaneæ voluptatis, & ut tempus suum, imò & se, fallant. Apage tales istos, & ad *Amadæum* suum, aut si altius assurgere velint, *Heliodo-*

rum cant. Tu Ordine leges. quem ex ipsis à me dictis etsi potes instituire : tamen in exemplo dabo . Ecce Romanam *Veterem* legere decreui. ordiar ab vniuersali aliquâ notitiâ , & Compendium *Flori*, aut *Eutropij* præmittam. Tum à capite, & ab ipso *Liui*o : cui *Dionysium* adiungam, & *Polybium*, *Plutarchum*, aut *Appianum* : sed quemque in consimili argumento. Cùm peregero, ad *Mediam Nouam*que veniam, & constantiâ eâdem peragrabo . Et de *Ordine* facile est, atque animi tantùm decreto opus : *Cura* plus habet operæ, & in eâ omnis est legentium fructus. Duo in hâc specto, siue exigo : *Attentionem*, & *Electiorem*. Cùm legis, non suspensum aut attonitum te habeat tantùm nouitas aut magnitudo euentuum : insiste, inquire, cui rei hoc facere possit, & eequem usum sui præbere. Mora hîc aliqua inter legendum & tarditas, fateor : sed nimirum, dicto veteri, *Nulla res potest esse eadem, festinata simul & examinata : nec esse quidquam omnium, quod habeat laudem diligentie, simul & gratiam celeritatis*. Tarda igitur, & quære. cùm repperisti, tum sit *Electio* : id est, vt stilum capias & excerptas, & velut annonam in horrea quædam reponas. Ea distincta etiam sint, & iamantè libri parati, meo iudicio, quattuor ; in quos, quidquid eligis, conferas & tutò deponas. Nam memoriæ suæ qui credit tantùm : quid agit ? non dicam nihil, sed in breue, proficit : nec vlla ea tam vasta, capax, tenax est, quæ varia ista cum fide asseruet & reddat. Trade libris. in quo labor aliquis, & iterùm in legendo remora : sed, mihi crede, utilis, si quidquam in omni ratione studiorum. Libri isti quattuor, totidem titulos habeant rerum, quas præcipuè in Historiis notes : *Memorabilem*, *Ritualium*, *Ciuilium*, *Moralium*. Quid *Memorabilia* ? res designo magnas, & cum admiratione aut motu legendas, siue audiendas. vt est notabilis *Potentia* alicuius regis aut populi, *Opera*, vel *Opes*, *Prodigia*, & noui aut insoliti *Euentus*. vno verbo quidquid non obuium, & magnitudine vel raritate se commendat. *Ritualia* autem, quæ pertinent ad instituta ritusq. veteres, siue quos in publico, siue in priuato vsurpabant. Alios enim istos Orientales, Græci, Romaniq. habuerunt : & ab eâ notitiâ, seria omnis intellegentia dependet veterum scriptorum. At *Ciuilia* appello, quæ ad vitam & regimen commune faciunt, & hanc hominum iure & legibus deuinctam societatem. *Moralia* denique

denique, ea quæ priuatim ad nos & vitam formandam, virtutibus amicam, vitiis alienam. Ecce, quattuor hi sunt *Tituli*: quid superest? referre in eos, quidquid ad singulos illos facit, siue *Sententiarum*, siue *Exemplorum*: idque cum hac *Attentionis* curâ, & *Judicij* item normâ. Dic clariùs, inquires. Nempe quisque liber alios & minores suos titulos habeat: quia Natura & Memoria ordine & partitione istâ gaudent. Vt, ille *Memorabilem*, in ea quæ attigi: nec nimis sanè argumentum hoc patet. Latissimè *Ritualium*: ac diuidamus in *Sacra* & *Profana*. Sacra omnia publica: continentque *Deos*, & eorum *Nomina*, item *Cognomina*: tum *Insignia*, *Munia*, *Cultum*, & *Templa*. Amplius, *Sacerdotes*, aliosq. ministrorum *Sacrificia* ipsa, *Hosias*, *Cerimonias* & ritus: deniq. *Verba sollemnia* & formulas precationum, & quidquid illos aut ista spectat. Nimis partiri, tenue est, & hîc inutile: spernes. Iam *Profana* sequuntur: atque ea duplicia, *Publica*, & *Priuate*. Illa, quæ communiter omnes aut plures tangunt, & publicis legibus aut institutis continentur vt *Magistratus*, & singulorum *Munia*, aut *Ornamenta*: vt *Senatus*, *Militia*, *Prouinciæ*: *Prefectura*, *Officia*, & quidquid istis adhæret. tum *Leges*, *Judicia*, & eorum ratio, *Supplicia*, *Tormenta*, *Pœnæ*: lætiora denique, *Ludi* & *Spētacula*, *Triumph*i & *Festi* dies. Ad *Priuate* venio, & iis subiungo, *Nuptias*, *Funera*, *Balnea*, *Conuiuia*, *Vestes*, *Nummos*, & quæ longum sit complecti. Minuta enim etiam intercurrent: sed in sermone ostendenda potius, quàm scripto adumbranda. Imò ad eò minuta, vt nec Titulos suos grandiores quædam habeant: sed verbis signentur, & ordine isto litterarum. Ac si me audis, in pletisque eo vtêris: quia non ad famam aut pompam ista disponuntur, sed tui vsum. Sequuntur & excipiunt *Ciuilia*: vtilissima pars iis, quos genus aut destinatio ad rempublicam vocant. Is liber tres partes habeat, antiquâ & verissimâ diuisione: *Status Regum*, *Optimatum*, *Populi*. In quaque parte notes, & eò referas, quæ *Firmandæ* sint, aut *Vertendæ*: & hæc ipsa subtiliùs diuidas, vt à me in *Politiciis* factum. Vtar hoc exemplo cum fiduciâ: & conueniant vel qui noua adferunt, aut vetera referunt, non dabunt in ordine & methodo, quod fortassè anteponas. Sed vnum etiam addi potest, & debet. vel vt *Sententiæ* plures vni rei congerantur; vel vt *Exempla*. Hanc postremam partem non neglexi equidem, & habeo

sepositam imò paratam in scriniis, & auidam exire. Sed tu aut alius, non ideo remitte: & quisque sibi, vel firmitus, vel iucundius certè, tale aliquid struit. Postrema sunt *Moralia* quorum duæ partes, *Virtutum & Vitiorum*. Velim & hæc disponi ordine litterarum: sed ita, ut *Virtute* præeunte, cuique bina sua *Vitia* sint subiuncta. Traho eodem etiam non *Vitia* propriè, sed *Affectus*: & *Cupidinum* stirpes, *Spem*, *Metum*, *Gaudium*, *Dolorem* adnecto: tum etiam de *Beatâ Vitâ*, & quidquid in *Ethicis* sedem suam habet. Sed satis hæc communia in scripto præiui: in sermone alia. illud in fine te sedulò moneo, ut ne mole hæc, quæ videtur, absterreare. Quid enim? tam varia, tam multa? inquires. Nihil est: imò incredibile, quàm citò hæc suscipiantur, & fiant, si tenor & constantia sit, & quisque dies opus suum probet. Triennij res, non diu te differo: mihi si olim talis monitor, vel citius absoluissem. Cogita te in ipso flore æui, & corpus labori, animum intentioni ferendæ esse: quid cessamus,

Dum res, & ætas, & sororum

Fila trium patiuntur atra?

Non fac, mi adolescens: cui ego factum consultumque tuâ causâ volo, tum & Cl^{ma} V. Legati regij: qui etsi connubio tantum tibi parens, tamen vel naturalem affectu & curâ præstat. Tu agnosce, illum cole, me & bona ama. Louanij, III. Non. Decemb. ∞. IOC.

EPISTOLA LXII.

IOANNI DRENCKWAIRTO, *Thesaurario Belgicæ.*

DIVINA planè virgulâ (quomodo enim aliter interpreter?) factum videtur, ut ipsâ horâ ac pænè momento, quo tuas accepi, hic ad me veniret, quem vides. Est mihi cognatione aliquâ iunctus, orbus utroque parente, in stirpe honestâ exiguis & vix dicendis opibus: tamen auxilio amicorum ad Magisterij gradum peruenit. A quibus ipsis litteræ mihi commendaticie pro subsidio, ut Theologiæ studia, ad quæ adspirat, ordiri & finire feliciter possit. Equidè cum humanissimam, & cui obligor, oblationem tuâ viderem, & vnâ istum: putavi, ut dixi, diuinitus fuisse hunc concursum: & eundem statui, eo fine, sedulò commendare. Non ut cognatum tamen, nec hos adspectus in istâ
re ha

re habeo: sed vt boni ingenij & industriæ, vt notæ modestiæ iuuenem, & quitoto animo ad Pietatem & sacra studia, imò & sacram vitam, id est Sacerdotium, contendit. Iuua eum in laudabili hoc cursu: nos quoque secundas faciemus, & in libris aliisque necessariis iuuabimus, pro parte. Ego spondere audeo vtilem Ecclesiæ futurum, & beneficij tui non ipsum solùm, sed & nos memores: qui adfiduè nouis à te, nec inuiti, obligamur. Non enim hîc, vt in pecuniâ, redditione aut re opus, vt soluaris: sed agnitione & grato animo. quæ in nobis largiter esse & fore assero, quamdiu Deus ille dabit hîc esse. Ille te Ampl^{me} & Nobil^{me} Domine, longæuum reip. nostræ & Principibus præstet. Louanij, prid. Nonas Decemb. ∞. 10C.

EPISTOLA LXIII. *Mediolanum.*ERYCIO PVTEANO *suo* S. D.

EGO verò honestissimum munus, à Senatu Mediolanensi in te collatum, & iudicio meo approbauî, & gratulatione etiam profectus sum: quam scripto consignatam per Velserrum nostrum misi. An aliter possem? placet, placet hæc tui productio: sustine personam, quam sumpsisti, & increare non vnâ palmam. Sola gloria multis

— *quemuis perferre laborem*

Suadet, & inducit noctes vigilare serenas:

te & hæc, & merces quæ etiam functioni tuæ est adiuncta. Orationem, de quâ scribis, auspicalem tuæ operæ, libens videbo: libentius *Promissidem Epistolarum*. quidni? mihi inscriptam. Ambigis an amplectar? utrâque manu: veniat & ad libentem, & addam etiam inerentem. Non negabis mi Puteane, si non seui-
mus hanc arborem, tamen rigauimus, putauimus: & in parte fecimus, qualem alij mirantur, & ipsa esse gaudet. An iniurium, si fructus aliquos ex eâ mihi asseram? imò veniant & vescar istos primotinos, & hæc libamenta audacter nobis pone. Nos quoque iam edimus EPISTOLARVM CENTVRIAM III. ad solos Italos aut Hispanos (causa discernendi sic fuit) siue qui in iis oris. In iis & tuum nomen interlucet, & Sacci nostri, & plurium ibi amicorum. Septalium esse in te, qui est, gaudeo, & beneficia hæc

111 3 mihi

mihi etiam inscribo. Quid si ad eum ipsum hoc scribam? puto, nisi abstrahor: tu vale, ille salueat. Louanij, xv. Kal. Ianuar. anni ∞. IOCI.

Hub. Audeantius meus Carmen parabat Promulsidi tuæ præponendum. Est is qui nuper ad te scripsit. ama amore dignum.

EPISTOLA LXIIII. *Bruxellam.*

PETRO PANTINO *Decano.*

EN CENTVRIAM nostram, de quâ antè scripsi. Dic seriò quid videtur? damus & subserimus alias? an satis est vnius huius erroris? Iudicium à te peto, quod pauci mihi donent (ô miseriam!) inter meos Belgas. Nam doctrinæ aut litterarum studia quò eant, vides. in terras certè alias: aut fortassis eò denique, quò olim Astræa Nimbis à Galliâ dissipatus videtur, iterumque ibi **serenus* *atq.* *disip.* si tamen regiâ & bonâ fide hæ res geruntur. Nam sunt qui verentur ne fallax serenitas, & in nos incumbat ac detonet nubes illa belli. Abominor, & Deum patrię tutorem precor, & tibi Vir Reu^{de} & Clariss^{me}. Louanij, x. Kal. Mart. ∞. IOCI.

EPISTOLA LXV. *Mechliniam.*

HADRIANO VANDER-BVRCHIO I^{ns} & *Consiliario*
in Senatu Geldric S. D.

EN ad te quoque CENTVRIAM istam. quidni autem? qui & me ainas, & mea æstimas; atque adeò istis quoque leuioribus pretium aliquod donas. Vtinam tecum alij! sed vereor vt tuum punctum amor mihi donet; alij refragentur, quibus iudicium in iudicio hoc adhibetur. Sed vtcumque, vel error tuus gratus est ab eâ causâ: & Numen precor, etiamsi ille definit, ista perseveret semper. Vale Vir Cl^{me}. Louanij, x. Kal. Mart. ∞. IOCL

EPISTOLA LXVI. *Bruxellam.*. PETRO PANTINO *Decano.*

Tv verò non ambigens & cunctanter, sed liberè & apertâ fronte petere debebas istud, quod tribui à me vides ambitioni etiam vulgarium ingeniorum: quid non Pantino meo, vndique sic merenti? Feci igitur, & hîc habes: vtinam pro tui pretio, pro meo affectu! Meletæas chartas æquarem, si hoc esset: nunc vires conantem deserunt, nec ad alta assurgimus vel studiis fatigati, vel languoribus fracti. Agnosce, & animum certè amicum ama. Louanij, v. Idus Mart. ∞. ICCI.

I. LIPSI

SVPER SS. PATRVN SYNTAGMATE

nouiter à PETRO PANTINO V. R. & Cl^{mo}

vulgato, & eruditè verso,

Phaleuci.

QVIS nouus liber hic? Liber sacratus,
 Sacra nomina, res habet sacratas.
 Quis auctor? varij, vetusto ab æuo:
 Cum mos & pietas vetus vigeant.
 Quis produxit? & ipse moris, atque
 Virtutis veteris: vetustiorum
 Gnarus artium, & vtriusque lingue,
 PANTINVS meus. ille, comparata
 Cui niues videantur esse nigrae:
 Quem suum veteres velint Athena,
 Quem suum vetus ipsa Roma dici:
 Quem meum cupio, & meum esse iacto:
 Cui, dum corpore mens mea illigatur,
 Fido & firmo adamante colligabor.
 Quod SANCVS pater audiat, FIDESQUE.

REMACLO ROBERTI S. D.

DE Transsylvaniâ mitiora nos hîc audiebamus, & conatum magis turbandi pellendique, quàm effectû fuisse. Opro ita sit. quia hercules eâ provinciâ, post Canisiam, nunc amissâ: quid spei super de Hungariâ maneat? Quæ & nunc tenuis, nisi alia consilia & fœdera Principes incant ac iungant. qui ferè (veteri Europæ morbo) suis dissidiis & bellis atteruntur, publici discriminis securi aut negligentes. In Belgicâ nostrâ re, ego plagam aut plagas hac ætate metuo: nec video equidem valdè comparatos ad arcendum. De Buscoducis (quanti momenti opido?) occultus rumor est ciues languidiores fieri, & vt verbo dicam, nauscare. Si vis adhibetur, vereor vt, quod ferre possunt, ferant. Sed vobis hæc notiora. Quod nuper scribebas de libris apud te, quosdam vidi, quosdam nunc non lubet nec vacat. NN. ego habeo, & obiter legi: neque nimis me cepit. Legatus Regius recen- ter de te amicè & benignè scripsit, sensitque. Ita enim de can- dore eius mihi polliceor, & dicta in rem collaturum, vbi occa- sio erit. Tu in eâ officium & salutem à me defer, & hanc ipsè voto inco habe. Louanij, III. Idus Mart. ∞. IOCI.

EPISTOLA LXVIII.

IOANNI DRENCKWAIRTO, *Thesaurario supremo.*

DVO voueo. & lætum tibi hoc sollenne, & plura, quæ va- lens lætusque addas: tum & in me eiusmodi culpas, quæ tali pœnitentiâ luantur. Tu me silentio offenderis? non potes in tuis occupationibus quas noui, & quæ rempublicam nostram summam tangunt: nec, absque iis, causâ erat aut materies li- teris respondendi, quæ nihil nisi affectus mei auram ad te mit- tebant. At tu benignè quasi offensam agnoscis, & optimo vino (gustavi enim heri) luis: quid nisi gaudente me in hoc affectu, & pro eo gratias agente, & perseuerantiam optante? Inò & spe- rante. quia à me, pro viribus quidem, semper alimentum ei erit in officiis & cultu, quem tibi debemus. De tuo Balduino, non possum nisi bona dicere, & meliora prædicere: ita & mores

eius & ingenium omnia ea præstant, aut spondent. Modestia & probitas adsunt, quæ à stirpe & gente traxit: adest industria, & acrimonia ingenij, quæ à Deo dona habet. Iudicium adhuc formandum in multis, ut hæc eius ætas est: sed & supra ætatem in multis rectum & maturum habet. Confidentia, & securitas, & illa dispositio sermonum paullatim accedent: & nos elaborabimus polire, & reddere te dignum. In studiis iamdiu est cum me auctore ius civile etiam adiunxit; titulum Baccalauræi meruit; & disputationes publicas ac priuatas (in quibus plurimum momenti est) adit. Itaque sperarem, & ausim promittere eum aptum futurum, qui proximâ hieme Licentiæ titulo insigniatur. Præmaturum est, inquires. Ita, si ætatem vides: non est, si progressum, & comitunein nunc etiam morem. Mouet me & causa, quod velim tempestiuè eum ad res admoueri, & tuæ auctoritatis velut manu educi & attolli. Nam spes certè omnis dignitatis eius in te est (post Deum quidem?) & te tamen mortalem esse, cogitare cogimur, etsi multos annos vouemus etiam & destinamus. Sed hoc totum iudicij tui & prudentiæ facimus: & tempus superest deliberandi. Anpl^{me} & Nobil^{me} Domine, vale. Louanij, VIII. Kal. Maias. ∞. IOCI.

EPISTOLA LXIX.

Lutetiam.

ISAACO CASAVBONO S. D.

BARONIVS meus nondum venit, tuas tamen, quasi inेतatores præmisit hospitio indicendo, sanè gratas. Placuisse ipsum vobis, gaudeo: utinam diutiùs in illo sole velut colorem potuisset ducere: sed negauit ille, cui ipsum nihil negare ratio iubet. De te quod addis, exuere paullatim scribendi edendique animum: malè narras, nolim. Tu in illo ætatis ingeniiq; flore? & addam etiam, famâ ac fauore sic adspirante? Nam habes ea certè à doctis: ab omnibus si exspectas, tum licet alias res agas, & has paucorum hominum facias missas. Iustius mihi ea mens sit, annorum, laborum, morborum veteri: & cui omnis lex & mos det missionem. Tamen perseuero, etsi vereor ut vel inuitum soluat illa * *δυσία* & *ἀσπασία*, graue onus, & quam nullâ me-
dicinâ aut curâ excutimus, vix leuamus. Itaque SENECA meus *incur. ali-
li morbus.*

KKk

diu

diu iacuit, nescio an attollendus. *EPISTOLAS* nuper dedi, sed ad Italos & Hispanos tantum: quia nihil ad vos, & logi aliquot aut inaniæ sunt, pûditum est mittere. Sed heus, loci sunt in Senecâ, in quibus hæremus aut pendemus, & possis mihi subsistere. ut in illo Consolationis Heliuanæ cap. x. *Ingens Capitoli vetigal*, de Apicij luxu. Quid hoc ad eum? an comparatio est? an & mutatio placeat? Consolationis Polybianæ, cap. xxxv. *In quas per templa aditur*: De Palatio accipimus, ubi templa, sci, sed an sic in aditu? & per ipsa intratum? De Irâ iii. cap. xxii. *Huius nepos fuit Alexander, qui lanceam*. Mirum, si Antigoni illius nepos, qui ipse inter successores fuit: & nec in nomine quidè error, quia nemo talis inter Macedonas reges proavos. Atqui mox etiam addit: *Non habuit hoc autum ille vitium*. Plura talia alibi in isto aut noto, aut corrigo: sed hoc noto tantum *In Militiâ* etiam nostrâ, quid tibi videtur de *tripedali parma diametro*: de *Pili, palmari*? aliud à me sentis aut habes? doce volentem & imputaturum, & salue. Illud autem de frigore tuo in scribendo, iterum serio ingero: *Ὁ νῦν δὲ αὐτὸς νῦν ἔχων ἡ τρυφάει*. Incalcesce. Louanij, ix. Kal. Maijas. ∞. ICCI.

* *Hæc ipse
mens, mihi
crede,
mentem
non habet.*

EPISTOLA LXX.

Antuerpiam.

IO. BAPTISTAE BARONIO S. D.

GAVDEO te rediisse, et si præter opinionem meam factum. Causas parenti tuo fuisse non dubito, & vel illa causa sufficit, quod voluit parens. Quæ Gallia placuerit, quæ ibi homines, atque alia, servabimus in sermonem, auidè tecum miscendum, atque etiam amplexum. Veni, veni. sed quando? de de scire velim. nam ego peregrinatiunculam paro in Nervios, & amici iamdiu eò inuitant. Nolim te me absentem requirere, & doleam si fiat. Tamen, ut tuæ litteræ erant, intra paucos dies, atque ad eò hâc septimanâ, te expectamus. Domum è quâ egresus es nosti: caue aliam ingredi, quamdiu ego vivo. Vides non rogare me hoc, sed iubere. Neque enim omni vindictâ te mandamisi, & attineo vinculo aliquo obsequij, quod bono iure non laxes. Vale, & avum, parentem, fratres saluta. Louanij, viii. Kal. Maias. ∞. ICCI.

EPI-

EPISTOLA LXXI.

Dolan.

IO. BEZANCENOTTO S. D.

AN & Ith titulum addam? certè donatum eo iam cum fratre esse, ex litteris colligo, quas ad me dedisti. Amo & scripturam tuam, mi Bezancenotte, & iamdiu ipsum te: idque ob ingenij melioris dotes, quas Deus dedit. Excolere eas coepisti, & proferre: sed cum aetate magis & magis: & nunc denique è scholis & umbrâ ad fori & rerum lucem actionemque venitis. in quâ versari vos cum laude, id est cum fide & probitate, velim atque optem. Doctrinam certè adferetis (nam & fratrem tuum includo:) sed per Deum immortalem, Themidi vestræ Mineruam etiam miscete, & Sapientiæ illa decreta adsumite, sine quibus in hac rerum caligine non est, mihi credere, pergere viam rectam. Ut in familiâ opus est herâ ac dominâ, quæ coërceat: sic in hac interiore œconomiâ, Sapientiæ illo imperio, quod affectus regat ac dirigat exultantes. Facite, ita Deus vobis fauceat, & honore simul ac virtute mactet. Louanij, prid. Kal. Maijas. ∞. 1001.

EPISTOLA LXXII.

*Bruxellam.*NICOLAO DE WEERDT Ith & Cognato.

BENE est, benè est, pecuniam adnumeratam esse: nequid vltra tergiversetur vel mutet noster ille Proteus. liceat sic appellare meum Fabrum, virum bonum quidem, sed parùm in verbis aut pactis (sensi aliquoties) stabilem, & qui aliquid trahat à leuitate sui ignis. Nunc tenetur, & vel anguis fiat, non elabatur. Hoc igitur latum; illud mordet, quòd de aduentu tuo distulisti. An mecum igitur in reditu vis, & iam nunc spondes? At ecce quia meliorem Bacchum, & è femore Iouis natum, gustare apud me noluisti, ego velut in poenam, tristiores istum & Semelenatum (Becani argutiolas agnoscis) bibendum ad te mitto. Rogo, extra iocum, munusculum volēs accipias, quod à volente scis mitti: & spero in suo genere non inter vilissima futurum. Gustus tui, tuam etiam addo, res erit: & si sedebit, ecce fontem è quo quotannis petas. Flores mei cladem, ut scripsi, magnam passi erant: reparauit in parte & supplementa accisis copiis misit Gaspar Taius, Goïckensis toparcha, sanequàm opportunè &

benignè. Gaude hoc mecum : nam & tibi in meo horto feritur & metitur, atque illo crescente crescet etiam tuus. Vale. Louanij, prid. Kal. Maijas. ∞. IOCI.

EPISTOLA LXXIII.

Brugas.

GORN. ANCHEMANTO suo S. D.

VALERE te, & apud tuos etiam esse, mihi quidem placet. At non mihi, inquires, in hoc otio & desidiâ. Credo. sed patriæ & tuis aliquod etiam tempus dandum est, à quibus diutulè abfuisti. Prouidè item & lentè agendum de Peregrinatione. quam ego in Galliam nunc non dissuadeam, quia res quietæ & firmæ videntur, per Allobrogicam hanc pactionem. Antea hercules hærebam, & ne nos traheremur in partes, id est in vetera mala & bellum. Itaque si amicis tuis idem videtur, & sedet te aliquò ablegare : age, cum bono Deo, fiat in Galliam, doctrinæ & elegantix iam olim sedem. De Italiâ, post illam deliberabimus. Tu tantum cogita iam nunc & imbibere, ut immunem te serues à noxis & vitiis, quæ in eâ regione, per bella ciuica maximè, pullularunt. Luxus, libido, *debetia*, regnum in multis locis habent: coërce te & abstine, & Honesti illum splendorem & Numen ante oculos pone, quæ fumos aut nebulas istas dissipabunt. Didicisse te ostende, non ut scias quid deceat, sed vsurpes.

Et grauibz curis, animum sortita virilem;

Igneæ longæuo frænctur corde iuuentus.

Quibus curis? scientiæ & prudentiæ, quæ scopum peregrinationi tuæ habes. Addo Virtutem : quæ suprema cura, & finium, ut ita dicam, finis : quam sic stringe, ut ab hac vitâ citius, quàm ab eâ auellaris. Ita abi, & redi, semper meus, si illius. Louanij, VIII. Kal. Iun. ∞. IOCI.

EPISTOLA LXXIV.

In castra.

IOANNI SEVRIO, Legato Hispaniensi à Secretis.

BENIVOLENTIAM, quam serino tuus nuper spirabat, nunc & litteræ. quid debeo? quid, nisi eandem beniuolentiam? quam animo huic firmo caractere impressam, audeo dicere, & non nisi mecum delendam. Tu foue, mutuuum à me fiet. Conquereris de discessu meo inopinato : sed ita res tulit, & diutius domo

domo & scholis abfueram, quàm meus aut publicus etiam vſus eſſet. Ea cauſſa mihi ſubductionis. alioqui, Genium teſtor, ſuaue eſſet apud veſtri ſimiles agere; vt frontem atque animum exporrigere, vel ſtudiorum ſeueritate, vel temporum hæc moeſtitiâ contractum. Non licet, & in animi etiam libertate ſeruitus aliqua externa adiuncta, quam nullæ vindictæ hîc quidem reſoluant. Publica per te didici, in ſpe magis quàm in re læta. Sed tamen aut ego nihil in Principum rebus video, aut aliud aliquid agitur & arcanè apparatur, quàm vulgares iſti oculi aut mentes vident. Eâ cogitatione ſæpè me ſirmit. & niſi ſit; fateor liberè, vt nunc res eunt aut potiùs fluunt, nihil me pro votis bonorum, aut dignitate imperantium exſpectare. O dii deæque (liceat ſic indignantem loqui) in tantis opibus, & ybi omnia ad magnitudinem ſic parata & ad manum ſunt, tamdiu nos: ſed deſino. Numen videbit: quod gaudet inuictere iſta humana, ſæpè præter humanam ſpem aut mentem. Noſtrum eſt, quæ non in nobis, ferre, & alto animo excipere omnem caſum. De pace, ſiquid cum Turcis conueniet, mirabor, & gaudebo. Neque negem; hoc ſtatu Chriſtianæ rei; quamcumque illam optabilem & vtilem fore. Mihi tua amicitia: quam de latam amplector, & tenebo: & tu me in ſinu illo mentis. Louanij, III. Kal. Iul. ∞. IOCI.

EPISTOLA LXXV.

THEODORO CÂNTERO S. D.

LAETIS oculis atque animo litteras tuas vidi, legi: & præne dicam,

— *Amycleis velut exſultauit arenis*

Pæſtor, ad Jdeas Helenâ veniente carinas.

Vetus inter nos amor, & ab honeſtiſſimâ ſtudiorum ſocietate eſt; quem temporum hæc iniquitas interpellare, non abrumperè potuit: & in me quidem viuit vixitque cum affectu & fide, qualem tu litteris his præfers, & volenti credenti que reſtaris. Ita ſit vtriſque, & maneat: nec externa iſta diſſidia animos tangent aut polluant, ab eâ labe iure ſuo exſortes. Finem illorum ſi exſpectamus, quando erit? cùm nos non erimus fortæſſe. adeo pertinax Fortuna Belgis incumbit,

— quæ procudit enses

Et socias inimicat urbes.

Heu, quot iam illa

*. hominū
validas Or-
co proiecit
prociat.

— ἰφθίμους καὶ ἀλὰς αἰδοῖ περὶ τὰς;

& adhuc προάφει, vt rerum hæc facies minatur. Tu sapiens interea & felix, qui quantum potes reductus à fluctibus terram legis, & tibi studiisq̃ue asseris, vnico in his turbis solatio & leuamento. In me quidem sic experior,

— quem mea tellus

Lare secreto tutoq̃ue tegit:

Cap. VIII.

libris & scriptis inuolutum. Ergo eundem animuin iure tibi gratulor; & siquid adiutum aut alleuatum hîc ire possim, habes volentem & audientem. Significas de Eleusiniis sacris syntagma te parare: sed in quæ etiam illa Cybeles & Isidis includas. Probo, & pergere adhortor: quia pars ea factorum multas ἀρχαίας habet, & ad lucem etiam scriptorum nostrorum, qui primitus profana illa & superstitiosa abiecerunt. Equidem non deero, vbi distinctè rogabis, suppetiari: atque adeò etiam nunc vltro aliquid de Cybeleis factis adiungo. In Suetonij Othone est, Expeditionem impigrè incubasse, die quo cultores matris Deum lumentari & plangere incipiunt: atque id inter tristia omina recenset. Interpretes referunt ad diem vi. Kal. Aprilium: quia in Annimiano ita legerunt, lib. xxvi. Ad diem vi. Kal. (Apriles) quo Romæ matris Deum pompa celebrantur annales, & carpentum, quo vehitur simulacrum, Almonis vndis ablui perhibetur. Errant. imò ad ix. Kal. Apriles referendum est, qui dies Sanguinis dicebatur. Is enim tristis, & planctus tunc suos Galli ordiebantur, atque adeò corporum sectiones. Trebellius Pollio in Claudio: Cùm esset nuntiatum ix. Kal. Apriles, ipso in sacrario Matris, Sanguinis die, Claudium Imp. factum, neque cogi Senatus, sacrorum causâ, posset. Vnde diem sollemni veneratione, & illo nomine fuisse: quod Tertullianus in Carminibus ad Senatorem adfirmat. de Gallis:

Mente fremunt, lacerant corpus, funduntq̃ue cruorem.

Quale sacrum est, vero quod fertur nomine SANGVIS?

Causam etiam ibi nominis habes, quia tunc sanguinem utiunt fundere, ac perseuerant vsque ad diem illum (Annimiano notatum) vi. Calendarum, quo Lavatio instituitur, & huiusmodi suos

suos ponunt. Stadius:

*Est locus ante urbem, quàm primùm nascitur ingens
Appia, quaq. Italo GEMITVS Albone Cybelle
Ponit, & Ideos iam non reminiscitur annes.*

v. silu.

Itaque dies ille tantum abest vt funestio minis, læti potius fuit: & vulgò *Hilaria* dicebatur. Leges in Lamprij Alexandro, *Hilaria matris deum*. De Lauatione porrò, cùm alij, tum Prudētius & c. i. hymno x. & Augustinus II. de Ciuit. cap. IIII. Herodian. l. I. Vides propensionem meam in te & tua studia, magis declarandam si sermonis alteri copia esset. Pollioni nostro dignitatem gratulor, Deū precatus vt bono publico exercebam. Liberi tui quid & quī agunt? iam & alter vxorem habet? In honesto quidem otio, tuo exemplo, esse arbitror: faciant, te venerentur, nos ament. Louanij, prid. Idus Sextil. ∞. ICCI.

EPISTOLA LXXVI *Brugas.*

IANO LERNVTIO S. D.

QUID ait meus Audeantius? irasceris, & tuum
Feruens difficili bile tumet iecur?

Ego rideo, & adeò satisfactionem non offero, vt à te eam poscam. O mens pura, & innocentiae sibi conscia! At aliquid in Carminibus tuis me fugit, nec libere monui aut notauī. Prius potest, alterum abnuo: & quæ vidi, certè monui & scripsi. Fac me aliquid conniuite oculo, aut parum præsentī mente, legisse. Id quoque potest, & vt distractiones meas omittam, quis, quem non in suis & alienis aliquid fugit & elabatur? Siquis est,

— *immolet aquis Hic porcum laribus:*

ego fateor me inter Homericos sepe esse, & oculis non semper acutis, imò nec apertis. Sed hoc mittamus. ego tibi, mi Lernuti, & fui serio & ero amicus,

Dum pecori lupus, & nautis infestus Orion:

Sed de Audeantio meo iterum. adolescens adprobi ingenij est, & in Prudentium aliquid vellet, à te iniectum. Gisellini nostri illius quædam habes: per eum possent edi, & honore non solum saluo illius amici, sed aucto. Cogita, & scribe, aut si probas, mitte. Ostenda vos etiam exercet, sed spe tamen nunc certiore, vt
audimus,

audimus, eius poriundæ. Deus faciat: vtinam ego te aliquando! In Neruiis nuper fui, anno proximo (si vita mihi & vires Morinos fortasse vestros & te, te videbo, quod

Mens desiderii ista fidelibus

nimiùm auct. Ita sim saluus, vt sentio & propono: ille modò

Gentis humane pater atque custos

te meq. in id tempus seruet. Louanij, prid. Idus Sextil. ∞. 1661.

EPISTOLA LXXVII.

IOANNI DRENCKWAIRTO, *supremo Thesaurario.*

EXCVSARE me tibi debeo, etsi immunem à culpâ, sed ne silendo faciam me illi ad finem. Nam fui Antuerpię nuper, & Bruxellâ reuerſi ac te adfari mos meus ac tui cultus volebant: sed mutui, & compendio Mechlinienſi viâ redij, quia monitus eram Præſidis filiũ cum Rubenio reuocari, & subito abeundum eis eſſe. Feſtinaui, vt Valecaperem & dicerem: in eâ tamen ipſâ te deceptus, & tutum non putarunt exſpectare. Eant cum bono Deo: quid autem, ſi in tam bellâ occasione Balduinus tuus cum ipſis? Fateor de titulo capiendo hîc, decretum nuper à te eſſe: ſed & in Italiâ poſſet: nec tales certè itineris comites ſemper ei crit nanciſci. Pro tuâ prudentiâ, Ampliſſime Domine, ſtatues quod è re videbitur: nam mihi indicare conueniebat, tibi iudicare. quem Deus ille publico & nobis incolumem diutiſſimè ſeruet, perpetuo noſtro voto. Louanij, xvii. Kal. Octob. ∞. 1661.

EPISTOLA LXXVIII.

Antuerpiam.

BALTHASARI ROBIANO *Senatori.*

AMICVM amicis me fateor: & ſum hercules opido veſtro, & illi V.C. de quo in ſermone nuper egi. Eò grauius ſero inter ſe diſſidere, & ad litem venire, meo voto, & tuo auxilio (ita cupio) finiendam. Annue hanc operam uni amice. quid honeſtius tibi, & fortasse vtilius vtrique parti potes? Opidum, ſi non nunc, fortasse poſtea detrimentum, & quidem cum fznore, ſentiet: at iſte pondus grauiſſimæ litis excipiet, & in eius humeros, qui conſortes ſunt, maximè inclinabunt. Adiuuemus, & vocem
moni-

monitumque Rudolphi primi Austriaci audiamus. cui cum plures lites cum pluribus essent, vna atq. altera grauis cū Abbate Sancti Galli, tunc potente: accessit vltro & inuocatus ad eius conuiuuium. mirante illo atque aliis (nam & inimicitia, vt solet, ex lite ortæ erant) ipse constanter persedit, & sine conuiuuij cum Abbate seorsum locutus transiit, & pacem cum eo pepigit; ita fidam, vt Abbas postea auxilio etiam ei in bellis fuerit, quæ minuta (nam Comes adhuc erat) cum vicinis habebat. Sed vox eius abeuntis excepta à familiaribus est, totidem his verbis: *Quicumque tres lites habes, duas, si poterit, componat: hoc est meum consilium.* Et hercules meum, ô Rudolphe: sed hoc amplius, etiam tertiam, vt nullum caput huic Cerbero supersit. Age mi Robiane, non ternæ, sed ter denæ aliquæ vobis lites sunt: recidite istas maximè grâdes, & quæ in mōltra aut hydras succrescunt. Quid magis solenne, nostris moribus & iuridicinâ? Lis litein gignit, iterumque hæc aliam, & catena fit quæ hæredes etiam ligat. Bonâ Vveni nostri veniâ hoc dicam, dubitare me an bono consilio in vitam & vsum Ius Iustinianæum à Lothatio Imperatore reuocatum sit: sic dico, totum & plenum. Non quin bona in eo, arguta, & à sæculo veteri: sed nimis fortasse bona, arguta, vetera: & idcō seminarium ingeniis, ad calumnias fraudesq. pandendas. Dic sodes, quàm multa in eo, quæ vsum hodie non habent? quàm multa implicata, & variantibus sententiis enodanda? quid si pugnantia quædam dicam? sed vix ausim, & iuncti vmbonibus me inuadant. Et de iure ipso prisco, parum etiam sit: sed Commentarij quàm multi & pænè infiniti accesserunt? atqui & ij si concordant, vim legis in tribunalibus nostris poscunt. Amelij vetus querela an scomina fuit, *Iurisprudentiam multorum camelorum onus esse*: quid nunc dicam? elephantos ab Indiâ adde, vix ferent. Atqui Platonis oraculum (recens à lectione sum) auribus meis insonat: *ὅτι παρ' οὗς νόμοι πολλοί, ἔστιν κατὰ νότον, καὶ βίος μορφησι*: *Quod vbi leges multe, ibi & lites multe, & vita moresque prauæ.* Audi, & scrutare: verè oraculum est, & de multitudinē licium, nostra Belgicæ, vicina Gallia, & Italia dicent. Quomodo autem non & mores prauæ? nam primùm concordia tollitur, odia aperta aut occulta in animis gignuntur; adde fraudes, insidias, & studium vincendi quouis nexu, ac supplantandi.

Non enim, ut Celsus verissimè scripsit, bona conscientia, sed victoria litigantis est præmium. De multis hoc dico; absit de omnibus, & animus me meus refellat. Sed proborum causâ indignor equidem, cum Iasones istos video, qui palàm ad Colchos & aureum vellus eunt. Et quidam non improbi solùm, sed stolidi aut fronte ferreâ, qui & artem hanc protollendæ siue tollendæ Iustitiæ iactant. Memini olim fuisse inter Byzantinos Oratores, qui interrogatus, *Qualis Byzantiis lex esset? Qualem ego volo,* respondit: ô dignum, qui pateretur quod ego vellem! Sed an non hodie tales, qui leges, ut ceram habent? pro animo aut lucello suo huc illuc ducunt & flectunt? Mentiri velim: sed hoc vnicè, ut Rex sit aut Princeps qui medeatur, & paucas, faciles, concordēs leges donet. Sed hæc *Monitis Politicis* seruentur, epistolæ modulo grandiora. Illud de re, quam institui, te rogo: pergas nauare operam, & ut pax coëat inter volentes, Noster certè cupit, & quoscunque interpretes eius aut pararios non recusat. Utinam tam in procliu Batava nostra pax sit! quæ ante annos aliquot prompta, magis magisque subducitur: & adeò non rem, vix nomen eius admittunt. Quid autem fiet, si Ostendam non capimus? quos illi animos? Sed capiemus, ita ominor: & utinam illos nosque satietas pessimi & omnia atterentis belli. Vale V.C. & salueat noster communis Vveneris: an & hæc legat? legat, homo disparissimus iis, quos noto. Talium tacita vota, si non voces, sunt mecum. Louanij, XIII. Kal. Octobr. ∞. IOCI.

EPISTOLA LXXIX.

Brugæ.

-LYCÆ WYNGARDO V. N. S. D.

EN meas litteras, quas tuæ non elicerunt: sed ipsis tuis factis iure debebam. Quid enim minus possum pro donis sic vltro & vbertim missis, quàm gratias stilo dicere, animo habere? Et donis herclè meo animo lepidis, & quæ verè sunt illi recreando aut vegetando. Nam flores & hæc hortensis oblectatio ipsam vitam panè dicam mihi seruat: cum à libris & studiis, siue etiam turbis aut interpellatoribus, illuc confugio, & ad spectu ac secessu me pascō. Quid sit in hac re arcani adfectus, nescio: nisi quòd & post vitam veteres, hortos & campos Elysios imaginati sunt; & ipse Deus primo homini sedem beatæ vitæ dedit

dedit παραδέξασθαι. Desine, inquires:

*Μὴδ' ἐξομῶρην μοῖρας τῶνδ' ἔμοι:

*Nec affri-
cat infa-
miam tuam
mibi.

Non faciam, desino: & publicæ occupationes aliò te ducunt. Quod proposui tamen, gratias ago: hoc ipso maiores, quò magis munus tuum commendo. De Theocriti versu quaesitum, *βολβός τις κοχλίας ἐξήρθε*. — non alium sensum arbitror, quàm *Bulbum* (edulem scilicet) & *cochleam electam*, & propositam ad comessandum. Ita solent etiam Latini. In Martiale aliquoties mentio, & iunctim lib. IIIT.

Et ficus Libycâ gelata testâ,

Cum bulbis cochleisque cascoque.

Etiâ Romæ hodie cochleas solent apponere, illi vsui aut fini. Sed hoc sensu, vide an non copulâ insertâ melius scribi: *κοχλίας τ' ἐξήρθε*. Valere te cupio, Vir nobilis, & *φιλῶ τὰ ἀντιφιλῶ. Louanij, III. Idus Octob. ∞. IOCI.

*amantem
vidamur.

Iacobo Damhouderio salutem & gratias, rogo, à me dicito, qui & se floribus procurandis benigne impendit. Debec.

EPISTOLA LXXX. Tornacum.

DIONYSIO VILLERIO V. R. & CL.

BINIS me tuis affatus es, à tristi nostro (mihi certè) discessu: At ego silui. quid causæ? distractiunculæ, quæ præter morem mihi me eripuerunt, nec nisi cogitationem & affectum passa ad te mitti. Audi, sodes, & miserere. Nuptiæ vno tempore in domo meâ, hospites, interuētores. De nuptiis, ut sagax es, credo audisse. ancillam mihi ab annis XXVI. talem nocturnæ solitudinis (quid enim aliud ipsa aut ego dicam?) viro se iunxisse, & conuiuia illa, choreas, nugas in meâ domo fuisse. Ecce sub eas ipsas Bernartius mihi hospes, gratus sanè: sed cui me & tempus tamen impendi. Quid de exteris aduentoribus dicam? qui anno inclinante velut per agmina adfluxerunt, & salus capiendâ ab iis & danda, humanitatis quâdam lege, fuit. Atqui vix credas, quot horas & isti eripiant, etsi in breuibus fabellis. Iam sollennes & adsiduas occupatiunculas meas omitto, in dies docere, scribere, & quicquid in uneri meo adhaeret. Scio ipsum te ingemiscere in splendidâ hâc meâ miseriâ, & quam fama aliqua melior nobis donat. Quid etiam omitto? quid? vel præcipuum turbamen-

tum, quod tamen famam video ad te tulisse. N. N. triennium fere in meo contubernio & curâ, præter omnem omnium opinionem, tantis opibus & spe relictâ, in diui Francisci cœtum se dedit, & diuino cultui mancipauit. Quàm me percussit censes hoc
† inopinatum ** αὐτόματον* ? & eò magis, quia auunculo & parentibus (nam & ij viuunt) magnam hanc in animo plagam futuram videbam. Itaq. statim vxor illius & soror huc ad me, & mecum ad illum: conamur refrigerare aut abducere: at ille, veluti rupes, fermunculos nostros assilientes fregit aut repulit, & Deo duce vitam electam dixit, quæ nisi cum vitâ non eriperetur. Ita vltimus ille meorum me deseruit, & in solitudine iam reliquit. Quam tu damnas & dissuades, & atræ meæ bilis fomentum aut alimentum habes. Falli te puto: ego certè amo, & corpore atque animo eâ pascor. Quàm liberæ mihi nunc cogitationes sunt? quàm curis istis alienis aut externis non districtæ? quàm vagor itaque & diffundor? in cælum, terras, maria, in nostrum & alium orbem. Apage à me, illum, qui

Non horam secum esse potest, non otia rectè

Ponere, seque ipsum vitat fugitiuus & erro.

Ego sapientiæ non dicam indicium, sed initium tamen esse puto, secum consistere, & sibi vacare. O si rure hoc etiam liceat!

Propter aque riuum, sub ramis arboris ætæ.

Sed bella hoc vetant, nec Ostenda illa etiam PACEM OSTENDIT. Classẽ in Hiberniam sex millium Iberorum appulisse autumant: illam magnam, Africæ inuadendæ paratam, tempestate disiectam, & re nullâ nec tentatâ quidem reuersam. Hæc in publicis sunt: etiam illud, Reginam Hispaniæ peperisse, sed prolem fæminam. In priuatis tuis quid? bibliothecam pergis instruere? Index hic Francofurtensis quædam dabit. Io. Macarius, cum grata tui memoriâ, ante biduum mihi adfuit, vnâ cum Wingij nostri fratre. Vterque gratus, & in mensulâ meâ miscuimus tabellas. Quando tecum iterum? dispeream nisi aueo: & fiet, ita tu atque ego valeamus. Louanij, III. Idus Octob. ∞. 1561.

De Neruiis tuis, seriò aliquoties à te quæsitum, quæ mihi vîs hîc habes. Cæsaris & Strabonis tempore has sedes coluisse. Treuitorum finibus, ab Oriente; ad occasum à tergo, Ambianis & Atrebatibus iunctos; Verouanduos, in Meridiem, Atuaticos in
 Septen-

Septentrionem despexisse. Porrectos in longum magis, quàm latum: ab Oriente in Occasum. Hodiernâ nomenclaturâ fines eorum si vis designem; arbitror supra *Namurum* (vulgò *Namurcum*) & ab *Arduennæ* finibus cœpisse; iuisse in Meridiem *Fumacum* versus, tum *Chimacum*, *Auennas*, *Tauacum*, *Valentiana*; & flexu deinde in Occasum & Septentriones, *Orchiacum*, *Tornacum*, *Aldenardam*; iterumque flexu in Orientem & Meridiem, *Geertsbergam*, *Angium*, *Brainum*, *Gemblacum*, denique rediisse *Namurum*. Coniectura hæc nostra est: & quis aliud in his adferat? sed veterum profectò verbis sensibusque innixa. Nam magnos fines habuisse, Cæsar apertè indicat: qui ab *Ambianis* triduum iter se fecisse per *Nervios* ait, priusquam ad *Sabin* veniret (hodie *Sambram*) ubi copiarum & castra. A *Treuiris* autem cœpisse quod dixi, non id quidem Cæsar, sed apertissimè bis *Strabo* scribit, libro quarto: & à *Germanis* utrosque ortos, ipse ibi, & *Tacitus* in *Germaniâ* suâ, scribunt. Iungit & *Panegyricus* scriptor, *Nerviorum* & *Treuirorum* arua. At *Tacitus* *Bethasius* finitimos facit IIII. *Histor.* *Civilis Bethasios* quoque ac *Nervios* in fidem acceptos copiis suis iungit. Et antea: *Claudius Labeo* quosdam *Nerviorum* *Bethasiorum*q. in armatrazit. At qui isti *Bethasij* *Brabanti* nostri videntur, quâ parte *Hannones* tangunt: & hodieque iuxta *Hallas* vicus est *Beeths* nomine, qui vetus illud refert. Itaque fines eorum ab hac quoque parte satis stabiles videantur. Plura quæ dicam non habeo: nisi *Torniacum* vestrum (sic ibi scriptum) à *Reginone* nominari, in anno *Christiano* cccc. xcviij. *Hilpericus*, inquit, fugiens cum uxore & liberis *Torniacum* est ingressus. At in *Antonini* itinerario est *Turnacum*.

EPISTOLA LXXXI. *Audomaropolim*

ÆGIDIO SCONDONCHO Sacerd. Soc. Iesu,

ABIISTI fanè à nobis, nec vel solenne illud *Valè* dixisti aut scripsisti. Accusem: absit: scio vestrorum imperia, quibus statim & *ἡμῶν* sic patendum. Doluisse tamen me non nego, ^{animus vultum.} cui plures iam amici sic abiuncti aut erepti: inter eos *Delrius* ille, ad *Europæ* fines, sed suâ sponte, relegatus. *Hemelarij* nostri litteras legi, & ex iis disce etiam nunc *περινοροπον*. Habet à naturâ ^{animi abye.} modestum illud, & panè immodicè, erigendus est, quod sermo-

ne & litteris scio me factitasse. Et profectò nec Aula illa ei placet, ubi fumi & fuci multum; & Batauius ille candor non delectetur, non delectet. Nosti mollem frontem, parùm aptam inter duos illos, & cum Homero, *ἔδ' αἰδῶς μοῖρα ὄχοντες*. Itaque de mansionē vix suadeam: cur non ad nos redeat, viræ gentis eligat, in quo & salutem & quietem suam curet? Mihi videatur: nec Batauia moveat, videnda obiter non insidenda. De me, in studiis scripturæ sumus, sed languidè, ut in languore. Non ille me deserit: neque ego tamen illa,

* nec par-
tē fortior
nempe pu-
dori.

* *Αὐτὸς μι-
τὴν quàm
mors vni-
us lūmina
velat.*

* *Πρὶν γ' ὅτε δὴ θανάτοιο μέλαι νῆφ' ἀμφιπαλῦναι.*

Tu vale mi Pater, tuo & plurimum bono. Louanij, IIII. Kal. No-
uemb. ∞. IOCI.

EPISTOLA LXXXII.

GERARDO BUYTEWECHIO.

ET addam MEQ? an alia iam te habet? Habeat, sed non totum: & in teius meum teneo, nec vllum vinculum nouum ab illo veteri resoluat. Sed fauco & gratulor toto animo huic incepto, & Deum rogo id non prosperare solum, sed prop-
rare. Satis diu suspendisti nostra & parentum vota:

Eia age, iunge toros, atque otia deme iuuenta.

Omnia eò vocant: natura ipsa, quæ hanc legem iugandi & gi-
nendi dedit, & sæcula per stationem propagandi.

Sic rerum series, mundi quæ renascitur ætas.

Vocant & tui, quibus vnicus es, & (nisi fallor) stirpis tuæ exi-
mus. Patiare exstingui? non debes. & quanquam tempora tri-
stia vel turbida cunctari suadeant; ætas tua recusat, & nunc fie-
ri, quod aliquando possit, impellit. Habet etiam hæc vita suas
voluptates & lenocinia, præsertim tali compare, qualem descri-
bis, à stirpe, à parentibus, à se honestam, bonam, mitem. Euri-
dis effatum est:

* *Nonnulli
quidam se-
cunda uo-
pita
cedunt,
beata uita:
sed quibus
aliter.
Illi domi
infeliciter
æquus, &
foris.*

* *Γάμοι δ' ὅσοις μὴ εἰ καθεύδῃσι βροτῶν,*

Μακάρι' αἰὼν ὅς δ' ἐν αἰῶνι σου σὺ,

Τὰ τ' ἔδωκεν, τὰ τ' εὖ δὲ δυνάξῃς.

Adsit illud, absit hoc à tuis nuptiis:

— *det luno vcrenda*

Vincula,

Vincula, & insigni gemit Concordia tecta.

Mihi in eo vno voto omnia inesse videantur, & vbi pax & concordia inter consortes obtinent, felicitatem illam & alia bona comitari. FIAT, FIAT: & amplius, huic felicitati fecunditas comitetur, vt verè illa sit *γυνή*, quam pulchrè *ἡ ἀγαθή* veteres magistri deriuarunt. Sed heus, scis & in domo meâ nuptias, & quidem duplices, fuisse? Verè in domo meâ priores. è quâ ancilla mea *Anna* illa, quam nosti, ante paucas septimanas enuplit: alteras è domo, si non in ipsâ. Tenes memoriâ N. N. gente vestrum, Thesaurarij ex sorore nepotem apud me triennium circiter egisse? & modestè quidem ac laudabiliter egisse. Sed exitus fuit, opinioni nostræ dispar, & relictâ magnâ spe opum (nam auunculo, non solùm patri, heres destinabatur) in Diui Francisci familiam nomen dedit. Hoc ipso die manè publicè induit cœtus eius sacram vestem. Deus robur adspiret, & athletam ad metam sistat: etsi cursum hunc currere cœpit nobis omnibus insciis, neque enim dicam (de me quidem) inuitis. Reliqui etiam mei contubernales ordine abierunt, in Italiam, in Galliam, Hispaniam, quo sua quemque fors duxit: & in solitudine sum, diu mihi optatâ, & in omni tuo dilectâ. O si com meatus ad vos sit, qui solet! testor Numen, oculis imò & osculis tuam nunc libem: vetamur. tu vicem meam facito, atque ita vt iterùm nos latifices, te patre, parentibus tuis auis. quos saluto, & gaudium illorum gaudeo; quod animi his luminibus cerno. Vale, & rein gere mi Buytevechi, verè *ἀληθῶς ἀπαρτὸς ἀσώπυρτος*, ait vir sanctus: ne vt lasciuiusculum hoc culpes. Louanij, v. Kal. Nouembr. ∞. I. DCI.

ἡ γυνή
râ.

*ἡ σφιδαι-
δα.*
Ildorus
Pelusiotæ,
in Epist.

EPISTOLA LXXXIIL *Bruxellam.*

NICOLAO DE WEEKT *1^{to} & Cognato.*

DOLEO & gaudeo in vniâ tuâ, & vnus argumenti scriptio-
ne. Doleo iterùm præteritum me in officio, quod sic libes
latusque obtuli, & vsurpem: gaudeo tamen peperisse tuam, &
vinculis illis exsolutam, quæ etsi optabile periculum, periculum
tamen ostendunt & minantur. Deus & ipsam det valescere; &
prolem natam crescere, suæ gloriæ, gaudio longo atq. vsui vestro.

Differ.

Differs me in filium. age igitur ne tu Fabius aliquis, magis Annibal esto, & felicius te ad Romæ portas siste. Ne cunctare, & cognatum mihi da, cui sanctiore parentis etiam nomine iungar. Fiet, ominor: & decem tibi menses suprema dies sunt. De feminibus quæ mihi, vix opus gratiam dicere: si scias quàm immo liberalis & benignus in te sum, plura poscas, & addam, feras. Modestiam tamen non exue, & sic si non promptius, tamen libentius scito me daturum. Vides artem? incito te & reprimo: sexus etiam ille solet, de quo initio egi. valeat, & tu vale optime Cognate. Louanij, prid. Kal. Nou. ∞. ICCI.
Salutem & officia deferò Cognato socero, & Cognatæ.

EPISTOLA LXXXIII. *Romæ.*

IOANNI HEMELARIO.

AGE, cum Deo, fiat. Veni, inquam ad nos, imò & ad tuos, ut videas, non adhæreas aut ibi sis. Commearum quidem tibi do. Nam cur dissimulem? iamdiu mihi egrè est, non esse te Romæ ex destinatione aut spe meâ, nec eo loco quem aliud æuum adsignasset. O Europa, quàm in omnibus membris labascis! Nam si ibi etiam, ubi alta & immota pax est, in exiguo pretio & vix assis sunt istæ pacis artes; quid alibi arbitremur, aut speremus? Mundi lex viderit:

— ego utrum

Nam ferar magnâ an parvâ, ferar vnus & idem.

Tibi sit istæ constantia: & aut ratio profectò aut vsus dabit. Dilegentem aut veteres sophos tibi non ingero, qui Alexandros & Philippos omnes prouocabant in suâ vberi inopiâ: vide Christiana nostra olim & nunc (venia verbo sit) mendicabula: reges omnes non æquant securitate & tranquillitate, sed vincunt. Iam is semina aliqua melioris mentis in tuis litteris: Deum precor ut foueat, attollat, maturet. Tantum hortor & ingerò, non sic vacillare: tolle caput, quod Deus ad sidera crexit, & melior tua mens cò ducit. Hanc audi: fumos & fucos illos non vide, non audi, qui obnubilant & specie ingentium ad minuta impellunt. Impedimenta esse & fore, non nescio: sed altus & Deo fîsus animus

— per obstantes cateruas

Exph-

humili &
absistat
mente esse.

Explicuit sua victor arma.

Tu eo faciente facies, mi Hemelari: atque ita mihi salue. Louanij, prid. Kal. Nouemb. ∞. 1661.

EPISTOLA LXXXV. *Leodicum.*PETRO ORANO *J^{ro}.*

APUD te nec excuso quidem, quod sileam. Non mihi semel liceat, quod tibi frequens, & pænè in morem vertit? Feci apud Carondeletum: & tu quoque è lustralibus illis aquis sume. Filium valere, gaudeo; & magis, quem volumus & destinamus, esse. Angit de lite, quam imminere significat in domo à Patruo relicta: & si mei arbitrij res sit, ad concordiam potius inclinet. Cum Principe viro res est; & nostri Homericum,

* Μῆτε σὺ ἀνελθεῖν θύλ' ἱερῆς βασιλῆς Ἀντίων.

* Nec in Pe-
lida regi
contendere
tentas
Aduersus.

Fiat tamen, quod tu iudicabis, harum rerum vetus & gnarus. Billæum rediisse, gaudeo: idem breui de Principe voucinus, & in circumstantibus turbis aut periculis ex vsu vestro fore putamus. Te quoque valere, mei voti est, & semper me amaturum amare. Louanij, postrid. Kal. Nouemb. ∞. 1661.

EPISTOLA LXXXVI. *Romam.*FRANCISCO ORANO *suo S. D.*

RESPONSVM debeo binis iam tuis litteris; imò non debeo, nec paria tecum facere in hoc genere aut induxi animum, aut copia mea ferat. Otij vos beatos! nos obruimur, & quod publice minùs aut tardius aliquid præstamus, sit priuatis istis scriptiunculis, quæ à manè ad vespèram sæpè habent. Quid querar apud te gnarum? ideò ignoscas, & animum semper in te agnosces, qui est & fuit. Litem tibi esse nolim: odi ipsum nomen: & vtrique non cum illo è Dynastis: ac si me audis (ad patrem etiam scripsi) transigas & componas. Plumarum potius aliquid amitte, quam vt de cute aut carne pericliteris.

*Contracto melius parua Cupidine**Uetigalia porriges.*

& vitæ genus quod elegisti, in arcta te non detrudet. Et honos & vbertas, meo præfagio, te manet. Noster ibi Richardotus ecquid apud te frequens? credo non frigere amicitiam, quæ in domo

MMm meâ,

meâ, & iure contubernij, incepit. Alter etiam mox frater, Guilielmus, ibi erit : & ante quinque septimanas à me dimissi illuc iturientem. Rubenium vnâ. ô insignem iuuenem, & optimis litteris artibusque non tinctum, sed imbutum ! At audi aliud, cum tuo miraculo. N. N. ille noster, quem iam Licentiæ destinabamus, in D. Francisci cœtum se dedit, amicis omnibus ignaris, inuitis, iratis. Quid tu ais ? nōne maior vis, aut altior vox, eum traxit ? Publica sunt, quæ fuere, & fortassis erunt, lenta, ambigua, tristibus lætisque varianda. Ad Ostendam adhuc sedemus : de claudendâ à mari spes erat, benè si rata. Si fallit, vereor vt aliâ vi aut viâ aliquid fiat : nisi Deus palàm iuuat. qui nobis in tot malis constantiam, tibi salutem mi Orane seruet. Louanij, postrid. Kal. Nouemb. ∞. 1661. Audeantius te salutat.

EPISTOLA LXXXVII.

Hispalim.

IOANNI WOYERIO S. D.

ESTNE ? amantes ad ineptias etiam labi ? In te experior (ignosce) mi Woueri : qui sermone nuper, & nunc litteris iteras, vt aliquid pangam de vitâ meâ & scriptis. Cui rei autem ? aliis ? ineptum, aut superuacuum est : & nihil in illâ, quod nosse aliorum intersit. Tibi igitur ? atqui in contubernio meo fuisti, & hoc pænè est, vitam meam totam nosse. Quid enim in eâ nisi æquale illud & vniforme, quod vidisti ? legere, docere, scribere : & cetera tranquillum, & ab actione remotum esse. Quid ergo narrem ? non maiorum res gestas, non meas possum : & tenuia in nobis pleraque aut minuta. Tamen quia valdè cupis, & ego naturâ obsequens : accipe ea ipsa tenuia, & quidem à carceribus, id est, cùm missus sum in hanc vitam. Id fuit, Dei benignitate, Anno ∞. 16. XLVII. die qui D. Lucæ sacer est, XVIII. Kal. Nouembris. Nox media me edidit : cùm mater (ita narrantem sæpe audiui) superiori proximâ nocte, vidisset vigilans & exsomnia, duos puellōs mirè candidos, per cubiculum inambulantes, mutuum se complexos. Interpretatio (si tamen vlla) ipsi nobisque incerta. In Iſcano autem sum genitus, municipio aëre, aquis, situ per amœno : quod tertio milliari à Bruxellâ, itemque à Louanio abest. Vidisti ipse me ducente : quid describam ? & locum ad eò domumque nunc semi-

semirutam, in quâ sum natus. Non enim auitâ illâ nostrâ & paternâ, quæ incendio perierat, paullo post instauranda. Parentes mihi *Ægidius Lipsius* & *Isabella Petirinia*: ille vnicus parentibus, hæc vnica: opibus & genere vterque perhonestis. Aut *Nicolaus Lipsius*, quieti & litteris operatus: propatruus *Martinus Lipsius*, vir ob doctrinam Erasmo familiaris, & à suis illiusque scriptis notus. Vxor aui *Margareta Eechoutia*, stirpe nobili: & maiores, pater, fratres eius, in Principum nostrorum aulis. Proauus *Iustus Lipsius*, cui vxor *Anna Linckebekia*, genere nobilissimo, sed in virili stirpe iam extincto. Ea in dotem villam, agros, domum contulit, quæ in Iscano: atque ea occasio mei illic nati. Nam pater & maiores, domo omnes Bruxellenses erant: atque ibi, aut in viciniâ, opes. Agitatum in sacro fonte & die meo lustrico, de Lucæ nomine imponendo, causâ à me dictâ: sed pater abnuir, & aui paterni maternique nomen in me renouauit. Parentes Iscanum aliquot annos tenuit, quia & mater in propinquo villam & agros vberes habebat, supra Wavriam: & pater item in Iscano dicta bona. Ergo & ibi educatus sum: non sine duplici periculo, quod præsens vitæ meæ fuit. Puer quadriennis, egressus domo ad vesiculam leuandam, video niues (media hiems erat) in colliculum vtrinque, vt via media esset, scopis aggestas. Conscendo, in faciem cado, spirandi impos & iam suffocandus: nisi ancilla, quæ supernè verrebatur, bono fato me respexisset, & erectum seruasset. Alterum, cum domus, vt dixi, repararetur, per tabulata & machinas fabrorum lusito: decido quindecim pedum altitudine, cum sodali meo: qui crus sibi frangit, ego caput & sinistram aurem leuiter lædo. Tutela mea, Genius fuit: & quod cingulo sericeo suspensus in perticâ hæsi, donec eo soluto caderem, sed ictu molliore. Annos iam sex natus, Bruxellam cum parentibus migro. ibi studiis litterarum initior: facili promptoque ingenio adeo, vt præceptor me paruulum (memoriâ teneo) genibus impositum, & sic recitantem, aliis ostenderet in emulationem aut exemplum. Inter condiscipulos *Dionysius Villerius* tunc fuit: ô carum mihi exinde nomen. Grammaticalia statim hausi, & sponte ad linguam Gallicam etiam me dedi; quam è libris sine doctore ita didici, vt scribere possem, etsi loqui & legitime pronunciare non possem. Sed hîc mihi etiam discrimen, non nisi à

Deo palàm depulsum. Cum æqualibus currere & lufitare, feriat diebus, extra urbem solemus : & euēnit , vt circa Sennam flumen . Ibi cymbula ripæ applicita , & fune ad arborem religata , haud longè supra frumentariam molam . nos intramus , solui-
mus, & agitamus : videt molitor, accurrit, & voce minatur. Mei
deserunt, exeunt: pænultimus ego idem conor, sed pedibus prio-
rum repulsa cymba, & à ripâ diffunctior, saltum fefellit. Capite
igitur præceps in flumen labor, puero vno, qui post me, diuinitus
animato vt pedem mihi prehenderet, atque ita suspensum tene-
ret. Intereà molitor aduenit, attollit semianimein , aquæ satu-
rum : & sospitator vtrique nostrum fuit. Vtrique inquam: nam
& cymba prono fluxu (absque illo erat) ad molam ibat , eius vor-
ticibus inuoluenda & mergenda . Sed ad vitæ meæ spatia redco.
Anno decimo Athum Hannoniæ ablegor, bonæ famæ scho-
lam: atque iterum ibi Grammaticalia , prauo xui nostri more.
Biēnium in iis detineor, mox carmen cœpi scribere: & anno ter-
tio Coloniam Vbiorum porrò, ad *Patres Societatis* mitor. Ij me
Rhetoricis, ij Philosophicis imbuerunt: capere sanè pronum,
atque ibi & alibi antea (non per iactantiam dico) semper ducto-
rem & principem meæ classis. Sub id tēpus pietas pectus meum
tangere, & Patribus ipsis velle accenseri: parentes sciuerunt, ab-
duxerunt, & annos iam sedecim natum Louanium amanda-
runt. Ibi litterarum & antiquitatis hæc studia ad se traxerunt:
quorum tamen gustum amoremque Colonix infuderat *Gerar-
dus Kempensis*, præceptor meus in Græcis, acerbi homo fati. Sed
Louanij compares mihi comitesque in iisdem studiis *Ludouicus
Carrio*, *Franciscus Martinus*, *Arnoldus Deinus*; ductore omnium
nostrum *Cornelio Valerio* & quasi chorago. Nam is *Petro Nannio*,
qui primus honestum ibi ignem accenderat, successor datus: stu-
dio non impar, ingenio inferior. Accessere mox *Martinus Del-
rius*, *Victor Giselinus*, *Ianus Lernutius*, *Andreas Schottus*: interio-
res isti, & ex affinis amici, & vterque ille primus, arcti affectus,
liberi oris. Dum autem inibi sum, & Iuris etiam artem libo,
pater mihi fato functus est: vir acer, manu promptus; sodalium
ac conuiuiorum appetens, & qui hâc comitate amplum
patrimonium valdè attriuit. Mater curam eius reliqui, & no-
strum (mei & sororis dico) suscepit: matrona in summâ mode-
stia

Anno m.
Id. LXIII.

stia virilis animi & consilij, & cui ex illo sexu, æuo, populo, non aliam iudicio præponam. Hæc meâ causâ Louanium venit, sedem transtulit, atque ibi ex hydrope non diu post obiit. Annum agebam tum ferè decimum octauum, & publicè iam specimen aliquod mei dederam declamando in Scholis, aut disserendo. sed magis magisque Musa vetus me capere: & eius amore Italianam cogitate. Feci. sed libris antea VARIARVM LECTIONVM quattuor conscriptis atque editis, quos *Antonio Perenotto* Cardinali Granuellano inscripsi. Primus hic mihi aditus ad famam, etiam in illius patroni nostri domum fuit: in quam Romæ admissus, biennium circiter egi: cum omni benignitate ab eo habitus, & ad studia tractanda non incitatus solum, sed adiutus. Eram à Latinis ei epistolis: sed otium & omne liberum tempus dabat inspectioni lapidum, locorum veterum, & si quid visendum noscendumque in vrbe aut circa esset. Bibliotheca etiam Vaticana mihi per eum & *Guilielmum Zirkium* Cardinalem (aureo æuo dignum) patuit: & in iis studiis curisque tempus illud sumpsi. Innotui *Paullo Manutio*, *Fulvio Ursino*, *Latino Latini*, *Hieronymo Mercuriali*, *Antonio Mureto*: familiarissimus *Plauto Bencio*, qui *Francisci* postea nomen sanctius cum sanctiore vitâ assumpsit. *Petrum Victorium* etiam, & *Carolus Sigonius*, per viam vidi: atque ego venerationem illis, ipsi affectum mihi exhibuerunt. Louaniū deinde redij, annū vnum egi, in *æuū ipsâ* adoleſcētiæ, *vigora.*

Iucundum cum ætas florida ver ageret:

& egi (simpliciter apud te dicam) haud vsquequaque ad prisce Catonis notitiam. Liber eram, parentum & tutorum expertus: atque ita choteis, sodalitiis, nugis, ludum & libentiam aliquam ætati dedi. Sed non diu dedi. natura melior me reduxit, atque ego adeò me subduxi peregrinatiunculâ: quam Viennam Austriæ, & in Cæsaris aulam, decreui, suscepi, perfeci. prius tamen & obiter Dolâ Sequanorum lustratâ. Ibi acerrima febris me pernissimè sustulit: quam contraxeram Oratiunculâ in honore & titulo *Gisellini* mei dictâ à meridie, & contiuiuo mox insecuto. Euasi, Viennam perrexi. atque ibi *Augerio Busbequio*, *Ioanni Sambuco*, *Ioanni Cratoni*, *Stephano Pighio* innotui, & placui: atque ij retinere me & illigare in iis locis, non vnâ conditione conati. Fritstâ. nam patriam respectabam: & animo redeundi, per Bohemiam

Anno m.
Id. LXX-
II.

miam, Misniam, Thuringiam, & ea loca iter institui : cùm acerbi nuncij de afflictâ nouis bellis nostrâ Belgicâ, patrimonio vi militum attrito, me pedem figere in iis locis adegerunt. Ienæ paullo plus annû mansi, docui, & illa primordia mihi ad Professorium hoc munus fuere. Sed rebus paullû modò tranquillatis, oculos iterum ad meos & mea flexi, Coloniam Vbiorum veni, vxorem duxi; mei magis animi, quàm amicorû, impulsu. Sed, vt ille ait,

*-à dijs fataliter hoc decretum.

— τὸ μὲν ἀπὸ τοῦ ἐπιταλασσαντος τοῖς αὐτοῖς; & cōcorditer sanè viximus, fructus tamen matrimonij, id est liberorû, exsortes. Coloniae nouem mēses substiti: TACITVM primò correctum, & NOTAS ad eum dedi: ibidē ANTIQVAS LECTIONES cōscripsi. Inde in Iscanum meum migraui, animo destinato ruri agere, & tabernaculum vitæ in quiete illâ collocare. Bella vetuerunt; Louanium compulerunt: atque ibi (hoc tamen ex amicorum consilio) iuris studiis paullò magis seriò me dedi, & titulum etiam I^{ai} publicâ inauguratione sumpsi. EPISTOLICAE meae lucem tunc viderunt; & sub idein tempus LEGES REGIAE & DECENVIRALES concinnatae, non famæ tamen sed auditorum gratiâ; quibus publicè interpretatus sum, itemque *Linij* quædam. Tum actiores procellæ iterum & venti, quibus nihil propius factum, quàm vt mergeretur Belgicæ hæc nauis. Fluctu, cum pluribus, eiecti sumus in Bataviâ terram: insedimus, sed mente, vt stationem eam haberemus, non portum. Turbæ tamen è turbis mutare vetuerunt, & tredecim ipsos annos tenuerunt. Cur autem negeim? homines benignos & beneficos repperi: sed relinquere eos Religio & Fama (acre vtrumque telum) adegerunt. Dum inibi sum scripsi,

ELECTORVM LIBROS II.

SATYRAM MENIPPÆAM.

SATVRNALIVM LIBRR. II.

COMMENTARIOS PLENOS IN CORN. TACITVM.

DE CONSTANTIA LIBRR. II.

DE AMPHITHEATRO LIBRR. II.

AD VALERIVM MAXIMVM NOTAS.

EPISTOLARVM CENTVRR. II.

EPISTOLICAM INSTITVTIONEM.

DE RECTA PRONVNCIATIONE LINGVAE LATINAE.

ANIMADVERSIONES IN SENECAE TRAGOEDIAS.

ANI-

ANIMADVERSIONES IN VELLEIVM PATERCVLVM.
POLITICORVM LIBRR. VI.

DE VNA RELIGIONE LIBRVN.

Pluscula, vt vides, & (vt in meis) optima ferè: quid mirum? in flore æui & ingenij, in alto otio: nec valetudo, nisi sub extremos annos, titubauit. Tum hepaticus iste morbus, & tabes an languor, inuasit: & quanquam remisit, bonâ fide nunquam dimisit. Illinc digressi, Leodici aut Spadæ biennium propemodum egimus, valetudini per Acidulas illas refouendæ: tum Louanium regressi, vltimam, nisi fallor, & fatalem meam sedem. A quâ tamen variè auocati fuimus, à Pontifice, Rege Galliarum, Venetis, Duce Etruriæ, Bononiensibus: sed placuit mansio, vt in æuo meo labente, & valetudine iam lapsâ. Stipendium mihi modicum: sed rex Philippus, faciente *Petro Enriquez* Comite Fontano, auxit, & Historiographi etiam sui titulo donauit. Scripsimus autem Louanij,

Anno m.
Id. xci.

DE CRUCE LIBRR. III.

DE MILITIA ROMANA LIBRR. V.

POLIORCETICON, V.

DE MAGNITVDINE ROMANA IIII.

DISSERTATIVNCVLAM, ET COMMENTARIVM IN
PLINII PANEGYRICVM.

Hæc octennio circiter, ad istum annum m. Id. qui nunc currit. Et pluria ac varia affecta nobis aut profligata esse, non negamus: sed temporum aspectu quædam premi, & iudicio differri. En, mi Woueri, nostram vitâ & scripta: dic serio, nō subpœnitet impetrasse? de meipso tamen aut indole meâ, tria etiâ verba. Corpus & facies non indecora, vtiq. ante morbum: os probum, animus vetecundus: ingenium docile & capax omnium, excipio Musicam: iudicatio collineans & recta: memoria non sine præceptorum miraculo, etiam in puero: quæ nunc, etsi elanguit, non defecit. Eloquētia nobis prompta, nec sine Venere, in publico: priuatim, restricti magis, & minus amœni. Stili & inuentionum faciles: labori & assiduitati impares; & naturæ, quàm illis, in omni ætate obstrictiores. In cultu, gestu, sermone modici: & exterorum qui *Lipsium* videbant, sæpè requirebant. Quod superest, bonâ & bonos amari, amatus sum: scientiam, & magis sapientiam, colui:

lui: lites fugi, honores fugi: domi forisque benignus, comis, & quem vereri posses non timere. Calumniatores tamen aut captores habui, sed paucos: eos ipsos patientiâ & silentio mitigaui, aut mutavi. In aliena scripta & ingenia pronus, & facilius laudis quàm veri sæpè cenfor. Quid facerem? natura erat: abripuit. & nunc me, Woueri, tuus quoque calor. Desino. quia, cum Euripide

Σιωπῶ? ἐγνῆς σοι βούλομαι, ἀλλ' ὃ συμποσέει;

Consipere, non desipere tecum debeo.

Louanij, Kal. Octobr. ∞. 166.

EPISTOLA LXXXIIX. *Diactura.*

FRANCISCO MONTMORENCIO *Berseiij Toparchæ.*

ADOLESCENTEM nobilem *Gommicourtium*, cognatum tuum, mihi commendas: & est certè, quia tuus, & quia te & stirpe suâ (ita vultus & sermones mihi dicunt) dignus. Ego, quicquid in meâ copiâ erit, faciam libens, & promptius laxiusque, quàm dicam. Significas etiam te, animi caussâ, Dissertationem in publico habiturum super Peregrinatione. Quin laudabis eam, non ambigo: instrumētum profectò vsui rerum & prudentiæ. vt ingenuam voluptatem omittam, quæ in ipsâ est, & post ipsam. Nam & cogitatione, quis non eadem illa visa, reuiscit suauiter & gustat? colloquia, viros, vrbes, agros, siluas, montes, flumina: quæ mihi imagines sæpè ambulanti aut dormituri ingertunt, & cum delectatione in iis acquiesco. Platonem caussæ suæ duxerint, vt è compositâ republicâ eam tolleret, aut parcè & tardè indulgeret: manu aut suffragium ego non dederim, & aliis suadecâ, ipse vsurpem, hoc lustrare & vagari. Quid? Deus ipse, nōne hominē condidit, vt Philosophus optimi sensus ait, *διατὴν αὐτοῦ πρὸς τῶν ἔργων τῶν αὐτοῦ*? Non iuuat & deceat me, cū mundanus sim, nosse & videre, quantum datur, hanc meam patriam?

*«Spero Platonem
suum suum
peritum?
Epictetum»*

Si Ladas ego, pennipésue Persæus,

Aut si Pegasæo ferar volatu;

ô quantum maris terræque obeam: quàm nota & noua regionum lustrem? Sed ligamur ætate, coniugio, languore, bellis: itaque

que intra affectum manemus, leuiter tamen inuidentes quibus licet, sed & indignantes quibus non libet. Vides quò cam, & quàm ipsa iniectio tua animum mihi mouerit & soluerit in has voces. Coërceo, eundem ad te mitto non peregrinatum, sed habitatum. Vale Nobil^{is} Domine. Louanij, postrid. Idus Nouemb. ∞. 1661.

EPISTOLA LXXXIX. *Antuerpiam.*

BALTHASARI MORETO suo S. D.

BENE factum de Corollario. increbantur & hanc laudem siue elogium nostri canes. Dic serìò, non risisti cum legisti? At ego & Equos laudatum ita iui, & Centuria sequens dabit. Libros Lutetiâ accepi, sanè gratos & in meum vsum. De Chronicis scriptoribus, postea videbimus: Vixeno nunc gratia & salus esto. nam ego interea, vt spero, Antuerpiam & vos videbo. Tum de subsidiis operis, ad quod edificandum inclino. Etsi FAX mea est, quam velim item absolutam: & ausim dicere, nihil vtilius conceptum in rem litterarum. O subitam mortem illius amici! cui bono nunc illa, quæ falsò appellantur bona? quid possidenti dederunt? vmbra, non fructum: & vereor vt nec hic superstes impendat, & heredibus modò seruet. Ludibria humana! & fortunam meritò cœcam, quæ ad me aut alios non venit, aliter vsuros, imò & fruituros. Res nostræ publicæ me interim angunt, id est sollicitum habent quò sint euasuræ. Partes nostræ crescent, animos & ordinem & disciplinam habent aut sumunt: nos in confusione, & nec monita sequi lubet aut exempla. Fati vis est, agnosco: cui parere & sine murmure obsequi vetus sapientum dogma est. Ego audio, te amo mi Morete. Louanij, xv. Kal. Decemb. ∞. 1661. Parentes, & fratrem tuum saluto, ac reditum ei gratulor corde.

EPISTOLA XC.

IACOBO ANGIANO, *Equiti, Toparchæ Kestergatij.*

ANTE dies plusculos vidi epistolam ad cognatum tuum Berlegemium, in quo & salus mihi per te missa, & amica
 NNn mentio

mentio veteris consuetudinis nostræ, iam à pueritiâ contractæ, erat. Gauisus sum, fateor. nam quî obliuiscar primos illos amores ac delicias, quas simplex & malarum artium rudis ætas gignit? Atque ea mihi inhærent, & suauis recordatione etiam nunc sensus titillant. Rogo igitur te, vt in legitimam & maturam, id est vin-
 leam amicitiam excrefcere iacta iam tunc illa semina velis: quod fiet, si recondita ea in hoc animo, velut aruo, affectu beniuolentia tuæ velut Zephyri flatu, & alloquio interdum vt umbre, educēs ac rigabis. Quod autem petieras, in memoriā tuorum maiorum aliquid breue, & monumenti loco, pangi: ecce feci. dabo hic habes, vtēris alterutro, vt tibi visum: & siquid ad illi, deo, mutari censebis; significabis, & factum putabis. Nam ego Nobil^{me} Domine, cultum & obsequia virtuti ac dignitati tuæ debeo, & hanc scriptione defero ac sub signo. Louanij, xi. Kal. Decembr. ∞. IOCII.

Historiam gentilis tui obitct vidi. totam adhuc non licuit; vñ fore video in iis quæ paro, Remittetur, cum voles.

EPISTOLA XCI.

Mechliniam.

IANO BERNARTIO suo.

ZYPENVS, insignis iuuenis, & communis noster litteras à te tulit, ad spectu magis quàm lectu gratas. Nam de inuoluntudine tuâ habebant, mihi triste: nisi quod spero tentatimculam modò esse, non firmum aut cum discrimine morbum. Quicquid erit, porrò significa, & Deum rogo vt læti. Te autem, vt omni sorte tolceres, & constes præceptis illis tuis, quæ Consilatorum Boëtianæ miscuisti. Non est tibi integrum, mollem aut pro vulgi more & sensu esse, qui altas illas voces emisisti, & regnum orne fortunæ calcantes. Reminiscere, & vt alij velint, tu exemplo præi, & præsume. Alioquin, quid nisi citharæ similes sumis, quæ suauēs sonos edit, nec ipsa eos audit: sic nos egregia nomina & doctrinas, ipsi ab iis expertes? Si in scribendo delectare nobis propositum, aut etiam aliis non nobis prodesse: desinamus hanc operam licet, facilius & promptius aliā arte assecuturi. Clausula est, patienda humana esse. quare? quia Deum sequi, vetus & commune sapientum dogma est.

* Falsus
 fui. ex hoc
 ipso morbo
 post paucos
 dies obiit,
 paululum
 prius, ita
 anno ma-
 ior. Doler
 mihi, &
 suis, &
 Musi, quas
 & inter le-
 ges colebat.

— *cuncta autem hæc superum demissa supremâ*

Mente fluunt:

quod altiloquus ille poëta tuus dixit. Sed de Boëtio, non breui fruimur? addixit ita Moretus in suis ad me litteris: & puto ad te idem. Milites à Buscoducenti liberatione redeunt, & agminatim hac transeunt: ô liberatione nobis optatâ! Et si ea Deo potius adscribenda, qui hiemem, niues, gelu induxit, & aërem commilitare nobis, omnesque in eo Genios, fecit. Sed periculo quàm propinqui fuimus? magnæ, miræ, non credendæ in breui illo tempore Batavorum munitiones. Dixi tibi, & verum est, Romana opera & militiam imitantur: & ad illud Corbulonis, *Dolabrâ*, non gladio solum, *viâctoriâ quærun*t. Sed quomodocumque, vicimus, aut obtinuimus: et si cum tremore aliquo hæc securitas,

Magnaque post lacrymas etiamnum gaudia pallent.

Actum de hac vrbe & Academiâ erat, si ea in partes aduersas cessisset. Ad Ostendam quid fiet, in dies expectamus, spei iam propiores, quia & illic hiems ista præproperea nobis opportuna. Deus victoriâ illuc, tibi valetudinem mi Bernarti donet, ac tuæ seruet: quam saluto. Louanij, VII. Idus Decembr. ∞. 1651.

EPISTOLA XCII.

Romani.

ANTONIO RICHARDOTO suo.

NVLLAE mihi litteræ tuæ suauiores (eo verbo vtendum est) his postremis, quæ de reditu tuo non spem sed fiduciam faciebant. O res breui sitio te meum, & tu me, amplectare! Non annos, sed lustra videris absuisse: quos ego quidem magis numero, quia pauci mihi supersunt, senescenti, & cuius, cû poëtâ,

Lenit albescens animos capillus.

De te igitur lætum, de fratre Guiljelmo pendemus animi: & quid suspicabimur? Ne vos quidem aliquid audisse? nam nos certè (parentem etiam tuum includo) ab eius discessu nihil. Nisi si litteræ perierint, aut in viâ alibi hæserint, triste nobis omen ab hoc silentio detur. Sed Deus auertat, qui illum & te seruet, & vtrumque nobis, sed te statim reddat. Titulo Præfecti equitum donatum te à Principe, puto audisti: & ampliora te manent, cûm aducneris, quæ magis magisque, cum ætate, increui te cupio: &

NNn 2

crescere

crescere vnâ virtutis & prudentiæ studium atque amorem. O patriam nostram afflictam, & consilij vel auxiliij egentem! Etsi consilium sint, qui dare possunt, inter eos consilij caput tuus parens: sed Deus inclinare & flectere ad ea corda Principum potest, itemque ea ipsa prosperare. Sæpe enim, aut non rarò, optime consulta successus destituit, qui à cælo pendet. Tu vale, & vni optatissime nobis, & D. Legato fratri tuo me & mea serio defer. Louanij, xvi. Kal. Ianuar. anni ∞. 1611.

EPISTOLA XCIII. *Antuerpian.*

IO. BAPTISTAE PEREZIO BARONIO S. D.

TRISTE mihi fuisse, & velut plagam in animo, hoc inuenatum de discessu C. V. Ludouici Perezij aui tui, per te potes scire. Nosti amicitiam quæ inter nos vetus & fida fuit quidni talis, ab annis iam triginta amplius contracta, & sine offensa, imò querelâ, habita ac culta? Scio & te tuosque, mi Baroni, indoluissè in hoc casu: qui alterum tanquam parentem amfistis, in omni sorte, consiliis factisque adiutorem aut directorem. Itaque alterâ iam anchorâ nâvis hæc vestra spoliata est: Deus seruet illam sacram, & parentem tuum diu velit superesse. Quid tamen est? dolere vos & ego debemus, & causa est sed cum iurodo, nec quò affectus solum aut natura, sed ratio trahit, audire & sequi. Non enim vt puluis aut palea ab omni vento, sic nos iam à perturbatione debemus: sed hanc coërcere, & animum ponderis illo rationis & sapientiæ stabilire. Quid autem ea dicit? nihil insolens euenisse, mortalem mortuum esse, nec diuulsum à nobis, sed prægressum. In eâdem viâ omnes sumus, ad eandem Fati metam tendimus, & pertingemus,

— *sive reges,*

Sive inopes erimus coloni.

Quod ergo omnibus, quòd semper euênit & eueniet: eut vt proprium dolorem aut cladem interpretemur? Qui periti cælestes sunt, in Solis aut Lunæ deliquio non stupent aut timent: scilicet enim mox reducturam utrique sideri suam claritatem: simile vobis Christianis sit. qui gnari diuinarum promissionum, non mortem hanc habemus, sed transitum ad vitam. Pro breui illi, turbida

turbidâ & impacatâ, æterna nos manet, curarum turbarumque experts. Iactamur hîc inter vndas, & noui semper aliqui alicunde fluctus : ô quando erimus vbi purum illud certumque serenum est? quò tempestas, imò nec metus eius, adspirat? Sicut fumus, quamuis crassus, cum altum petit, dissipatur & perit : sic necesse doloris omnem nubem, si cogitatione alta illa adeamus. Faciamus mi Baroni, nec illa plebeia cogitemus aut loquamur, Heu cur ille mortuus? cur me deseruit & reliquit? O stulte, debuit:

*Certa etenim vitæ finis mortalibus instat,
Nec deuitari letum pote, quin obeamus.*

Ab Epicteti potius sapientiâ illa mutucimur: *Non sum æternitas, sed homo : id est, particula Vniuersi, vt hora diei. Venire igitur me oportet, vt horam; & præterire, vt horam.* Vidésne in agris vt fruges satæ in herbam, in culinum, in aristam surgunt, maturescunt, & metuntur? sic in nobis. venimus in vitam, quidam in herbâ, alij in culmo pereunt, plerique in maturitate aliquâ metuntur: & quæ causâ querelæ est? Ante oculos sortis humanæ conditio ponatur: ita sati & nati sumus. Enimvero in nostro isto, si examinas, iustior gratandi etiam causâ, quàm querendi occurret. quòd æquabilem vitæ cursum, cum optinâ famâ, sine Fortunæ insigni plagâ, peregit: quòd ad terminos etiam illos æui peruênit, quò pauci omninò pertingunt. Vidit & reliquit familiam florentem, liberos, nepotes, pronepotes: vt nec obiisse quidein videri debeat, qui in tot animis corporibusque suorum viuit. Vt agricola parum aut nihil dolet in arbore amissâ, quæ ex vno trunco plures frutices & iam panè arbores dedit: sit hîc simile. non tamen vt nihil, sed vt modestiùs leuiusque doleamus. Ille quidem in superis locis, beatus inter beatos agit, vti speramus: & apud nos tamen memoria virtutum eius viuit & viuere. quid apud nos? apud alienos, & populum etiam hunc vestrum: quem probitate illâ & benignitate suam fecerat, iuuando, consulendo, consolando, velut communis omnium parens. Hæc talia cogitemus mi Baroni. & vt spinas aut tribulos, etsi adhærentes aut amplectentes, dimouemus; ad poma aut uas vltro manus porrigimus: sic in isto casu, quod iuuare aut alleuare potest, apprehendamus; pungentia illa & noxia, etsi offerunt se, depellamus...

lamus. Fac, te quaeso: ego tecum dabo operam: & communia hæc utrique solatia (nam & ipse ego) scito à me scripta. Louanij, VI. Kal. anni noui instantis ∞. LCCII. quem uoueo parenti tuo & tibi feliciter labi.

EPISTOLA XCIIII.

Pragam.

IOANNI HOLLANDIO.

GAUDEO te rediisse incolumem, aut certè nunc esse incolumem, uti epistola tua mihi dat augurari. Nam diutinam valetudinem te passum intellexi, & dolui: spero omnia meliora nunc fore & meliora, in patrio tuo solo. Sed & hoc gaudeo, tale te rediisse, qualem scriptio ostendit: ita me Deus, plena honestissimi desiderij & studij, atque vno verbo, Bonæ mentis. Rogo te, perge in hac viâ & vitâ, & reipublicæ ornamentum vel subsidium dona, vbi non laboranti? Certè apud nos aspera omnia & in ancipiti, & non ab vno hoste laboramus. Sunt qui in aperto, sunt qui cuniculis oppugnent: atque vtinam vt vires, ita consilia sint, ad resistendum! Qui volent, disserant: sed mihi firmum, plus mentem quàm manus valere, plus industriam quàm omnes opes. Confluant à veteri orbe, confluant ab isto nouo: alimenta malorum erunt, non remedia, nisi cæcum illum Plutem Prudenti dirigat & moderetur.

Sed quid vana cano? quid fixos arceo casus?

in supero illo consistorio decretum, quid nobis vobisque, & quomodo fiat. Iuuat videre interdum occultas fatorum vias, & quàm ipsis nobis contra nos vtantur. Quæ causâ est? illa, in quâ sistimus:

— *nusquam pietas, non gentibus æquum*

Fas aut cura louis.

Sed heu, inopinata etiam de vobis! tabellas illinc lauratas expectabamus: cupressinæ aduenerunt. Triste mehercules & pænè funestum, de Canisîa: utique si hostis occasione suâ & virore norit uti. Solimanus aliquis si esset, Germania vbi esset? At Deus hæc moderatur, & sistet vt spero impetum barbarici hostis, & nos vitam, ipse fortunam emendabit. Louanij, VII. Idus Ianuarij. ∞. LCCII.

EPI-

EPISTOLA XCV.

IOANNI DRENCKWAIRTO, *supremo Theſaurario.*

COGNATVM hic meum vides, & beneficio deuinctum tibi clientem. Sed beneficio, quod plenum firumque nunc efficit, est in tuâ manu. Nam ecce Quæsturæ munus ante biennium amplius, te vno procurante, accepit: sed honorarium certum nullum adiunctum, quod nunc ij qui ab ætario Brabantico sunt videntur adsignasse. Sed cum ea res firmitatem aut vires habere non possit, nisi collegij vestri auctoritas & approbatio accedat: rogo benignè eam impertiri digneris, & beneficium tuum absolvere atque exornare. Iure equidem pro illo laboro, quia neptem meam ex sorore uxorem habet: & eius liberi inter heredes meos erunt. Plus autem famæ, quàm opum relinquere iis, possum: nec has valdè ambio, tuam & bonorum gratiam. quam Deus adhuc mihi dedit, & rogo seruet. Idem te Ampl^{me} & Nobil^{me} Domine incolumem, ex nostro voto, id est vel tria sæcla. Louanij, prid. Idus Ianuar. ∞. 1602.

EPISTOLA XCVI.

Salomon.

IVLIO SALINERIO S. D.

BENE de moribus tuis iudicas. tales sunt, nec faciles & ingenui solum, vt scribis; sed mites, placidi, oleo tranquilliores. Impotentia tantum à me abest, quantum potentia. Quid ergo ambigis in Tacitum edere, quæ concinnasti, etsi à me incisquæ, vt ais, diuersa? Tu verò securus ede, non offensæ meæ, sed certus gratiæ: si digna illo scriptore & doctorem auribus dabis. Equidem & ego iam olim aliquid in illâ materiâ pinxi aut sculpsi: sed nihil est Protogenis aut Apellis: alius quicumque manum addat, umò & cupressum appingat. Testor supremum Numen, gratum & venerabilem mihi fore, per quem

Respicere ignoto discam pendentia tergo.

Ego enim vt omnia viderim? non si Mineræ aurea lucerna, vt vetus verbum est, illustrasset. Euripidæum illud rotundum & verum:

Ἄλλ' ἢ γὰρ αὐτὸς αὐδρὶ ἐπὶ σταδίῳ βροτῶν
 βίβωκεν· ἄλλω δ' ἄλλω ἀποδοκεῖ γέρας.

*Non unus
 aliquis scire
 re narum o-
 mnia est?
 Sed aliud
 alijs premiū
 posuit Deos

Audis

Audis, mi Salineri? tibi quoque præmiū paratum, & labori sua merces: profer. Qui putat se in his antiquis, & æuo obscuris, aginæ semper æquilibrium ferri: errat, & non Varro ipse fecit in alienis scriptis (testimonia sunt) doctior tamen illis ipsis qui scripserunt. Multum est legisse, inquisiuisse; plus rectam iudicii normam attulisse; sed totum, attigisse. quod Fortunæ aliquando est, non doctrinæ. Enimverò longiùs ibo, & philosophari tecum lubet, & decet. quid hæc sunt, aut quanti pretij, diuinasse & correxisse? In præsentī, delectatiuncula; in præsentī, gloriola: post quinquaginta, aut pro magno centum annos, nemo te aut me auctorem inscribet. Non putemus nos Troiam cepisse, cū depositum alteri locum sanauimus: quid? vnum alterumque verbum. O si animum, o si mores! o si illam Sapientiæ officinam ingrediamur, *ιατρειῶν ψυχῆς*, atque ibi Æsculapio & Hygeiæ sacrificemus ac litemus! Non me diffundo. illud ex animo & interiore pectore, per me tibi liberum sentire, dissentire: neque sum ille Alexandro sublimior, qui nefas putem oppugnari. Facito. sed si me, non meā causā, audis, modestè & modicè: & veritas, non ambitio, finis elucescat. Conuitiari, ineq̄uitare, alienum est nō à doctā solūm mente, sed humanā. Nōne & tibi fieri potest, nec vlla cautio errorem (in his quidem Criticis) vitet? Et à me ut sis securus; alius pro me, aut post me, optionem & succedaneum se dabit. Mihi quidem in his & maioribus frigus iam adhæret: siue ab ætate, siue à Sapientiæ consultus: nec in magno habeo, quod olim in summo. Menedemi dictum aureum, & sublimiori, id est tuæ menti, imprimendum: *Qui Athenas nauigarent, primò Sapientes esse, tum Philosophos, tum Rhetores, denique rudes & idiotas.* Adfirmo tibi, nemo propiùs rem tetigit, valius aperuit: & solida, non in ventum docta mens, quò diutiùs discit, in re plura, in opinione pauciora nouit. Mi Salineri

hæc tibi
Et mente
pariter at-
que lingua
diffuso.

ταῦτά σοι

Τὰ γὰρ ὅμοια, καὶ ἀπὸ τῆς γλώσσης, λέγω.

Vale. Louanij, v. Kal. Febr. ∞. IOCIL

EPISTOLA XCVII.

IVSTVS LIPSIVS

IO. BAPTISTÆ PEREZIO

BARONIO, V. N.

I. C^{TO} HODIE RENVNCIATO

ANIMO ET STILO GRATVLOR.

NÓNNE iure hunc honorem? ad quem tibi gradus è meâ domo & disciplinâ factus. Nam anni iam quattuor sunt, cùm pedem huctulisti: quid nisi ad bonarum artium mercatum, & ut pectus iis impleres? Fecerat hoc quidem à puero:

— *neque enim, ceu nescia falcis*

Silua comam tollit, fructumque expirat in auras:

sic tu in lasciviâ & licentiâ succreuisti. Sed patre auoque curantibus, præceptoribus ducentibus,

Iam tibi Pieriæ tenero sub pectore cura,

Discendi que vices, & amor.

QUOD si â vestibulo domum; ab aurorâ diem augurari licet: nos ex iis ipsis initiis magnam quandam à te lucem. quâ illam etiam maiorum illustrares. maiorum, inquam:

— *neque te series inhonora parentum*

Obscurum proavis & priscae lucis egentem,

Plebeia de stirpe tulit:

sed clarum testatumque tibi genus ab annis quingentis, è Cantabriâ: id est, robustâ & purâ illâ Hispaniæ parte. de robore, Poëta dixerit:

Cantaber ante omnes hyemisque, aestusque, famisque

Inuictus, palmamque ex omni ferre labore.

De puritate, quis nescit, cùm Barbari Hispaniam inundarent, cum tractum ab impietate simul & peregrinitate expertum mansisse? Illinc ergo maternum tuum genus, & pater: vir æquabilis vitæ & modestiæ:

— *virtutibus ille*

*Fortunam domuit, numquamque leuantibus alrè
Intumuit rebus.*

QVID auis tuus maternus, LVDOVICVS PEREZIVS, ex Hispanicâ item nobili stirpe? quem vetus & mutus inter nos amor laudare me cogit, & vetat. Sed vel sine amore, iudicio & veritate hoc dicam: virum esse cum paucis hodie,

— *in quo veteris vestigia recti*

Et mores video duetos meliore metallo.

AB his radicibus tu ramus, an frutex, succum etiam virtutis & melioris animi traxisti:

Catusque vulgares & vdam

Spernis humum, fugiente pennâ.

ITAQUE ad omnia honesta, cum industriâ & successu, te dedisti. & lurisprudentiam præcipuè, sed & alias cum cæ artes coluisti: neque id nego, me monitore & magistro. Sicut enim vomere solo terra scinditur, neruis in citharâ sonus editur: sed adiungi tamen alia membra partesque opus, decori, commodi, imò & perfectionis causâ: sic in arduâ istâ artium censemus, esse quæ iuuent aut orment. Fecisti igitur, quo præmio? primum ipso illo scientiæ, deinde hoc honoris & publici elogij, quod accessit. Maeste! Iustitiæ illius nunc mystes & sacerdos es; quæ, Homeri veriloquio,

Τὰς ἀνδρῶν ἀγογὰς ἢ μὲν δαίμων, ἢ δὲ καλίζει:

*Hos cætus hominum soluit, iungitque vicissim:
quæ sola efficit,*

— *ne armorum ferrique potestas*

Confundat ius omne manu, scelerique nefando

Nomen sit virtus.

Quæ denique IVS SVVM CVIQUE TRIBVIT: Deo cultum, regibus obedientiam, maioribus reuerentiam, minoribus comitatem, oppressis tutelam, dubiis consilium, omnibus innocentiam. Ah, sacrificia huic assiduè & lita: sed in publico. id est, patriæ & ciuibus tuis auxiliator, tutor, rector.

*Vile latens virtus: quid enim submersa tenebris
Proderit?*

Haud magis,

Quam lyra, quæ reticet, vel qui non tenditur arcus.

PRODUCENDA est. & vt Homerus Themidein (id est, Iustitiam) facit Iunoni in concilium Deorum venienti poculum offerre: sic eius consulti debent regibus & dynastis propinare salubrem hunc consilij liquorem. Tu facito, &

— esto animus tibi

Rerumque prudens, & secundis

Temporibus, dubijsque reclus.

ESTO & modestus. sicut enim ad coruscationem aut maiorem lucem oculos claudimus: sic tu animum debes, ad honoris hunc splendorem.

— non se meruisse fatetur,

Qui creuisse putat.

ET vt claudam, in omni vitâ tuâ

Sit nec pigra quies, nec iniqua potentia, nec spes

Improba, sed medius PER HONESTA ET DVLCIA limes.

Louanij, XVII. Kal. Nouemb. pridie LIV. mei natalis. ∞. LCC.

EPISTOLA XCVIII.

HENRICO SCHVLTETO.

LITTERAE tuæ, quibus amicitiam meam appetis, tuam defers, grata fuerunt, mi Schultete. Amor, humani generis nectar, suauior gratiorque est, cum à superiore illo Amore venit, id est Honesti & Boni: ex quo velut traducem esse tuum istum scio. Amas illa, & ob illa me, quia & à me amari (nec falsò) censet. Utinam & compotire detur! studeo equidem, & omnibus ingenij machinis hoc conor. O triumphum, qui peruenit! quamquam nec superari hic turpe est, dummodo arma non proicias, & victus quoque velis vincere. Progrediamur, si non peruenimus. Nam laudes, quas tu plenâ manu in me cumulas, non nisi oculis libo, in animum non admitto, nec assensus mei suffragium dono. Imò esse qualem describis, vix opto, certè non spero. Odi istam nunc crebram *ὑπερηφανία*; cum illud Aristarchi locum vindicat, *Olim vix septem sapientes repertos, hodie vix totidem sapientes.* Manemus in modestiâ, in bonorum studio, nec vela ad blandientium sermonum auras explicemus. Quod me rogas de

Numeris Platoniciis, libelli res non epistolæ sit: nosti implexum illud à se, & interpretantium variâ tractatione distractum. Da aduocationem: at amoris tuo vel statim respondeo, & meum fideliter reddo. Louanij, prid. Kal. Febr. ∞. 1601.

EPISTOLA XCIX.

HYGONI GROTIŌ.

ADAMVM tuum vidi, partem legi, & ex cā omnia probaui. Nam similem te tui esse; facile præcipio. Dicerem miratum me, nisi priora tua hoc verbi & affectus iam exemissent. Ita iamantē te dedisti, & hoc ingenij specimen, vt bona & alta à te exigere debeamus, non solum expectare. At placuit mihi etiam vnice argumentum, & quod ad seria, id est Sapientiæ illa studia te dones. Leuia ingeniorum, qui tantum animi delicias confectantur, verborum elegantias, & cum Euripide, * λόγων ἐνυμφίαις. Nos verò ad rem gradum addamus, & nihil pensius tractemus iis quæ ad verum animi cultum, id est ad Salutem ducunt. Intellectualis Philosophia magna studij huius pars est, quam feliciter in *Adamo* tuo libasti. Perge, hanc ama, & sine vento scientiam, & sine nouitate doctrinam. Publicā viā qui excidit, & semitas quærit, errores & flexus quærit. Sperne, ita Deus te hîc honestum, alibi beatum velit. Louanij, III. Nonas Februar. ∞. 16011. Patrem & Patruum ex animo saluto.

u/sermonū
concinui.
tates.

EPISTOLA C.

Mediolanum.

ERYCIO PUTEANO suo.

PROMVLSIDEM tuam vidimus, id est vina & mella. Planè pro suo nomine liber est: & acumen siue acrimoniam in sensibus habet, & in verbis puritatem, atque etiam suauitatem. Quid amplius dicam, nisi illud,

I bone, quod tua te virtus vocat, i pede fausto.

Ad alia, longius longiusque mi Puteane: sed pede semper recto, id est per viam quam veteres calcarunt, & ego monendo aut docendo præiui. Nouitios istos si audias, stolidos aliquos Hermas; deflectas, & ad languida quædam aut frigida te dones, quæ ipsi
Tulliana

Tulliana vocant. O quàm indignetur & colorem non teneat, si resurgat ille Tullius, & hæc cernat! Ille altus, ille excitatus, & alacer, plenus spiritu & sanguinis, probet hos tabidos, iacentes, & verè *χαμαιπνεύς λόγος*? Atqui phrasin eius & verba habent. *u humi serpentes sermone.* Nescio dicunt: sed hoc scio, non verba, sed pectus & vim mentis esse, quæ disertos facit. Scitè nuper à Politiano dictum, meliorem honestioremque leonis faciem esse, quàm simiæ; etsi ista ad hominem propius accedit. Nihil est hoc imitari, si à te nihil inspiras; imò si omnia tua nō facis, & velut è proprio fonte emittis.

—— qui sibi fidit

Dux, regit examen.

Alij seruiant, mendicent: fama aut vita non respiciet, quicquid hoc est scriptorum. Stuporem! ad vnus illam imitationem nunc nos vocari: quod nemo veterum aut priorum somniauit! Scilicet plus cordis nostri magistri habent, quàm Fabius & ipse Cicero, qui ad omnes non oratores solum, sed historicos, poëtas etiam ducunt. Sed omitto has lacunas, quæ non nisi ab umbre implentur, à se arentes: tu inter viuos, vt dixi, fontes esto, & quod sequi solet, perennes. Sed heus, quod vltimò scribebas, te meâ causâ Romam, quale est? impetrandi ciuilis illius tituli? Si ita, quo titulo te afficiam nescio, beniuolentis munium, an parum sapientis. Et quid tibi aut mihi vis? conciliare magnum hunc honorem? Non recusem si detur equidem, vel ob nomen illud prisce urbis: sed si vltro te autem, id est me (quis enim aliter interpretabitur?) hoc agere? Abstine, ita liuor aut calumnia ab vtroque nostrum abstineat: nec in istis elogiis posueris fundamentum famæ. Magis fortasse, si rara essent. scisne Alexandrum olim, cum ciuitate donaretur à nescio quo populo, contempsisse & irrisisse: sed cum legati addidissent, *Nemini hunc honorem delatum, nisi Herculi atque ipsi*: tum denique amplexum, & à socio illo pretium dedisse? Non idem hic erit: & cum bonâ veniâ dicam, magna illa ciuitas se impertiuuit non nimis magnis. Finio, tu ambire vltà caue vel sensu, non dicam vultu aut voce: & me tantum ama. Louanij, postrid. Kal. Nouembr. ∞. 1661.

F I N I S.

APPROBATIO.

*Miscellanea hac Epistolarum Centuria J. Lipsi
Professoris ac Historiographi Regij, utiliter admodum
imprimetur.*

Gulielmus Fabricius Nouiomagus, Apostolicus
ac Archiducalis librorum Censor.

PRIVILEGIUM CÆSAREVM.

RVDOLPHVS SECVNDVS diuina fauente clementia electus Romanorum Imperator semper Augustus, ac Germaniz, Hungariz, Bohemiz, Dalmatiz, Croatiz, Sclauoniz Rex, Archidux Austriaz, Dux Burgundiz, Stiriz, Carinthiz, Carniolz & Wirtembergz, &c. Comes Tirolis, &c. Nostro & Sacri Imperij fideli dilecto **IUSTO LIPSTIO** gratiam nostram Cæsaream. Postquam inter alia, quæ DEVS immortalis hominibus liberali manu dedit dona, illustria inprimis illa & quasi diuina sunt, quæ in literis liberalibusque disciplinis consistunt, quibus scilicet homines non tantum ab animalibus ceteris rationis expertibus, sed à rudi etiam & imperito hominum vulgo ita distinguuntur, vt tanquam Dij quidam splendescere in terris videantur: rem sanè præclaram seque dignam illi præstant, qui diligentem iis ipsis in literis ac disciplinis operam ponunt; præclarissimam verò & Reipub. vtilissimam, qui eas ita excolunt, vt aliorum menti docendo, scribendo lumina præferant, eosque ex ignorantiz tenebris quasi manu educant. Quos excirare, quos amare atque animare ad dignitatis nostræ munus, ad quod Diuino vocati beneficio, concessuque sumus, inprimis pertinere existimamus. Cum itaque ab iis, quorum nobis spectata fides, qui que iudicare de Literis possint, acceperimus, insignes te animi ingenique tui dotes tibi à natura insitas à primis temporibus ætatis tuæ ita literarum ac disciplinarum studiis excoluisse atque exornasse, vt olim iuuenilibus adhuc annis præclara florescentis minimeque vulgaris eruditionis specimina præbueris, dum obscura in antiquis scriptoribus loca, quæ quædam tanquam lustra erant, illustrasti, quæque in iis iniuria temporum deprauata & corrupta fuerunt, restituissti, dum vetusta Latinæ antiquitatis rudera in nouam subinde structuram singulari artificio eleganter conuertisti: ad exquisitam aded & raram doctrinam, quæ magnam de te apud doctos quosque viros opinionem excitare, petuenisse, eamque variis abs te libris acri & graui cum iudicio scriptis atque in lucem editis ostendisse, vt in eo quod tam feliciter tractes scriptiois genere paucos tibi pares hodie reperire sit: iam verò matura te ætate virum, viro magis magisque digna, & viris doctis grata ac Reipub. vtilia scribere, quæq. à primis illis Romanis olim auctoribus scripta fuerunt, à mendis purgare, & leditissimos quosque ex Musarum hortis, in quibus assidue verferis, flores colligere, quibus Lectores mirifice recrees, & eorum pectus ad prudentiam, probitatemque informes: haudquaquam prætermittere volumus, quin Reipub. ad quam hæc abs te ornamenta conferuntur, causa, Cæsareo te nostro elogio decorandum, & quamuis per te satis ipse animatus sis, animadum magis patrociniôq. nostro defendendum pro benigna nostra in te susciperemus voluntate. Quoniam verò lucubrationibus atque operibus tuis in lucem edendis, peculiarem te eligere velle Typographum, accepimus, Diplomate hoc nostro priuilegioque te & Typographum tuum aduersus quorumcunque fraudem, qui lucri causa, quod fieri solet, eadem excudere aut typis imitari sortè velint, munitos cupimus. Quamobrem pro auctoritate nostra Cæsarea decernimus, statuimus, vetamusque, ne quis Typographorum, Bibliopolarum,

aut aliorum, qui librariam negotiationem exercent, eos libros, quos tu editurus es, quocunque modo, charactere, aut forma, siue integros, siue aliquam eorum partem typis imitari, edere, excudere, aut venundare intra sacri Romani Imperij, Regnorumq. ac Dominiorum nostrorum hæreditariorum fines triginta annis proximis à primo editionis die computandis, absque tuo tuorumve hæredum consensu audeat: Hac autem lege addita, uti tria ut minimum cuiusque libri exemplaria, quemadmodum moris est, ad Imperialem nostram Cancellariam mittantur. Si quis verò edictum hoc nostrum transgredi, violare, aut contemnere deprehensus fuerit, cum non solum eiusmodi libris, tibi, hæredibusve tuis, auxilio Magistratus, ubicunq. reperti fuerint, vendicandis, priuari, sed triginta etiam Marcharum auri puri multa, cuius semissis quidem Fiscus nostri Procuratori, fraudis vindici: alter verò semissis, tibi hæredibusve tuis pendatur, puniri volumus. Mandantes vniuersis & singulis nostris & sacri Romani Imperij subditis & fidelibus dilectis, tam Ecclesiasticis quàm Politicis, cuiuscunque status, gradus aut ordinis extiterint, præsertim verò iis, qui in Magistratu constituti, vel suo vel superiorum suorum loco aut nomine, ius dicunt, iustitiãve exercent, ne quemquam hoc Priuilegium nostrum impunè violare, spernere aut negligere patiantur: Sed, si quos contumaces compererint, constituta à nobis multa, eos puniri & quibuscunque modis coërceri curent, ni & ipsimet grauissimam nostram in se conuere indignationem velint. Id quod hoc Diplomate, manu nostra subscripto, & Cæsarei nostri sigilli impressione munito, confirmamus. Datum in arce nostra Regia Pragæ, die prima mensis Augusti. Anno Domini Millesimo, Quingentesimo Nonagesimo secundo. Regnorum nostrorum Romani decimo septimo, Hungarici vigesimo, & Bohemici itidem decimo septimo.

Subsign.

R V D O L P H V S.

Iacobus Curtius à Senfftenaw.

Ad mandatum sacra Cæsarea M^{ti} proprium.

Io. Baruitius.

Additum sigillum Cæs. M^{ti} in cera rubrâ.

SVMMA PRIVILEGII REGII.

PHILIPPVS Dei gratia Hispaniarum, &c. Rex Catholicus, diplomate suo sanxit, nequis, Iusti Lipsij Historiarum in alma Vniuersitate Louaniensi Professoris, & item Historiographi sui libros quoscunque, à Conforibus legitimis approbatos, præter ipsius, heredumve eius, voluntatem, intra triginta annos à prima singulorum librorum editione computandos imprimat, aut alibi terrarum impressos, in has inferioris Germaniæ ditiones importet; venalésve habeat. Qui secùs faxit, præter librorum confiscationem triginta marcharum auri puri illatione mulctabitur. Vt latius patet in litteris, datis Bruxellæ XIV. Feb. M. D. XCVII.

Verreycken.

Tibi JOANNES MORETE, pro amicitia quam mihi cum Plantino (heu, quondam meo) & Plantiniano est ac fuit, tibi, inquam, permitto, uti EPISTOLARVM mearum CENTURIAS typis tuis excudas ac diuisulges. Nequis alibi alius præter te, cupio siue iubeo, ex lege quam magnus Cæsar & Rex meus dixerunt.

Iustus Lipsius.

ANTVERPIÆ,
EX OFFICINA PLANTINIANA,
APVD IOANNEM MORETVM,
CIC. ICCCII.